

## ॥ प्रथमः प्रश्नः ॥

## ॥ तैत्तिरीयसंहितायां सप्तमकाण्डे प्रथमः प्रश्नः ॥

प्रजननं ज्योतिरग्निर्देवतानां ज्योतिर्विराट्कुन्दसां ज्योतिर्विराड्वाचो  
 ऽग्नौ सं तिष्ठते विराजंमभि सं पद्यते तस्मात्तज्ज्योतिरुच्यते द्वौ  
 स्तोमौ प्रातःसवनं वहतो यथा प्राणश्चापानश्च द्वौ माध्यन्दिनं  
 सवनं यथा चक्षुश्च श्रोत्रं च द्वौ तृतीयसवनं यथा वाक् प्रतिष्ठा च  
 पुरुषसम्मितो वा एष यज्ञोऽस्थूरिः (१)

यं कामं कामयते तमेतेनाभ्यश्नुते सर्वं ह्यस्थूरिणाभ्यश्नुते-  
 ऽग्निष्टोमेन वै प्रजापतिः प्रजा असृजत ता अग्निष्टोमेनैव  
 पर्यगृह्णात्तासां परिगृहीतानामश्वतरोऽत्यप्रवत तस्यानुहाय रेत  
 आदत्त तद्गर्दभे न्यमार्द्धस्मार्द्धर्दभो द्विरेता अथो आहुर्वडबायां  
 न्यमार्डिति तस्माद्वडबा द्विरेता अथो आहुरोषधीषु (२)

न्यमार्डिति तस्मादोषधीषोऽनभ्यक्ता रेभन्त्यथो आहुः प्रजासु  
 न्यमार्डिति तस्माद्यमौ जायेते तस्मादश्वतरो न प्र जायत  
 आत्तरेता हि तस्माद्वरुहिष्यनवक्लृप्तः सर्ववेदसे वा सहस्रे  
 वावक्लृप्तोऽति ह्यप्रवत य एवं विद्वानग्निष्टोमेन यजते प्राजाताः  
 प्रजा जनयति परि प्रजाता गृह्णाति तस्मादाहुर्ज्येष्ठयज्ञ इति (३)

प्रजापतिर्वाव ज्येष्ठः स ह्येतेनाग्रेऽयंजत प्रजापतिरकामयत  
 प्र जायेयेति स मुखतस्त्रिवृतं निरमिमीत तमग्निर्देवतान्वसृज्यत

गायत्री छन्दो रथन्तरं सामं ब्राह्मणो मनुष्याणामजः पशूनां  
तस्मात्ते मुख्या मुखतो ह्यसृज्यन्तो रसो बाहुभ्यां पञ्चदशं  
निरमिमीत तमिन्द्रो देवतान्वसृज्यत त्रिष्टुप्छन्दो बृहत् (४)

सामं राजन्यो मनुष्याणामविः पशूनां तस्मात्ते वीर्यावन्तो  
वीर्याद्ध्यसृज्यन्त मध्यतः सप्तदशं निरमिमीत तं विश्वे देवा देवता  
अन्वसृज्यन्त जगती छन्दो वैरूपं साम वैश्यो मनुष्याणां गार्वः  
पशूनां तस्मात्त आद्या अन्नधानाद्ध्यसृज्यन्त तस्माद्भूया रसोऽन्येभ्यो  
भूयिष्ठा हि देवता अन्वसृज्यन्त पत्त एकविंशं निरमिमीत  
तमनुष्टुप्छन्दः (५)

अन्वसृज्यत वैराजं सामं शूद्रो मनुष्याणामश्वः पशूनां  
तस्मात्तौ भूतसङ्गामिणावश्वश्च शूद्रश्च तस्माच्छूद्रो यज्ञेऽनवक्लृप्तो न  
हि देवता अन्वसृज्यत तस्मात्पादावुप जीवतः पत्तो ह्यसृज्येतां  
प्राणा वै त्रिवृदर्धमासाः पञ्चदशः प्रजापतिः सप्तदशस्त्रय इमे लोका  
असावादित्य एकविंश एतस्मिन्वा एते श्रिता एतस्मिन्प्रतिष्ठिता  
य एवं वेदैतस्मिन्नेव श्रयत एतस्मिन्प्रति तिष्ठति॥ (६)

अस्थुरिरोपधीषु ज्येष्ठयज्ञ इति बृहदनुष्टुप्छन्दः प्रतिष्ठिता नवं च॥६॥ [१]

प्रातःसवने वै गायत्रेण छन्दसा त्रिवृते स्तोमाय ज्योतिर्दधेति  
त्रिवृता ब्रह्मवर्चसेन पञ्चदशाय ज्योतिर्दधेति पञ्चदशेनौजसा  
वीर्येण सप्तदशाय ज्योतिर्दधेति सप्तदशेन प्राजापत्येन

प्रजननेनैकविंशाय ज्योतिर्दधेति स्तोमं एव तथ्स्तोमाय  
 ज्योतिर्दधेत्यथो स्तोमं एव स्तोममभि प्र णयति यावन्तो वै  
 स्तोमास्तावन्तः कामास्तावन्तो लोकास्तावन्ति ज्योतींष्येतावन्त  
 एव स्तोमानेतावन्तः कामानेतावन्तो लोकानेतावन्ति ज्योतींष्यव  
 रुन्धे॥ (७)

तावन्तो लोकान्यौदश च॥१॥ [२]

ब्रह्मवादिनो वदन्ति स त्वे यजेत योऽग्निष्टोमेन यजमानोऽथ  
 सर्वस्तोमेन यजेतेति यस्य त्रिवृतमन्तर्यन्ति प्राणांस्तस्यान्तर्यन्ति  
 प्राणेषु मेऽप्यसदिति खलु वै यज्ञेन यजमानो यजते यस्य  
 पञ्चदशमन्तर्यन्ति वीर्यं तस्यान्तर्यन्ति वीर्यं मेऽप्यसदिति खलु वै  
 यज्ञेन यजमानो यजते यस्य सप्तदशमन्तर्यन्ति (८)

प्रजां तस्यान्तर्यन्ति प्रजायां मेऽप्यसदिति खलु वै यज्ञेन  
 यजमानो यजते यस्यैकविंशमन्तर्यन्ति प्रतिष्ठां तस्यान्तर्यन्ति  
 प्रतिष्ठायां मेऽप्यसदिति खलु वै यज्ञेन यजमानो यजते यस्य  
 त्रिणवमन्तर्यन्त्यृतूँश्च तस्य नक्षत्रियां च विराजमन्तर्यन्त्यृतुषु मे-  
 ऽप्यसन्नक्षत्रियायां च विराजीति (९)

खलु वै यज्ञेन यजमानो यजते यस्य त्रयस्त्रिंशमन्तर्यन्ति  
 देवतास्तस्यान्तर्यन्ति देवतासु मेऽप्यसदिति खलु वै यज्ञेन  
 यजमानो यजते यो वै स्तोमानामवमं परमतां गच्छन्तं वेदं

पर॒म॒ता॒मे॒व ग॑च्छति त्रिवृ॒द्धे स्तोमा॑नामव॒मस्त्रि॑वृत्प॒र॒मो य ए॒वं वेद॑  
पर॒म॒ता॒मे॒व ग॑च्छति॥ (१०)

सप्तदशमन्तर्यन्ति विराजीति चतुश्चत्वारिंशच्च॥३॥ [३]

अङ्गिर॑सो वै स॒त्रमा॑सत॒ ते सु॒व॒र्गं लो॒कमा॑यन्तेषां  
ह॒विष्मा॑श्च ह॒विष्कृ॑चाहीयेता॒न्ताव॑कामयेता॒ सुव॑र्गं लो॒कमि॑यावेति  
तावे॒तं द्वि॒रात्र॑मपश्यतां॒ तमा॑हरतां॒ तेना॑यजेतां॒ ततो॒ वै तौ सु॒व॒र्गं  
लो॒कमै॑तां॒ य ए॒वं वि॒द्वान्द्वि॒रात्रे॑ण॒ यज॑न्ते सु॒व॒र्गमे॒व लो॒कमे॑ति  
तावै॒तां पूर्वे॑णाऽह्नाऽगच्छता॒मुत्त॑रेण (११)

अ॒भि॒प्ल॒वः पूर्व॑मह॑र्भवति॒ गति॑रुत्तरं॒ ज्योति॑ष्ठोमोऽग्नि॒ष्टोमः  
पूर्व॑मह॑र्भवति॒ तेज॑स्तेनाव॑ रुन्धे॒ सर्व॑स्तोमोऽति॒रात्र॑ उत्तरं॒  
सर्व॑स्याऽऽत्यै॒ सर्व॑स्याव॑रुद्धौ गाय॒त्रं पूर्व॑ह॒न्त्साम॑ भवति॒ तेजो॑  
वै गा॒य॒त्री गा॒य॒त्री ब्र॑ह्मवर्च॑सं तेजं॒ ए॒वं ब्र॑ह्मवर्च॑समा॒त्मन्ध॑त्ते  
त्रैष्टु॑भ॒मुत्त॑र॒ ओजो॑ वै वी॒र्यं त्रि॒ष्टु॒गोजं॑ ए॒वं वी॒र्यमा॑त्मन्ध॑त्ते रथन्तरं॒  
पूर्वे॑ (१२)

अह॒न्त्साम॑ भवती॒यं वै र॑थन्तर॒मस्या॑मे॒व प्रति॑ तिष्ठति  
बृ॒हदु॑त्तरेऽसौ वै बृ॒हद॑मुष्या॒मे॒व प्रति॑ तिष्ठति॒ तदा॑हुः  
क्व॒ जग॑ती चानुष्टु॒प्जेति॑ वैखान॒सं पूर्वे॑ऽह॒न्त्साम॑ भवति॒  
तेन॒ जग॑त्यै॒ नैति॑ षोड॒श्युत्त॑रे॒ तेना॑नुष्टु॒भोऽथा॑हु॒र्यत्समा॑नै॒-  
ऽर्धमा॑से स्याता॒मन्य॑तरस्याहो॒ वी॒र्यम॑नु॒ पद्मे॑तेत्य॒मावा॑स्या॒यां

पूर्वमहर्भवत्युत्तरस्मिन्नुत्तरन्नानैवार्धमासयोर्भवतो नानावीर्ये भवतो  
हविष्मन्निधनं पूर्वमहर्भवति हविष्कृन्निधनमुत्तरं प्रतिष्ठित्यै॥ (१३)

उत्तरेण रथन्तरं पूर्वेऽन्वेकविंशतिश्च॥३॥ [४]

आपो वा इदमग्रे सलिलमासीत्तस्मिन्प्रजापतिर्वायुर्भूत्वाचरत्स  
इमामपश्यत्तां वराहो भूत्वाहरत्तां विश्वकर्मा भूत्वा व्यमादत्सार्पयत्  
सा पृथिव्यभवत्तत्पृथिव्यै पृथिवित्वन्तस्यामश्राम्यत्प्रजापतिः स  
देवानसृजत् वसून्नुद्रानादित्यान्ते देवाः प्रजापतिमब्रुवन्प्र जायामहा  
इति सौऽब्रवीत् (१४)

यथाहं युष्मांस्तपसासृक्ष्येवं तपसि प्रजननमिच्छध्वमिति  
तेभ्योऽग्निमायतनं प्रायच्छदेतेनायतनेन श्राम्यतेति तै-  
ऽग्निनायतनेनाश्राम्यन्ते संवत्सर एकां गामसृजन्त तां वसुभ्यो  
रुद्रेभ्य आदित्येभ्यः प्रायच्छन्नेतां रक्षध्वमिति तां वसवो रुद्रा  
आदित्या अरक्षन्त सा वसुभ्यो रुद्रेभ्य आदित्येभ्यः प्राजायत  
त्रीणि च (१५)

शतानि त्रयस्त्रिंशत् चाथ सैव सहस्रतम्यभवत्ते देवाः प्रजा-  
पतिमब्रुवन्त्सहस्रेण नो याजयेति सौऽग्निष्टोमेन वसूनयाजयत्त  
इमं लोकमजयन्तच्चाददुः स उक्थ्यैन रुद्रानयाजयत्तै-  
ऽन्तरिक्षमजयन्तच्चाददुः सौऽतिरात्रेणादित्यानयाजयत्तैऽमुं  
लोकमजयन्तच्चाददुस्तदन्तरिक्षम् (१६)

व्यवैर्यत॑ तस्मा॑द्द्रु॒द्रा घातु॑का अनाय॒तना॑ हि तस्मा॑दाहुः  
 शिथि॒लं वै म॑ध्य॒ममह॑स्त्रिरात्रस्य॒ वि हि तद॑वैर्य॒तेति॑ त्रैष्टु॑भं  
 मध्य॒मस्याह॑ आज्य॒म्भव॑ति सं॒याना॑नि सू॒क्तानि॑ श॒सति॑  
 षोड॒शिन॑ २ श॒सत्य॑हो धृ॒त्या अशि॑थिलं भावाय॒ तस्मा॑त्  
 त्रिरा॒त्रस्या॑ग्निष्टो॒म ए॒व प्र॑थ॒ममहः॑ स्यादथोक्थ्योऽथा॑तिरात्र॒ एषां  
 लो॒कानां॑ विधृत्यै॒ त्रीणि॑त्रीणि श॒तान्य॑नूचीना॒हमव्य॑वच्छिन्नानि  
 ददाति (१७)

ए॒षां लो॒काना॑मनु सन्त॑त्यै द॒शतं॑ न विच्छि॑न्त्याद्विराजं  
 नेद्वि॑च्छि॒नदानी॑त्यथ॒ या स॑हस्र॒तम्या॑सीत्तस्या॒मिन्द्र॑श्च विष्णु॑श्च  
 व्याय॑च्छेता॒ २ स इन्द्रो॑ऽमन्य॒तानया॑ वा इ॒दं विष्णुः॑ स॒हस्रं॑  
 वक्ष्य॑त॒ इति॑ तस्या॑मकल्पेतां॒ द्विभा॑ग॒ इन्द्र॒स्तृती॑ये विष्णु॒स्तद्वा  
 ए॒षाम्य॑नूच्यत उ॒भा जि॑ग्यथुरिति॒ तां वा ए॒ताम॑च्छावाकः (१८)

ए॒व श॑स॒त्यथ॑ या स॒हस्र॑त॒मी सा हो॒त्रे दे॒येति॑ हो॒तारं॑  
 वा अ॒भ्यति॑रिच्यते॒ यदति॑रिच्यते॒ हो॒ताना॑प्तस्यापयिता॒  
 था॑हुरुन्ने॒त्रे दे॒येत्यति॑रिक्ता॒ वा ए॒षा स॒हस्र॑स्यातिरिक्त  
 उ॒न्नेत॑र्त्विजामथा॑हुः सर्वे॑भ्यः सद॒स्ये॑भ्यो दे॒येत्यथा॑हुरुदाकृत्या॒  
 सा व॑शं चरे॒दित्यथा॑हुर्ब्र॒ह्मणे॑ चा॒ग्नीधे॑ च दे॒येति॑ (१९)

द्विभा॑गं ब्र॒ह्मणे॑ तृती॒यम॒ग्नीधं॑ ऐन्द्रो वै ब्र॒ह्मा वैष्ण॑वो॒  
 ऽग्नी॒द्यथै॒व ता॒वक॑ल्पेता॒मित्यथा॑हुर्या॒ कल्या॑णी ब॒हुरू॒पा सा

देयेत्यथाहुर्या द्विरूपोभयतएनी सा देयेति सहस्रस्य परिगृहीत्यै  
तद्वा एतत्सहस्रस्यायनं सहस्रं स्तोत्रीयाः सहस्रं दक्षिणाः  
सहस्रसम्मितः सुवर्गो लोकः सुवर्गस्य लोकस्याभिजित्यै॥ (२०)

अब्रवीच्च तदन्तरिक्षन्ददात्यच्छावाकश्च देयेति सप्तचत्वारिंशच्च॥७॥ [५]

सोमो वै सहस्रमविन्दत्तमिन्द्रोऽन्वविन्दत्तौ यमो  
न्यागच्छतावब्रवीदस्तु मेऽत्रापीत्यस्तु ही(३) इत्यब्रूतां स  
यम एकस्यां वीर्यं पर्यपश्यदियं वा अस्य सहस्रस्य वीर्यं  
बिभर्तीति तावब्रवीदियं ममास्त्वेतद्युवयोरिति तावब्रूतां सर्वे वा  
एतदेतस्यां वीर्यम् (२१)

परि पश्यामोऽंशमा हरामहा इति तस्यामंशमाहरन्त  
तामप्सु प्रावेशयन्त्सोमायोदेहीति सा रोहिणी पिङ्गलैकहायनी  
रूपं कृत्वा त्रयस्त्रिंशता च त्रिभिश्च शतैः सहोदैत्तस्माद्रोहिण्या  
पिङ्गलैकहायन्या सोमं क्रीणीयाद्य एवं विद्वान्रोहिण्या  
पिङ्गलैकहायन्या सोमं क्रीणाति त्रयस्त्रिंशता चैवास्य  
त्रिभिश्च (२२)

शतैः सोमः क्रीतो भवति सुक्रीतेन यजते तामप्सु  
प्रावेशयन्निन्द्रायोदेहीति सा रोहिणी लक्ष्मणा पंष्टौही वार्त्रघ्नी रूपं  
कृत्वा त्रयस्त्रिंशता च त्रिभिश्च शतैः सहोदैत्तस्माद्रोहिणीं लक्ष्मणां  
पंष्टौही वार्त्रघ्नीं दद्याद्य एवं विद्वान्रोहिणीं लक्ष्मणां पंष्टौही वार्त्रघ्नीं

ददाति त्रयस्त्रिंशच्चैवास्य त्रीणि च शतानि सा दत्ता (२३)

भवति तामप्सु प्रावेशयन् यमायोदेहीति सा जरती  
मूर्खा तज्जघन्या रूपं कृत्वा त्रयस्त्रिंशता च त्रिभिश्च शतैः  
सहोदैत्तस्माञ्जरतीं मूर्खा तज्जघन्यामनुस्तरणीं कुर्वीत य एवं  
विद्वाञ्जरतीं मूर्खा तज्जघन्यामनुस्तरणीं कुरुते त्रयस्त्रिंशच्चैवास्य  
त्रीणि च शतानि सामुष्मिल्लोके भवति वागेव सहस्रतमी  
तस्मात् (२४)

वरो देयः सा हि वरः सहस्रमस्य सा दत्ता भवति तस्माद्वरो  
न प्रतिगृह्यः सा हि वरः सहस्रमस्य प्रतिगृहीतं भवतीयं वर  
इति ब्रूयादथान्यां ब्रूयादियं ममेति तथास्य तत्सहस्रमप्रतिगृहीतं  
भवत्युभयतएनी स्यात्तदाहुरन्यतएनी स्यात्सहस्रं परस्तादेतमिति  
यैव वरः (२५)

कल्याणी रूपसमृद्धा सा स्यात्सा हि वरः समृद्ध्यै  
तामुत्तरेणाग्नीध्रं पर्याणीयाहवनीयस्यान्ते द्रोणकलशमव घ्रापयेदा  
जिघ्र कलशं मह्युरुधारा पयस्वत्या त्वा विशन्त्विन्दवः समुद्रमिव  
सिन्धवः सा मा सहस्र आ भज प्रजयां पशुभिः सह पुनर्मा  
विंशताद्रयिरिति प्रजयैवैनं पशुर्भा रय्या सम् (२६)

अर्धयति प्रजावांन्पशुमात्रयिमान्भवति य एवं वेद तया  
सहाग्नीध्रं परेत्य पुरस्तात्प्रतीच्यां तिष्ठन्त्यां जुहुयादुभा जिग्यथुर्न



परां जयेथे न परां जिग्ये कतरश्चनैनोः। इन्द्रश्च विष्णो  
यदपस्पृधेथां त्रेधा सहस्रं वि तदैरयेथामिति त्रेधाविभक्तं वै त्रिरात्रे  
सहस्रं साहस्रीमेवैनां करोति सहस्रस्यैवैनां मात्राम् (२७)

करोति रूपाणि जुहोति रूपैरेवैनां समर्धयति तस्यां  
उपोत्थाय कर्णमा जपेदिडे रन्तेऽदिते सरस्वति प्रिये प्रेयसि महि  
विश्रुत्येतानि ते अघ्निये नामानि सुकृतं मा देवेषु ब्रूतादिति देवेभ्य  
एवैनमा वेदयत्यन्वेनं देवा बुध्यन्ते॥ (२८)

एतदेतस्यां वीर्यमस्य त्रिभिश्च दत्ता सहस्रतमी तस्मादेव वरः सं मात्रामेकान्नचत्वारिंशच्च॥८॥ [६]

सहस्रतम्यां वै यजमानः सुवर्गं लोकमेति सैनं सुवर्गं  
लोकं गमयति सा मा सुवर्गं लोकं गमयेत्याह सुवर्गमेवैनं लोकं  
गमयति सा मा ज्योतिष्मन्तं लोकं गमयेत्याह ज्योतिष्मन्तमेवैनं  
लोकं गमयति सा मा सर्वान्पुण्याँल्लोकान्गमयेत्याह सर्वानेवैनं  
पुण्याँल्लोकान्गमयति सा (२९)

मा प्रतिष्ठां गमय प्रजयां पशुभिः सह पुनर्मा विशताद्रयिरिति  
प्रजयैवैनं पशुभि रय्यां प्रतिष्ठापयति प्रजावाँन्पशुमात्रयिमान्भवति  
य एवं वेद तामग्नीधे वा ब्रह्मणे वा होत्रे वोद्गात्रे वाध्वर्यवे वा  
दद्यात्सहस्रमस्य सा दत्ता भवति सहस्रमस्य प्रतिगृहीतं भवति  
यस्तामविद्वान् (३०)

प्रतिगृह्णाति तां प्रति गृह्णीयादेकांसि न सहस्रमेकां त्वा भूतां

प्रति गृह्णामि न सहस्रमेकां मा भूता विंश मा सहस्रमित्येकामेवैनं  
 भूतां प्रति गृह्णाति न सहस्रं य एवं वेद स्योनासि सुषदा सुशेवा  
 स्योना मा विंश सुषदा मा विंश सुशेवा मा विंश (३१)

इत्याह स्योनैवैनं सुषदा सुशेवा भूता विंशति नैनं  
 हिनस्ति ब्रह्मवादिनो वदन्ति सहस्रं सहस्रतम्यन्वेती (३)  
 सहस्रतमीं सहस्रा (३) मिति यत्प्राचीं मुत्सृजेत्सहस्रं  
 सहस्रतम्यन्वित्युत्सहस्रमप्रज्ञात्रं सुवर्गं लोकं न प्र  
 जानीयात्प्रतीचीमुत्सृजति तां सहस्रमनु पर्यावर्तते सा  
 प्रजानती सुवर्गं लोकमेति यजमानमभ्युत्सृजति क्षिप्रे सहस्रं प्र  
 जायत उत्तमा नीयते प्रथमा देवान्गच्छति॥ (३२)

लोकानामयति सार्विद्वान्सुशेवा माविंश यजमानं द्वादश च॥४॥ [७]

अत्रिरददादौर्वाय प्रजां पुत्रकामाय स रिरिचानो-  
 ऽमन्यत् निर्वीर्यः शिथिलो यातयामा स एतं चतूरात्रमपश्यत्  
 तमाहरत्तेनायजत् ततो वै तस्य चत्वारो वीरा आजायन्त सुहोता  
 सूद्राता स्वध्वर्युः सुसंभेयो य एवं विद्वांश्चतूरात्रेण यजत् आस्य  
 चत्वारो वीरा जायन्ते सुहोता सूद्राता स्वध्वर्युः सुसंभेयो ये  
 चतुर्विंशाः पवमाना ब्रह्मवर्चसं तत् (३३)

य उद्यन्तः स्तोमाः श्रीः सात्रिंश्च श्रद्धादेवं यजमानं  
 चत्वारि वीर्याणि नोपानमन्तेज इन्द्रियं ब्रह्मवर्चसमन्नाद्यं स

ए॒ताऽश्च॒तुर॑श्चतु॒ष्टोमा॒न्त्सोमा॑नपश्य॒त्ताना॑हर॒त्तैर्य॑जत॒ तेजं॑ ए॒व  
 प्र॒थमे॑नावारु॒न्धेन्द्रि॑यं द्वितीये॑न ब्रह्मवर्च॑सं तृतीये॑नान्नाद्यं चतुर्थे॑न  
 य ए॒वं वि॒द्वाऽश्च॒तुर॑श्चतु॒ष्टोमा॒न्त्सोमा॑नाहर॒ति तैर्य॑जते॒ तेजं॑ ए॒व  
 प्र॒थमे॑नावारु॒न्धेन्द्रि॑यं द्वितीये॑न ब्रह्मवर्च॑सं तृतीये॑नान्नाद्यं चतुर्थे॑न  
 यामे॒वात्रि॒रुद्धि॑माध्नो॒त्तामे॒व यज॑मान ऋध्नोति॥ (३४)

तत्तेजं ए॒वाष्टा॑दश च॥२॥ ————— [८]

ज॒मद॑ग्निः पु॒ष्टिका॑मश्चतू॒रात्रे॑णायजत॒ स ए॒तान्योषा॑ः  
 अपु॒ष्यत्तस्मा॑त्प॒लितौ॒ जाम॑द॒ग्नियौ॒ न सं जा॑नाते ए॒ताने॑व  
 पोषा॑न्पु॒ष्यति॒ य ए॒वं वि॒द्वाऽश्च॒तूरा॑त्रेण यज॑ते पुरोडा॒शिन्य॑ उप॒सदो॑  
 भव॑न्ति प॒शवो॒ वै पु॒रोडा॑शः प॒शूने॑वाव॒ रुन्धेऽन्नं॑ वै पु॒रोडा॑शो-  
 ऽन्नमे॑वाव॒ रुन्धेऽन्ना॑दः प॒शुमा॑न्भव॒ति य ए॒वं वि॒द्वाऽश्च॒तूरा॑त्रेण  
 यज॑ते॥ (३५)

ज॒मद॑ग्निरष्टाच॑त्वारि॒ंशत्॥१॥ ————— [९]

सं॒व॒त्स॒रो वा इ॒दमे॑क आसी॒त्सोऽका॑मयत॒तून्त्सृ॑जेयेति॒ स ए॒तं  
 प॑ञ्चरा॒त्रम॑पश्य॒त्तमा॑हर॒न्तेना॑यजत॒ ततो॒ वै स ऋ॑तून्सृजत॒ य ए॒वं  
 वि॒द्वान्प॑ञ्चरा॒त्रेण॒ यज॑ते॒ प्रैव जा॑यते॒ त ऋ॑तवः॒ सृष्टा॑ न व्याव॑र्तन्त॒ त  
 ए॒तं प॑ञ्चरा॒त्रम॑पश्यन् तमा॑हर॒न्तेना॑यजन्त॒ ततो॒ वै ते व्याव॑र्तन्त॒ (३६)

य ए॒वं वि॒द्वान्प॑ञ्चरा॒त्रेण॒ यज॑ते॒ वि पा॑प्मना॒ भ्रातृ॑व्ये॒णा  
 वर्त॑ते॒ सार्व॑सेनिः॒ शौचे॒योऽका॑मयत॒ पशु॑मान्त्स्या॒मिति॒ स

एतं पञ्चरात्रमाहर्त्तेनायजत ततो वै स सहस्रं पशून्प्राप्नोद्य  
 एवं विद्वान्पञ्चरात्रेण यजते प्र सहस्रं पशूनाप्नोति बबरः  
 प्रावाहणिरकामयत वाचः प्रवदिता स्यामिति स एतं  
 पञ्चरात्रमा (३७)

अहर्त्तेनायजत ततो वै स वाचः प्रवदिता भवद्य एवं  
 विद्वान्पञ्चरात्रेण यजते प्रवदितैव वाचो भवत्यथो एनं  
 वाचस्पतिरित्याहुर्नातश्चतूरात्रोऽतिरिक्तः षड्रात्रोऽथ वा एष  
 स प्रति यज्ञो यत्पञ्चरात्रो य एवं विद्वान्पञ्चरात्रेण यजते सम्प्रत्येव  
 यज्ञेन यजते पञ्चरात्रो भवति पञ्च वा ऋतवः संवत्सरः (३८)

ऋतुष्वेव संवत्सरे प्रति तिष्ठत्यथो पञ्चाक्षरा पङ्क्तिः पाङ्क्तौ  
 यज्ञो यज्ञमेवाव रुन्धे त्रिवृदग्निष्टोमो भवति तेज एवाव रुन्धे  
 पञ्चदशो भवतीन्द्रियमेवाव रुन्धे सप्तदशो भवत्यन्नाद्यस्यावरुद्धा  
 अथो प्रैव तेन जायते पञ्चविंशोऽग्निष्टोमो भवति प्रजापतेराप्त्यै  
 महाव्रतवानन्नाद्यस्यावरुद्धौ विश्वजिह्वसर्वपृष्ठोऽतिरात्रो भवति  
 सर्वस्याभिजित्यै॥ (३९)

ते व्यावर्तन्त प्रवदिता स्यामिति स एतं पञ्चरात्रमा संवत्सरोऽभिजित्यै॥४॥ [१०]

देवस्य त्वा सवितुः प्रसवेऽश्विनोर्बाहुभ्यां पूष्णो हस्ताभ्यामा  
 दंद इमामंगृभ्णन्नशनामृतस्य पूर्वं आयुषि विदथेषु कव्या। तया  
 देवाः सुतमा बभूवुर्ऋतस्य सामन्त्सरमारपन्ती। अभिधा असि

भुव॑नमसि॒ यन्ता॑सि॒ ध॒र्तासि॒ सोऽग्निं॑ वै॒श्वान॒रः सप्र॑थसं गच्छ॒  
 स्वाहा॑कृतः पृथि॒व्यां य॒न्ता रा॒ज्य॒न्तासि॒ यम॑नो ध॒र्तासि॒ धरु॑णः  
 कृष्यै॒ त्वा क्षेमा॑य॒ त्वा र॒य्यै त्वा पोषा॑य॒ त्वा पृथि॒व्यै त्वाऽन्तरि॑क्षाय  
 त्वा दि॒वे त्वा स॒ते त्वास॑ते त्वा॒द्भ्यस्त्वौष॑धीभ्यस्त्वा॒ विश्वे॑भ्यस्त्वा  
 भूते॑भ्यः॥ (४०)

धरुणः पञ्चविंशतिश्च॥१॥ [११]

वि॒भूर्मा॒त्रा प्र॒भूः पि॒त्राश्वो॑ऽसि॒ ह्योऽस्य॑त्योऽसि॒ नरो॑ऽस्यर्वा॑सि॒  
 स॒प्तिर॑सि॒ वा॒ज्यसि॒ वृषा॑सि॒ नृम॑णा॒ असि॒ ययु॑र्नामा॒स्यादि॑त्यानां  
 प॒त्वान्वि॑ह्य॒ग्रये॒ स्वाहा॒ स्वाहेन्द्रा॑ग्निभ्या॒ऽस्वहा॑ प्र॒जाप॑तये॒ स्वाहा॒  
 विश्वे॑भ्यो दे॒वेभ्यः॒ स्वाहा॒ सर्वा॑भ्यो दे॒वेता॑भ्य इ॒ह धृ॑तिः स्वाहे॒ह  
 वि॒धृतिः॒ स्वाहे॒ह र॑न्तिः स्वाहे॒ह रम॑तिः स्वाहा॒ भूर॑सि॒ भुवे॑ त्वा  
 भ॒व्याय॑ त्वा भविष्य॑ते त्वा॒ विश्वे॑भ्यस्त्वा भूते॑भ्यो दे॒वा आ॑शा॒पाला॑  
 ए॒तं दे॒वेभ्यो॑ऽश्वं मे॒धाय॑ प्रोक्षि॑तं गोपा॒यत॑॥ (४१)

रन्तिः स्वाहा द्वाविंशतिश्च॥१॥ [१२]

आ॒र्य॑नाय॒ स्वाहा॒ प्राय॑णाय॒ स्वाहो॑द्वा॒वाय॒ स्वाहो॑द्भु॒ताय॒ स्वाहा॑  
 शू॒का॒राय॒ स्वाहा॒ शू॒क॒ताय॒ स्वाहा॒ पला॑यिताय॒ स्वाहाऽऽपला॑यिताय॒  
 स्वाहाऽऽवल्गा॑ते॒ स्वाहा॑ प॒रावल्गा॑ते॒ स्वाहाऽऽय॑ते॒ स्वाहा॑ प्र॒यते॑  
 स्वाहा॒ सर्व॑स्मै॒ स्वाहा॑॥ (४२)

आर्यनायोत्तरमापलायिताय षड्विंशतिः॥१॥ [१३]

अ॒ग्नये॒ स्वाहा॒ सोमा॑य॒ स्वाहा॑ वा॒यवे॒ स्वाहा॑पां मोदा॑य॒ स्वाहा॑  
सवि॑त्रे स्वाहा॒ सर॑स्वत्यै॒ स्वाहेन्द्रा॑य॒ स्वाहा॒ बृह॑स्पतये॒ स्वाहा॑  
मित्रा॑य॒ स्वाहा॒ वरु॑णाय॒ स्वाहा॒ सर्व॑स्मै स्वाहा॑॥ (४३)

[१४]

पृथि॒व्यै स्वाहा॑ऽन्तरि॑क्षाय॒ स्वाहा॑ दि॒वे स्वाहा॒ सूर्या॑य॒ स्वाहा॑  
च॒न्द्रम॑से॒ स्वाहा॒ नक्ष॑त्रेभ्यः॒ स्वाहा॒ प्राच्यै॑ दि॒शे स्वाहा॒ दक्षि॑णायै दि॒शे  
स्वाहा॑ प्र॒तीच्यै॑ दि॒शे स्वाहो॑दी॒च्यै दि॒शे स्वाहो॑र्ध्वायै दि॒शे स्वाहा॑  
दिग्भ्यः॒ स्वाहा॑ऽवान्तर॑दिशाभ्यः॒ स्वाहा॒ समा॑भ्यः॒ स्वाहा॑ श॒रद्भ्यः॒  
स्वाहा॑ऽहोरा॑त्रेभ्यः॒ स्वाहा॑ऽर्धमा॑सेभ्यः॒ स्वाहा॒ मासे॑भ्यः॒ स्वाह॑र्तुभ्यः॒  
स्वाहा॑ संव॑त्स॒राय॒ स्वाहा॒ सर्व॑स्मै स्वाहा॑॥ (४४)

[१५]

अ॒ग्नये॒ स्वाहा॒ सोमा॑य॒ स्वाहा॑ सवि॑त्रे स्वाहा॒ सर॑स्वत्यै॒ स्वाहा॑  
पू॒ष्णे स्वाहा॒ बृह॑स्पतये॒ स्वाहा॑ऽपां मोदा॑य॒ स्वाहा॑ वा॒यवे॒ स्वाहा॑  
मित्रा॑य॒ स्वाहा॒ वरु॑णाय॒ स्वाहा॒ सर्व॑स्मै स्वाहा॑॥ (४५)

[१६]

पृथि॒व्यै स्वाहा॑ऽन्तरि॑क्षाय॒ स्वाहा॑ दि॒वे स्वाहा॑ऽग्नये॒ स्वाहा॑  
सोमा॑य॒ स्वाहा॒ सूर्या॑य॒ स्वाहा॑ च॒न्द्रम॑से॒ स्वाहा॑ऽह्ने स्वाहा॒ रात्रि॑यै  
स्वाह॑र्जवे॒ स्वाहा॑ सा॒धवे॒ स्वाहा॑ सु॒क्षित्यै॑ स्वाहा॑ क्षु॒धे स्वाहा॑ऽऽ-

शिति॒मे स्वाहा॑ रोगा॒य स्वाहा॑ हि॒माय॑ स्वाहा॑ शी॒ताय॑ स्वाहा॑-  
ऽऽत॒पाय॑ स्वाहा॑ऽर॒ण्याय॑ स्वाहा॑ सुव॒र्गाय॑ स्वाहा॑ लो॒काय॑ स्वाहा॑  
सर्व॑स्मै स्वाहा॑॥ (४६)

[१७]

भुवो॑ दे॒वानां॑ कर्म॒णाप॑स॒र्तस्य॑ प॒थ्यासि॑ वसु॒भिर्दे॒वेभिर्दे॒वत॑या  
गाय॒त्रेण॑ त्वा छन्द॑सा युनज्मि वस॒न्तेन॑ त्व॒र्तुना॑ ह॒विषा॑  
दीक्षयामि रु॒द्रेभिर्दे॒वेभिर्दे॒वत॑या त्रैष्टु॑भेन त्वा छन्द॑सा युनज्मि  
ग्री॒ष्मेण॑ त्व॒र्तुना॑ ह॒विषा॑ दीक्षयाम्यादित्येभिर्दे॒वेभिर्दे॒वत॑या जाग॑तेन  
त्वा छन्द॑सा युनज्मि व॒र्षाभि॑स्त्व॒र्तुना॑ ह॒विषा॑ दीक्षयामि  
विश्वे॑भिर्दे॒वेभिर्दे॒वत॑यानुष्टु॒भेन॑ त्वा छन्द॑सा युनज्मि (४७)

श॒रदा॑ त्व॒र्तुना॑ ह॒विषा॑ दीक्षयाम्यङ्गि॑रोभिर्दे॒वेभिर्दे॒वत॑या  
पाङ्क्ते॑न त्वा छन्द॑सा युनज्मि हेम॑न्तशिशिराभ्यां त्व॒र्तुना॑ ह॒विषा॑  
दीक्षयाम्याहं दीक्षाम॑रुहमृतस्य पत्नी॑ गाय॒त्रेण॑ छन्द॑सा ब्रह्म॑णा  
च॒र्त९ स॒त्येऽधा९ स॒त्यमृ॑तेऽधाम्। म॒हीमू॑ षु सु॒त्रामा॑णमिह धृतिः  
स्वाहे॒ह वि॑धृतिः स्वाहे॒ह रन्तिः॑ स्वाहे॒ह रम॑न्तिः स्वाहा॑॥ (४८)

[१८]

ई॒ङ्गा॒राय॑ स्वाहे॑ कृ॒ताय॑ स्वाहा॑ क्रन्द॑ते स्वाहा॑ऽव॒क्रन्द॑ते स्वाहा॑  
प्रोथ॑ते स्वाहा॑ प्र॒प्रोथ॑ते स्वाहा॑ ग॒न्धाय॑ स्वाहा॑ घ्रा॒ताय॑ स्वाहा॑  
प्रा॒णाय॑ स्वाहा॑ व्या॒नाय॑ स्वाहा॑ऽपा॒नाय॑ स्वाहा॑ सन्दी॒यमा॑नाय॑

स्वाहा सन्दिताय स्वाहा विचृत्यमानाय स्वाहा विचृत्ताय  
 स्वाहा पलायिष्यमानाय स्वाहा पलायिताय स्वाहोपरऽस्यते  
 स्वाहोपरताय स्वाहा निवेक्ष्यते स्वाहा निविशमानाय स्वाहा  
 निविष्टाय स्वाहा निषथस्यते स्वाहा निषीदते स्वाहा निषण्णाय  
 स्वाहा (४९)

आसिष्यते स्वाहाऽऽसीनाय स्वाहाऽऽसिताय स्वाहा  
 निपथस्यते स्वाहा निपद्यमानाय स्वाहा निपन्नाय स्वाहा शयिष्यते  
 स्वाहा शयानाय स्वाहा शयिताय स्वाहा सम्मीलिष्यते स्वाहा  
 सम्मीलते स्वाहा सम्मीलिताय स्वाहा स्वप्स्यते स्वाहा स्वपते  
 स्वाहा सुप्ताय स्वाहा प्रभोथस्यते स्वाहा प्रबुध्यमानाय स्वाहा  
 प्रबुद्धाय स्वाहा जागरिष्यते स्वाहा जाग्रते स्वाहा जागरिताय  
 स्वाहा शुश्रूषमाणाय स्वाहा शृण्वते स्वाहा श्रुताय स्वाहा  
 वीक्षिष्यते स्वाहा (५०)

वीक्षमाणाय स्वाहा वीक्षिताय स्वाहा सहास्यते स्वाहा  
 सञ्जिहानाय स्वाहोज्जिहानाय स्वाहा विवथस्यते स्वाहा विवर्तमानाय  
 स्वाहा विवृत्ताय स्वाहोत्थास्यते स्वाहोत्तिष्ठते स्वाहोत्थिताय स्वाहा  
 विधविष्यते स्वाहा विधून्वानाय स्वाहा विधूताय स्वाहोत्क्रऽस्यते  
 स्वाहोत्क्रामते स्वाहोत्क्रान्ताय स्वाहा चङ्क्रमिष्यते स्वाहा  
 चङ्क्रम्यमाणाय स्वाहा चङ्क्रमिताय स्वाहा कण्डूयिष्यते स्वाहा  
 कण्डूयमानाय स्वाहा कण्डूयिताय स्वाहा निकषिष्यते स्वाहा



निकषे॑माणाय॒ स्वाहा॒ निकषि॑ताय॒ स्वाहा॒ यदत्ति॑ तस्मै॒ स्वाहा॒  
 यत्पिब॑ति॒ तस्मै॒ स्वाहा॒ यन्मेह॑ति॒ तस्मै॒ स्वाहा॒ यच्छ॑कृत्करोति॒  
 तस्मै॒ स्वाहा॒ रेत॑से॒ स्वाहा॑ प्र॒जाभ्यः॒ स्वाहा॑ प्र॒जन॑नाय॒ स्वाहा॒  
 सर्व॑स्मै॒ स्वाहा॑॥ (५१)

[१९]

अ॒ग्नये॒ स्वाहा॑ वा॒यवे॒ स्वाहा॑ सू॒र्याय॒ स्वाह॑र्तम॑स्यृतस्य॒र्तम॑सि  
 स॒त्यम॑सि स॒त्यस्य॑ स॒त्यम॑स्यृतस्य॒ पन्था॑ अ॒सि दे॒वानां॑ छा॒यामृत॑स्य॒  
 नाम॒ तत्स॒त्यं यत्त्वं॑ प्र॒जाप॑तिरस्यधि॒ यद॑स्मिन्वा॒जिनी॑व शु॒भः  
 स्पर्ध॑न्ते दिवः॒ सूर्ये॑ण॒ विशो॑ऽपो वृ॒णानः॑ प॑वते क॒व्यन्प॒शुं न गो॒पा  
 इर्यः॑ परि॒ज्मा (५२)

प्र॒जन॑नं प्रातः सव॒ने वै ब्र॑ह्मवादिनः स त्वा अङ्गि॑रस॒ आपो॑ वै सोमो॒ वै संह॑स्रत॒म्याऽत्रि॑र्ज॒मद॑ग्निः

संव॑त्सरो दे॒वस्य॑ वि॒भूराय॑नाया॒ग्नये॑ पृथि॒व्या अ॒ग्नये॑ पृथि॒व्यै भुव॑ ई॒ङ्गारा॑याऽ॒ग्नये॑ वा॒यवे॒ सू॒र्याय॑ वि॒श॑तिः॥२०॥

प्र॒जन॑नमङ्गि॑रसः सोमो॒ वै प्र॑तिगृह्णाति॒ वी॒भूर्वी॑क्ष॒माणा॑य॒ द्वि॑पञ्चाशत्॥५२॥

प्र॒जन॑नं परि॒ज्मा॥

हरिः॑ ॐ॥

॥कृष्ण-यजुर्वेदीय-तैत्तिरीय-संहितायां सप्तमकाण्डे प्रथमः प्रश्नः

समाप्तः॥ ७-१॥

## ॥द्वितीयः प्रश्नः॥

### ॥तैत्तिरीयसंहितायां सप्तमकाण्डे द्वितीयः प्रश्नः॥

साध्या वै देवाः सुवर्गकामा एत९ षड्रात्रमपश्यन्तमाहरन्तेनायजन्ततो वै ते सुवर्गं लोकमायन् य एवं विद्वा९सः षड्रात्रमासते सुवर्गमेव लोकं यन्ति देवसत्रं वै षड्रात्रः प्रत्यक्ष९ ह्येतानि पृष्ठानि य एवं विद्वा९सः षड्रात्रमासते साक्षादेव देवता अभ्यारोहन्ति षड्रात्रो भवति षड्वा ऋतवः षट्पृष्ठानि (१)

पृष्ठैरेवर्तूनन्वारोहन्त्युत्तुभिः संवत्सरन्ते संवत्सर एव प्रति तिष्ठन्ति बृहद्रथन्तराभ्यां यन्तीयं वाव रथन्तरमसौ बृहदाभ्यामेव यन्त्यथो अनयोरेव प्रति तिष्ठन्त्येते वै यज्ञस्याञ्जसायनी स्मृती ताभ्यामेव सुवर्गं लोकं यन्ति त्रिवृदग्निष्टोमो भवति तेज एवाव रुन्धते पञ्चदशो भवतीन्द्रियमेवाव रुन्धते सप्तदशः (२)

भवत्यन्नाद्यस्यावरुद्धा अथो प्रैव तेन जायन्त एकवि९शो भवति प्रतिष्ठित्या अथो रुचमेवाऽऽत्मन्दधते त्रिणवो भवति विजित्यै त्रयस्त्रि९शो भवति प्रतिष्ठित्यै सदोहविर्धानिन एतेन षड्रात्रेण यजेरन्नाश्वत्थी हविर्धानं चाग्नीध्रं च भवतस्तद्धि सुवर्ग्यं चक्रीवती भवतः सुवर्गस्य लोकस्य समष्ट्या उलूखलबुध्नो यूपो भवति प्रतिष्ठित्यै प्राञ्चो यान्ति प्राडिव हि सुवर्गः (३)

लोकः सरस्वत्या यान्त्येष वै देवयानः पन्थास्तमेवान्वारोहन्त्याः

यान्त्यवर्तिमेवान्यस्मिन्प्रतिषज्यं प्रतिष्ठां गच्छन्ति यदा दशं शतं  
 कुर्वन्त्यथैकमुत्थानं शतायुः पुरुषः शतेन्द्रिय आयुष्येवेन्द्रिये प्रति  
 तिष्ठन्ति यदा शतं सहस्रं कुर्वन्त्यथैकमुत्थानं सहस्रसम्मितो  
 वा असौ लोकोऽमुमेव लोकमभि जयन्ति यदैषां प्रमीयेत यदा  
 वा जीयेरन्नथैकमुत्थानन्तद्धि तीर्थम्॥ (४)

पृष्ठानि सप्तदशः सुवर्गो जयन्ति यदैकादश च॥५॥ [१]

कुसुरुबिन्द औद्दालकिरकामयत पशुमान्थस्यामिति स  
 एतं सप्तरात्रमाहरत्तेनायजत तेन वै स यावन्तो ग्राम्याः  
 पशवस्तानवारुन्ध य एवं विद्वान्थसप्तरात्रेण यजते यावन्त एव  
 ग्राम्याः पशवस्तानेवाव रुन्धे सप्तरात्रो भवति सप्त ग्राम्याः पशवः  
 सप्तरण्याः सप्त छन्दाः स्युभयस्यावरुद्धौ त्रिवृदग्निष्टोमो भवति  
 तेजः (५)

एवाव रुन्धे पञ्चदशो भवतीन्द्रियमेवाव रुन्धे सप्तदशो  
 भवत्यन्नाद्यस्यावरुद्ध्या अथो प्रैव तेन जायत एकविंशो भवति  
 प्रतिष्ठित्या अथो रुचमेवाऽऽत्मन्धत्ते त्रिणवो भवति विजित्यै  
 पञ्चविंशोऽग्निष्टोमो भवति प्रजापतेरात्यै महाव्रतवानन्नाद्यस्यावरुद्धौ  
 विश्वजिथ्सर्वपृष्ठोऽतिरात्रो भवति सर्वस्याभिजित्यै यत्प्रत्यक्षं  
 पूर्वेष्वहःसु पृष्ठान्युपेयुः प्रत्यक्षम् (६)

विश्वजिति यथा दुग्धामुपसीदत्येवमुत्तममहः स्यान्नैकरात्रश्चन  
 स्याद्वृहद्रथन्तरे पूर्वेष्वहःसूपं यन्तीयं वाव रथन्तरमसौ बृहदाभ्यामेव

न यन्त्यथो अनयोरेव प्रति तिष्ठन्ति यत्प्रत्यक्षं विश्वजितिं  
पृष्ठान्युपयन्ति यथा प्रत्ता दुहे तादृगेव तत्॥ (७)

तेजं उपेयुः प्रत्यक्षं द्विचत्वारिंशच्च॥३॥ \_\_\_\_\_[२]

बृहस्पतिरकामयत ब्रह्मवर्चसी स्यामिति स एतमष्टरात्रमपश्यत्तम  
ततो वै स ब्रह्मवर्चस्यभवद्य एवं विद्वानष्टरात्रेण यजते ब्रह्मवर्चस्यैव  
भवत्यष्टरात्रो भवत्यष्टाक्षरा गायत्री गायत्री ब्रह्मवर्चसम्गायत्रियैव  
ब्रह्मवर्चसमव रुन्धेऽष्टरात्रो भवति चतस्रो वै दिशश्चतस्रो-  
ऽवान्तरदिशा दिग्भ्य एव ब्रह्मवर्चसमव रुन्धे (८)

त्रिवृदग्निष्टोमो भवति तेजं एवाव रुन्धे पञ्चदशो  
भवतीन्द्रियमेवाव रुन्धे सप्तदशो भवत्यन्नाद्यस्यावरुद्धा अथो प्रैव  
तेन जायत एकविंशो भवति प्रतिष्ठित्या अथो रुचमेवाऽऽत्मन्धत्ते  
त्रिणवो भवति विजित्यै त्रयस्त्रिंशो भवति प्रतिष्ठित्यै पञ्चविंशो-  
ऽग्निष्टोमो भवति प्रजापतेराप्त्यै महाव्रतवानन्नाद्यस्यावरुद्धौ  
विश्वजिथ्सर्वपृष्ठोऽतिरात्रो भवति सर्वस्याभिजित्यै॥ (९)

दिग्भ्य एव ब्रह्मवर्चसमवरुन्धेऽभिजित्यै॥२॥ \_\_\_\_\_[३]

प्रजापतिः प्रजा असृजत् ताः सृष्टाः क्षुधं न्यायन्त्स एतं  
नवरात्रमपश्यत्तमाहरत्तेनायजत् ततो वै प्रजाभ्योऽकल्पत् यर्हि  
प्रजाः क्षुधं निगच्छेयुस्तरहि नवरात्रेण यजेतेमे हि वा एतासां लोका  
अक्लृप्ता अथैताः क्षुधं नि गच्छन्तीमानेवाभ्यो लोकान्कल्पयति  
तान्कल्पमानान्प्रजाभ्योऽनु कल्पते कल्पन्ते (१०)

अस्मा इमे लोका ऊर्जं प्रजासु दधाति त्रिरात्रेणैवेमं  
 लोकं कल्पयति त्रिरात्रेणान्तरिक्षं त्रिरात्रेणामुं लोकं यथा गुणे  
 गुणमन्वस्यत्येवमेव तल्लोके लोकमन्वस्यति धृत्या अशिथिलं  
 भावाय ज्योतिर्गौरायुरिति ज्ञाताः स्तोमा भवन्तीयं वाव  
 ज्योतिरन्तरिक्षं गौरसावायुरेष्वेव लोकेषु प्रति तिष्ठन्ति ज्ञात्रं  
 प्रजानाम् (११)

गच्छति नवरात्रो भवत्यभिपूर्वमेवास्मिन्तेजो दधाति यो  
 ज्योगामयावी स्यात्स नवरात्रेण यजेत प्राणा हि वा एतस्याधृता  
 अथैतस्य ज्योगामयति प्राणानेवास्मिन्दाधारोत यदीतासुर्भवति  
 जीवत्येव॥ (१२)

कल्पन्ते प्रजानात्रयस्त्रिंशच्च॥३॥ [४]

प्रजापतिरकामयत् प्र जायेयेति स एतं दशहोतारमपश्यत्तमं जुहो  
 दशरात्रमसृजत् तेन दशरात्रेण प्राजायत दशरात्राय दीक्षिष्यमाणो  
 दशहोतारं जुहुयाद्दशहोत्रैव दशरात्रं सृजते तेन दशरात्रेण प्र  
 जायते वैराजो वा एष यज्ञो यद्दशरात्रो य एवं विद्वान्दशरात्रेण  
 यजते विराजमेव गच्छति प्राजापत्यो वा एष यज्ञो यद्दशरात्रः (१३)

य एवं विद्वान्दशरात्रेण यजते प्रैव जायत इन्द्रो वै  
 सदृङ्देवताभिरासीत्स न व्यावृतमगच्छत्स प्रजापतिमुपाधावत्  
 तस्मा एतं दशरात्रं प्रायच्छत्तमाहरत्तेनायजत् ततो वै सो-  
 ऽन्याभिर्देवताभिर्यावृतमगच्छद्य एवं विद्वान्दशरात्रेण यजते

व्यावृत्तमेव पाप्मना भ्रातृव्येण गच्छति त्रिकुद्वै (१४)

एष यज्ञो यद्वशरात्रः ककुत्पञ्चदशः ककुदेकविंशः  
ककुत् त्रयस्त्रिंशो य एवं विद्वान्दशरात्रेण यजते त्रिकुदेव  
समानानां भवति यजमानः पञ्चदशो यजमान एकविंशो  
यजमानस्त्रयस्त्रिंशः पुर इतरा अभिचर्यमाणो दशरात्रेण  
यजेत देवपुरा एव पर्यूहते तस्य न कुतश्चनोपाव्याधो भवति  
नैनमभिचरन्श्चतुष्टुते देवासुराः संयत्ता आसन्ते देवा एताः (१५)

देवपुरा अपश्यन् यद्वशरात्रस्ताः पर्यूहन्त तेषां  
न कुतश्चनोपाव्याधोऽभवत्ततो देवा अभवन्परासुरा यो  
भ्रातृव्यवान्स्यात्स दशरात्रेण यजेत देवपुरा एव पर्यूहते  
तस्य न कुतश्चनोपाव्याधो भवति भवत्यात्मना परास्य भ्रातृव्यो  
भवति स्तोमः स्तोमस्योपस्तिर्भवति भ्रातृव्यमेवोपस्तिं कुरुते  
जामि वै (१६)

एतत्कुर्वन्ति यज्यायांसः स्तोममुपेत्य कनीयांसमुपयन्ति  
यदग्निष्टोमसामान्यवस्ताच्च परस्ताच्च भवन्त्यजामित्वाय  
त्रिवृदग्निष्टोमोऽग्निष्टुदाग्नेयीषु भवति तेज एवाव रुन्धे पञ्चदश उक्थ्य  
ऐन्द्रीष्विन्द्रियमेवाव रुन्धे त्रिवृदग्निष्टोमो वैश्वदेवीषु पुष्टिमेवाव  
रुन्धे सप्तदशोऽग्निष्टोमः प्राजापत्यासु तीव्रसोमोऽन्नाद्यस्यावरुद्धा  
अथो प्रैव तेन जायते (१७)

एकविंश उक्थ्यः सौरीषु प्रतिष्ठित्या अथो रुचमेवा-  
 ऽऽत्मन्धत्ते सप्तदशोऽग्निष्टोमः प्राजापत्यासूपहव्यं उपहवमेव  
 गच्छति त्रिणवावग्निष्टोमावभित ऐन्द्रीषु विजित्यै त्रयस्त्रिंश  
 उक्थ्यो वैश्वदेवीषु प्रतिष्ठित्यै विश्वजिह्वसर्वपृष्ठोऽतिरात्रो भवति  
 सर्वस्याभिजित्यै॥ (१८)

प्राजापत्यो वा एष यज्ञो यद्वंशरात्रस्त्रिकुक्कुवा एता वै जायन्त एकत्रिंशच्च॥६॥ — [५]

ऋतवो वै प्रजाकामाः प्रजां नाविन्दन्त तैऽकामयन्त  
 प्रजां सृजेमहि प्रजामव रुन्धीमहि प्रजां विन्देमहि प्रजावन्तः  
 स्यामेति त एतमेकादशरात्रमपश्यन्तमाहरन्तेनायजन्त ततो वै ते  
 प्रजामसृजन्त प्रजामवारुन्धत प्रजामविन्दन्त प्रजावन्तोऽभवन्त  
 ऋतवोऽभवन्तदार्तवानामार्तवत्वमृतूनां वा एते पुत्रास्तस्मात् (१९)

आर्तवा उच्यन्ते य एवं विद्वांस एकादशरात्रमासंते  
 प्रजामेव सृजन्ते प्रजामव रुन्धते प्रजां विन्दन्ते प्रजावन्तो  
 भवन्ति ज्योतिरतिरात्रो भवति ज्योतिरेव पुरस्ताद्वधते सुवर्गस्य  
 लोकस्यानुख्यात्यै पृथ्व्यः षडहो भवति षड्वा ऋतवः षट्षष्ठानि  
 पृष्ठैरेवतूनन्वारोहन्त्यृतुभिः संवत्सरन्ते संवत्सर एव प्रति तिष्ठन्ति  
 चतुर्विंशो भवति चतुर्विंशत्यक्षरा गायत्री (२०)

गायत्रं ब्रह्मवर्चसङ्गायत्रियामेव ब्रह्मवर्चसे प्रति तिष्ठन्ति  
 चतुश्चत्वारिंशो भवति चतुश्चत्वारिंशदक्षरा त्रिष्टुगिन्द्रियं

त्रिष्टुत्रिष्टुभ्येवेन्द्रिये प्रति तिष्ठन्त्यष्टाचत्वारिंशो भवत्यष्टाचत्वारिंशदक्षरा जगती जागताः पशवो जगत्यामेव पशुषु प्रति तिष्ठन्त्येकादशरात्रो भवति पञ्च वा ऋतवं आर्तवाः पञ्चतुष्वेवार्तवेषु संवत्सरे प्रतिष्ठाय प्रजामव रुन्धतेऽतिरात्रावभितो भवतः प्रजायै परिगृहीत्यै॥ (२१)

तस्माद्वायुव्याकात्रपञ्चाशच्च॥ ३॥

[६]

ऐन्द्रवायवाग्रान्गृहीयाद्यः कामयेत यथापूर्वं प्रजाः कल्पेरन्निति यज्ञस्य वै कृप्तिमनु प्रजाः कल्पन्ते यज्ञस्याकृप्तिमनु न कल्पन्ते यथापूर्वमेव प्रजाः कल्पयति न ज्यायांसं कनीयानति कामत्यैन्द्रवायवाग्रान्गृहीयादामयाविनः प्राणेन वा एष व्यृध्यते यस्यामयति प्राण ऐन्द्रवायवः प्राणेनैवैनं समर्धयति मैत्रावरुणाग्रान्गृहीरन् येषां दीक्षितानां प्रमीयेत (२२)

प्राणापानाभ्यां वा एते व्यृध्यन्ते येषां दीक्षितानां प्रमीयंते प्राणापानौ मित्रावरुणौ प्राणापानावेव मुखतः परि हरन्त आश्विनाग्रान्गृहीतानुजावरौऽश्विनौ वै देवानामानुजावरौ पश्चेवाग्रं पर्येतामश्विनावेतस्य देवता य आनुजावरस्तावेवैनमग्रं परि णयतः शुक्राग्रान्गृहीत गतश्रीः प्रतिष्ठाकामोऽसौ वा आदित्यः शुक्र एषोऽन्तोऽन्तम्मनुष्यः (२३)

श्रियै गत्वा नि वर्ततेऽन्तादेवान्तमा रंभते न ततः पापीयान्भवति मन्थ्यग्रान्गृहीताभिचरन्नार्तपात्रं वा एतद्यन्मन्थिपात्रं



मृत्युनैवैनं ग्राहयति ताजगार्तिमार्च्छत्याग्रयणाग्रान्गृहीत यस्य  
पिता पितामहः पुण्यः स्यादथ तन्न प्राप्नुयाद्वाचा वा एष इन्द्रियेण  
व्यध्यते यस्य पिता पितामहः पुण्यः (२४)

भवत्यथ तन्न प्राप्नोत्युर इवैतद्यज्ञस्य वागिव यदाग्रयणो  
वाचैवैनमिन्द्रियेण समर्धयति न ततः पापीयान्भवत्युक्थ्याग्रान्गृहीताभि  
सर्वेषां वा एतत्पात्राणामिन्द्रियं यदुक्थ्यपात्रं सर्वेणैवैनमिन्द्रियेणाति  
प्र युङ्क्ते सरस्वत्यभि नो नेषि वस्य इति पुरोरुचं कुर्याद्वाग्वै (२५)

सरस्वती वाचैवैनमति प्र युङ्क्ते मा त्वत्क्षेत्राण्यरणानि  
गन्मेत्याह मृत्योर्वै क्षेत्राण्यरणानि तेनैव मृत्योः क्षेत्राणि न  
गच्छति पूर्णान्ग्रहान्गृहीयादामयाविनः प्राणान् वा एतस्य  
शुगृच्छति यस्यामयति प्राणा ग्रहाः प्राणानेवास्य शुचो मुञ्चत्युत  
यदीतासुर्भवति जीवत्येव पूर्णान्ग्रहान्गृहीयाद्यर्हि पर्जन्यो न  
वर्षेत्प्राणान् वा एतर्हि प्रजानां शुगृच्छति यर्हि पर्जन्यो न  
वर्षति प्राणा ग्रहाः प्राणानेव प्रजानां शुचो मुञ्चति ताजकप्र  
वर्षति॥ (२६)

प्रमीयेत मनुष्यं ऋध्यते यस्य पिता पितामहः पुण्यो वाग्वा एव पूर्णान्ग्रहान्मञ्चविंशतिश्च॥५॥[७]

गायत्रो वा ऐन्द्रवायवो गायत्रं प्रायणीयमहस्तस्मात्प्रायणीये-  
ऽहन्नैन्द्रवायवो गृह्यते स्व एवैनमायतने गृह्णाति त्रैष्टुभो  
वै शुक्रस्त्रैष्टुभं द्वितीयमहस्तस्माद्वितीयेऽहञ्छुक्रो गृह्यते

स्व ए॒वैन॑मा॒यत॑ने गृ॒ह्णाति॑ जा॒गतो॑ वा आ॒ग्रय॑णो जा॒गतं॑  
तृ॒तीय॑म॒हस्त॑स्मात्तृ॒तीयेऽह॑न्नाग्र॒यणो॑ गृ॒ह्यते॑ स्व ए॒वैन॑मा॒यत॑ने  
गृ॒ह्णात्ये॒तद्वै (२७)

य॒ज्ञमा॑प॒द्यच्छ॑न्दा॒ऽस्या॑प्रोति॒ यद॑ग्र॒यणः॑ श्वो गृ॒ह्यते॑ यत्रै॒व  
य॒ज्ञम॑द॒शन्त॑त ए॒वैनं॑ पुनः॒ प्र यु॑ङ्क्ते जग॑न्मुखो॒ वै द्वि॒तीय॑स्त्रिरा॒त्रो  
जा॒गत॑ आग्र॒यणो॑ यच्च॑तुर्थेऽह॑न्नाग्र॒यणो॑ गृ॒ह्यते॑ स्व ए॒वैन॑मा॒यत॑ने  
गृ॒ह्णात्यथो॒ स्वमे॒व छ॑न्दोऽनु॒ पर्या॑वर्तन्ते॒ राथ॑न्तरो॒ वा ऐ॑न्द्रवा॒यवो॑  
राथ॑न्तरं प॒ञ्चम॑म॒हस्त॑स्मात्प॒ञ्चमे॑ऽह॒न् (२८)

ऐ॒न्द्रवा॒यवो॑ गृ॒ह्यते॑ स्व ए॒वैन॑मा॒यत॑ने गृ॒ह्णाति॑ बा॒र्हतो॑ वै शु॒क्रो  
बा॒र्हत॑ ष॒ष्ठम॑ह॒स्तस्मा॑त्ष॒ष्ठेऽह॑ञ्छु॒क्रो गृ॒ह्यते॑ स्व ए॒वैन॑मा॒यत॑ने  
गृ॒ह्णात्ये॒तद्वै द्वि॒तीयं॑ य॒ज्ञमा॑प॒द्यच्छ॑न्दा॒ऽस्या॑प्रोति॒ यच्छु॑क्रः श्वो  
गृ॒ह्यते॑ यत्रै॒व य॒ज्ञम॑द॒शन्त॑त ए॒वैनं॑ पुनः॒ प्र यु॑ङ्क्ते त्रि॒ष्टुङ्मुखो॑ वै  
तृ॒तीय॑स्त्रिरा॒त्रस्त्रै॒ष्टुभः॑ (२९)

शु॒क्रो यथ्स॑प्तमेऽह॑ञ्छु॒क्रो गृ॒ह्यते॑ स्व ए॒वैन॑मा॒यत॑ने  
गृ॒ह्णात्यथो॒ स्वमे॒व छ॑न्दोऽनु॒ पर्या॑वर्तन्ते॒ वाग्वा॑ आ॒ग्रय॑णो  
वा॒गष्ट॑म॒हस्त॑स्माद॒ष्टमे॑ऽह॑न्नाग्र॒यणो॑ गृ॒ह्यते॑ स्व ए॒वैन॑मा॒यत॑ने  
गृ॒ह्णाति॑ प्रा॒णो वा ऐ॑न्द्रवा॒यवः॑ प्रा॒णो न॑वम॒हस्त॑स्मान्न॒वमे॑-  
ऽह॑न्नैन्द्रवा॒यवो॑ गृ॒ह्यते॑ स्व ए॒वैन॑मा॒यत॑ने गृ॒ह्णात्ये॒तत् (३०)

वै तृ॒तीयं॑ य॒ज्ञमा॑प॒द्यच्छ॑न्दा॒ऽस्या॑प्रोति॒ यदै॑न्द्रवा॒यवः॑

श्वो गृह्यते यत्रैव यज्ञमदृशन्तत एवैनं पुनः प्र युङ्क्तेऽथो  
स्वमेव छन्दोऽनु पर्यावर्तन्ते पथो वा एतेऽध्यपथेन यन्ति  
यैऽन्येनैन्द्रवायवात्प्रतिपद्यन्तेऽन्तः खलु वा एष यज्ञस्य  
यदृशममहर्दशमेऽहन्नैन्द्रवायवो गृह्यते यज्ञस्य (३१)

एवान्तं गृत्वापथात्पन्थामपि यन्त्यथो यथा वर्हीयसा प्रतिसारं  
वहन्ति तादृगेव तच्छ्रन्दाऽस्यन्योन्यस्य लोकमभ्यध्यायन्तान्येतेनैव  
देवा व्यवाहयन्नैन्द्रवायवस्य वा एतदायतनं यच्चतुर्थमहस्तस्मिन्नाग्रयणो  
गृह्यते तस्मादाग्रयणस्यायतने नवमेऽहन्नैन्द्रवायवो गृह्यते शुक्रस्य  
वा एतदायतनं यत्पञ्चमम् (३२)

अहस्तस्मिन्नैन्द्रवायवो गृह्यते तस्मादनैन्द्रवायवस्यायतने  
सप्तमेऽहच्छुक्रो गृह्यत आग्रयणस्य वा एतदायतनं यत्षष्ठमहस्तस्मिन्  
गृह्यते तस्माच्छुक्रस्यायतनेऽष्टमेऽहन्नाग्रयणो गृह्यते छन्दाऽस्येव  
तद्वि वाहयति प्र वस्यसो विवाहमाप्नोति य एवं वेदार्थो देवताभ्य  
एव यज्ञे संविदं दधाति तस्मादिदमन्योन्यस्मै ददाति॥ (३३)

एतद्वै पञ्चमेऽहन्नैष्ठिकं एतद्गृह्यते यज्ञस्य पञ्चममन्यस्मा एकंश्च॥७॥ [८]

प्रजापतिरकामयत् प्र जायेयेति स एतं द्वादशरात्रमपश्यत्तमाहरत्  
ततो वै स प्राजायत् यः कामयेत् प्र जायेयेति स द्वादशरात्रेण  
यजेत् प्रैव जायते ब्रह्मवादिनो वदन्त्यग्निष्टोमप्रायणा यज्ञा अथ  
कस्मादतिरात्रः पूर्वः प्र युज्यत इति चक्षुषी वा एते यज्ञस्य  
यदतिरात्रौ कनीनिके अग्निष्टोमौ यत् (३४)

अग्निष्टोमं पूर्वं प्रयुञ्जीरन्बहिर्धा कनीनिके दध्युस्तस्मादतिरात्रः  
 पूर्वः प्रयुज्यते चक्षुषी एव यज्ञे धित्वा मध्यतः कनीनिके प्रति दधति  
 यो वै गायत्रीं ज्योतिःपक्षां वेद ज्योतिषा भासा सुवर्गं लोकमेति  
 यावग्निष्टोमौ तौ पक्षौ येऽन्तरेऽष्टाबुक्थ्याः स आत्मैषा वै गायत्री  
 ज्योतिःपक्षा य एवं वेद ज्योतिषा भासा सुवर्गं लोकम् (३५)

एति प्रजापतिर्वा एष द्वादशधा विहितो यद्वादशरात्रो  
 यावतिरात्रौ तौ पक्षौ येऽन्तरेऽष्टाबुक्थ्याः स आत्मा प्रजा-  
 पतिर्वावैष सन्त्सद्ध वै सत्रेण स्पृणोति प्राणा वै सत्प्राणानेव  
 स्पृणोति सर्वासां वा एते प्रजानां प्राणैरासते ये सत्रमासते  
 तस्मात्पृच्छन्ति किमेते सत्रिण इति प्रियः प्रजानामुत्थितो भवति  
 य एवं वेद॥ (३६)

अग्निष्टोमौ यत्सुवर्गं लोकं प्रियः प्रजानां पञ्च च॥३॥ ————— [९]

न वा एषोऽन्यतोवैश्वानरः सुवर्गाय लोकाय प्राभवदूर्ध्वो ह वा  
 एष आतंत आसीत्ते देवा एतं वैश्वानरं पर्योहन्त्सुवर्गस्य लोकस्य  
 प्रभूत्या ऋतवो वा एतेन प्रजापतिमयाजयन्तेष्वार्धोदधि तदृध्नोति  
 ह वा ऋत्विक्षु य एवं विद्वान्द्वादशाहेन यजते तेऽस्मिन्नेच्छन्त स  
 रसमहं वसन्ताय प्रायच्छत् (३७)

यवं ग्रीष्मायौषधीर्वरुषाभ्यो ब्रीहीञ्छुरदे माषतिलौ  
 हेमन्तशिशिराभ्यान्तेनेन्द्रं प्रजापतिरयाजयत्ततो वा इन्द्र

इन्द्रोऽभवत्तस्मादाहुरानुजावरस्य यज्ञ इति स ह्येतेनाग्रेऽयं जतैष  
ह वै कुणपमत्ति यः सत्रे प्रतिगृह्णाति पुरुषकुणपमंश्चकुणपङ्गौर्वा  
अन्नं येन पात्रेणान्नं बिभ्रति यत्तन्न निर्णेनिजति ततोऽधि (३८)

मलं जायत एकं एव यं जेतैको हि प्रजापतिराध्वोद्वादश  
रात्रीर्दीक्षितः स्याद्वादश मासाः संवत्सरः संवत्सरः प्रजापतिः  
प्रजापतिर्वैष एष ह त्वे जायते यस्तपसोऽधि जायते चतुर्धा वा  
एतास्तिस्त्रस्तिस्त्रो रात्रयो यद्वादशोपसदो याः प्रथमा यज्ञं ताभिः  
सम्भरति या द्वितीया यज्ञं ताभिरा रभते (३९)

यास्तृतीयाः पात्राणि ताभिर्निर्णेनित्ते याश्चतुर्थीरपि  
ताभिरात्मानमन्तरतः शुन्धते यो वा अस्य पशुमत्ति मांसं  
सोऽति यः पुरोडाशं मस्तिष्कं स यः परिवापं पुरीषं स  
य आज्यं मज्जानं स यः सोमं स्वेदं सोऽपि ह वा  
अस्य शीर्षण्या निष्पदः प्रति गृह्णाति यो द्वादशाहे प्रतिगृह्णाति  
तस्माद्द्वादशाहेन न याज्यं पाप्मनो व्यावृत्त्यै॥ (४०)

अयच्छुदधि रभते द्वादशाहेन चत्वारि च॥४॥ [१०]

एकस्मै स्वाहा द्वाभ्यां स्वाहा त्रिभ्यः स्वाहा चतुर्भ्यः  
स्वाहा पञ्चभ्यः स्वाहा षड्भ्यः स्वाहा सप्तभ्यः स्वाहाऽष्टाभ्यः  
स्वाहा नवभ्यः स्वाहा दशभ्यः स्वाहाैकादशभ्यः स्वाहा द्वादशभ्यः  
स्वाहा त्रयोदशभ्यः स्वाहा चतुर्दशभ्यः स्वाहा पञ्चदशभ्यः स्वाहा

षोडशभ्यः स्वाहा सप्तदशभ्यः स्वाहा ऽष्टादशभ्यः स्वाहैकान्न  
 विंशत्यै स्वाहा नवविंशत्यै स्वाहैकान्न चत्वारिंशते स्वाहा  
 नवचत्वारिंशते स्वाहैकान्न षष्ठ्यै स्वाहा नवषष्ठ्यै स्वाहैकान्नाशीत्यै  
 स्वाहा नवाशीत्यै स्वाहैकान्न शताय स्वाहा शताय स्वाहा द्वाभ्यां  
 शताभ्यां स्वाहा सर्वस्मै स्वाहा ॥ (४१)

नवचत्वारिंशते स्वाहैकान्नैकविंशतिश्च ॥ १ ॥ [११]

एकस्मै स्वाहा त्रिभ्यः स्वाहा पञ्चभ्यः स्वाहा सप्तभ्यः स्वाहा  
 नवभ्यः स्वाहैकादशभ्यः स्वाहा त्रयोदशभ्यः स्वाहा पञ्चदशभ्यः  
 स्वाहा सप्तदशभ्यः स्वाहैकान्न विंशत्यै स्वाहा नवविंशत्यै  
 स्वाहैकान्न चत्वारिंशते स्वाहा नवचत्वारिंशते स्वाहैकान्न षष्ठ्यै  
 स्वाहा नवषष्ठ्यै स्वाहैकान्नाशीत्यै स्वाहा नवाशीत्यै स्वाहैकान्न  
 शताय स्वाहा शताय स्वाहा सर्वस्मै स्वाहा ॥ (४२)

एकस्मै त्रिभ्यः पञ्चाशत् ॥ १ ॥ [१२]

द्वाभ्यां स्वाहा चतुर्भ्यः स्वाहा षड्भ्यः स्वाहा ऽष्टाभ्यः स्वाहा  
 दशभ्यः स्वाहा द्वादशभ्यः स्वाहा चतुर्दशभ्यः स्वाहा षोडशभ्यः  
 स्वाहा ऽष्टादशभ्यः स्वाहा विंशत्यै स्वाहा ऽष्टानवत्यै स्वाहा शताय  
 स्वाहा सर्वस्मै स्वाहा ॥ (४३)

द्वाभ्यामष्टानवत्यै षड्विंशतिः ॥ १ ॥ [१३]

त्रिभ्यः स्वाहा पञ्चभ्यः स्वाहा सप्तभ्यः स्वाहा नवभ्यः

स्वाहा॑काद॒शभ्यः॑ स्वाहा॑ त्रयोद॒शभ्यः॑ स्वाहा॑ पञ्चद॒शभ्यः॑ स्वाहा॑  
 सप्तद॒शभ्यः॑ स्वाहा॑कान्न॒ विंश॑त्यै स्वाहा॑ नव॑विंशत्यै स्वाहा॑कान्न  
 च॑त्वारिं॒शते॑ स्वाहा॑ नव॑चत्वारिं॒शते॑ स्वाहा॑कान्न ष॒ष्ठ्यै स्वाहा॑  
 नव॑षष्ठ्यै स्वाहा॑कान्नाशी॒त्यै स्वाहा॑ नवा॑शीत्यै स्वाहा॑कान्न श॒ताय॑  
 स्वाहा॑ श॒ताय॑ स्वाहा॑ सर्व॑स्मै स्वाहा॑॥ (४४)

त्रिभ्योऽष्टाचत्वारिंशत्॥१॥ \_\_\_\_\_ [१४]

च॒तुर्भ्यः॑ स्वाहा॑ऽष्टाभ्यः॑ स्वाहा॑ द्वाद॒शभ्यः॑ स्वाहा॑ षोड॒शभ्यः॑  
 स्वाहा॑ विंश॑त्यै स्वाहा॑ षण्ण॑वत्यै स्वाहा॑ श॒ताय॑ स्वाहा॑ सर्व॑स्मै  
 स्वाहा॑॥ (४५)

चतुर्भ्यः षण्णवत्यै षोडश॥१॥ \_\_\_\_\_ [१५]

प॒ञ्चभ्यः॑ स्वाहा॑ द॒शभ्यः॑ स्वाहा॑ पञ्चद॒शभ्यः॑ स्वाहा॑ विंश॑त्यै  
 स्वाहा॑ पञ्च॑नवत्यै स्वाहा॑ श॒ताय॑ स्वाहा॑ सर्व॑स्मै स्वाहा॑॥ (४६)

पञ्चभ्यः पञ्चनवत्यै चतुर्दश॥१॥ \_\_\_\_\_ [१६]

द॒शभ्यः॑ स्वाहा॑ विंश॑त्यै स्वाहा॑ त्रिं॒शते॑ स्वाहा॑ चत्वारिं॒शते॑  
 स्वाहा॑ पञ्चा॒शते॑ स्वाहा॑ ष॒ष्ठ्यै स्वाहा॑ सप्त॑त्यै स्वाहा॑ऽशीत्यै स्वाहा॑  
 नव॑त्यै स्वाहा॑ श॒ताय॑ स्वाहा॑ सर्व॑स्मै स्वाहा॑॥ (४७)

दशभ्यो द्वाविंशतिः॥१॥ \_\_\_\_\_ [१७]

विंश॑त्यै स्वाहा॑ चत्वारिं॒शते॑ स्वाहा॑ ष॒ष्ठ्यै स्वाहा॑ऽशीत्यै

स्वाहा॑ श॒ताय॒ स्वाहा॑ सर्व॒स्मै स्वाहा॑॥ (४८)

वि॒श॒त्यै द्वाद॑श॥१॥ ————— [१८]

प॒ञ्चा॒शते॒ स्वाहा॑ श॒ताय॒ स्वाहा॑ द्वा॒भ्यां॑ श॒ताभ्या॑ः स्वाहा॑  
त्रि॒भ्यः श॒तेभ्यः॑ स्वाहा॑ च॒तुर्भ्यः॑ श॒तेभ्यः॑ स्वाहा॑ प॒ञ्चभ्यः॑ श॒तेभ्यः॑  
स्वाहा॑ ष॒ड्भ्यः॑ श॒तेभ्यः॑ स्वाहा॑ स॒प्तभ्यः॑ श॒तेभ्यः॑ स्वाहा॑ ऽष्टा॑भ्यः  
श॒तेभ्यः॑ स्वाहा॑ न॒वभ्यः॑ श॒तेभ्यः॑ स्वाहा॑ स॒हस्रा॑य॒ स्वाहा॑ सर्व॒स्मै  
स्वाहा॑॥ (४९)

प॒ञ्चा॒शते॒ द्वात्रि॑ंशत्॥१॥ ————— [१९]

श॒ताय॒ स्वाहा॑ स॒हस्रा॑य॒ स्वाहा॑ ऽयु॒ताय॒ स्वाहा॑ नि॒युता॑य॒  
स्वाहा॑ प्र॒युता॑य॒ स्वाहा॑ ऽर्बु॒दाय॒ स्वाहा॑ न्य॒र्बुदा॑य॒ स्वाहा॑ स॒मुद्रा॑य॒  
स्वाहा॑ म॒ध्याय॒ स्वाहा॑ ऽन्ता॑य॒ स्वाहा॑ प॒रार्धा॑य॒ स्वाहा॑ ष॒से स्वाहा॑  
व्यु॒ष्ट्यै स्वाहा॑ दे॒ष्यते॒ स्वाहा॑ द्य॒ते स्वाहा॑ दि॒ताय॒ स्वाहा॑ सु॒वर्गा॑य॒  
स्वाहा॑ लो॒काय॒ स्वाहा॑ सर्व॒स्मै स्वाहा॑॥ (५०)

श॒ताय॒ष्टात्रि॑ंशत्॥१॥ ————— [२०]

सा॒ध्याः ष॑ड्रा॒त्रं कुं॑सु॒रुवि॑न्दः स॒प्त॒रात्रं॑ बृ॒हस्प॑तिर॒ष्ट॒रात्रं॑ प्र॒जाप॑तिस्ताः, क्षु॒ध्नव॑रा॒त्रं प्र॒जाप॑तिर॒काम॑यत्  
द॒शहो॑तारमृत॒वं ऐ॒न्द्रवा॑य॒वाग्रान्ना॑य॒त्रो वै प्र॒जाप॑तिः स द्वा॒दश॑ रा॒त्रं न वा एक॑स्मा॒ एक॑स्मै द्वा॒भ्यां त्रि॑भ्यश्च॒तुर्भ्यः॑  
प॒ञ्चभ्यो॑ द॒शभ्यो॑ वि॒श॒त्यै प॑ञ्चाश॒ते श॒ताय॒ वि॒श॒तिः॥२०॥

सा॒ध्या अ॑स्मा इ॒मे लो॒का गा॑य॒त्रं वै तृ॒तीय॑मेक॒स्मै प॑ञ्चाशत्॥५०॥

सा॒ध्याः सर्व॑स्मै स्वाहा॑॥



हरिः ॐ ॥

॥ कृष्ण-यजुर्वेदीय-तैत्तिरीय-संहितायां सप्तमकाण्डे द्वितीयः प्रश्नः  
समाप्तः ॥ ७-२ ॥

## ॥तृतीयः प्रश्नः॥

### ॥तैत्तिरीयसंहितायां सप्तमकाण्डे तृतीयः प्रश्नः॥

प्रजवं वा एतेन यन्ति यदशममहः पापावहीयं वा एतेन भवन्ति  
यदशममहुर्यो वै प्रजवं यतामपथेन प्रतिपद्यते यः स्थाणुः हन्ति  
यो भ्रेषं न्येति स हीयते स यो वै दशमेऽहन्नविवाक्य उपहन्यते  
स हीयते तस्मै य उपहताय व्याह तमेवान्वारभ्य समश्नुतेऽथ  
यो व्याह सः (१)

हीयते तस्मादशमेऽहन्नविवाक्य उपहताय न व्युच्यमथो  
खल्वाहुर्यज्ञस्य वै समृद्धेन देवाः सुवर्गं लोकमायन् यज्ञस्य  
व्युद्धेनासुरान्पराभावयन्निति यत्खलु वै यज्ञस्य समृद्धं  
तद्यजमानस्य यद्वृद्धं तद्भातृव्यस्य स यो वै दशमेऽहन्नविवाक्य  
उपहन्यते स एवाति रेचयति ते ये बाह्या दशीकवः (२)

स्युस्ते वि ब्रूयुर्यदि तत्र न विन्देयुरन्तःसदसाद्व्युच्यं यदि  
तत्र न विन्देयुर्गृहपतिना व्युच्यन्तद्व्युच्यमेवाथ वा एतत्सर्पराज्ञियां  
ऋग्भिः स्तुवन्तीयं वै सर्पतो राज्ञी यद्वा अस्यां किं चार्चन्ति  
यदानृचुस्तेनेयः सर्पराज्ञी ते यदेव किं च वाचानृचुर्यदतो-  
ऽध्यर्चितारः (३)

तदुभयमात्वावरुध्योत्तिष्ठामेति ताभिर्मनसा स्तुवते न वा  
इमामंश्वरथो नाश्वतरीरथः सद्यः पर्याप्तुमर्हति मनो वा इमाः

सद्यः पर्याप्तुमर्हति मनः परिभवितुमथ ब्रह्म वदन्ति परिमिता  
वा ऋचः परिमितानि सामानि परिमितानि यजूंष्यथैतस्यैवान्तो  
नास्ति यद्ब्रह्म तत्प्रतिगृणत आ चक्षीत स प्रतिगरः॥ (४)

व्याहु स दंशीकवोर्ऽर्चितारः स एकञ्च॥४॥ [१]

ब्रह्मवादिनो वदन्ति किं द्वादशाहस्य प्रथमेनाहर्त्विजां  
यजमानो वृङ्क्ते इति तेज इन्द्रियमिति किं द्वितीयेनेति  
प्राणानन्नाद्यमिति किं तृतीयेनेति त्रीणिमाल्लोणुकानिति किं  
चतुर्थेनेति चतुष्पदः पशूनिति किं पञ्चमेनेति पञ्चाक्षरां  
पङ्क्तिमिति किं षष्ठेनेति षडृतूनिति किं सप्तमेनेति सप्तपदां  
शक्करीमिति (५)

किमष्टमेनेत्यष्टाक्षरां गायत्रीमिति किं नवमेनेति  
त्रिवृतं स्तोममिति किं दशमेनेति दशाक्षरां विराजमिति  
किमेकादशेनेत्येकादशाक्षरां त्रिष्टुभमिति किं द्वादशेनेति  
द्वादशाक्षरां जगतीमित्येतावद्वा अस्ति यावदेतद्यावदेवास्ति तदेषां  
वृङ्क्ते॥ (६)

शक्करीमित्येकचत्वारिंशच्च॥२॥ [२]

एष वा आप्तो द्वादशाहो यत् त्रयोदशरात्रः संमानं  
ह्येतदहर्ह्यत्प्रायणीयंश्चोदयनीयंश्च त्र्यतिरात्रो भवति त्रय इमे  
लोका एषां लोकानामात्मै प्राणो वै प्रथमोऽतिरात्रो व्यानो  
द्वितीयोऽपानस्तृतीयः प्राणापानोदानेष्वेवान्नाद्ये प्रति तिष्ठन्ति

सर्वमायुर्यन्ति य एवं विद्वांसस्रयोदशरात्रमासते तदाहुर्वाग्वा  
एषा वितता (७)

यद्वादशाहस्तां विच्छिन्द्यन्मध्यैऽतिरात्रं कुर्युरुपदासुका  
गृहपतेर्वाख्यादुपरिष्ठाच्छन्दोमानां महाव्रतं कुर्वन्ति सन्ततामेव  
वाचमव रुन्धतेऽनुपदासुका गृहपतेर्वाग्भवति पशवो वै छन्दोमा  
अन्नं महाव्रतं यदुपरिष्ठाच्छन्दोमानां महाव्रतं कुर्वन्ति पशुषु  
चैवान्नाद्ये च प्रति तिष्ठन्ति॥ (८)

वितता त्रिचत्वारिंशच्च॥२॥ [३]

आदित्या अकामयन्तोभयौलोकयोर्ऋध्रुयामेति त  
एतं चतुर्दशरात्रमपश्यन्तमाहरन्तेनायजन्त ततो वै त  
उभयौलोकयोर्ऋध्रुवन्नस्मिंश्चामुष्मिंश्च य एवं विद्वांसश्चतुर्दशरात्रम  
उभयौरेव लोकयोर्ऋध्रुवन्त्यस्मिंश्चामुष्मिंश्च चतुर्दशरात्रो भवति  
सप्त ग्राम्या ओषधयः सप्तारण्या उभयीषामवरुद्ध्यै यत्पराचीनानि  
पृष्ठानि (९)

भवन्त्यमुमेव तैर्लोकमभि जयन्ति यत्प्रतीचीनानि पृष्ठानि  
भवन्तीममेव तैर्लोकमभि जयन्ति त्रयस्त्रिंशौ मध्यतः स्तोमौ  
भवतः साम्राज्यमेव गच्छन्त्यधिराजौ भवतोऽधिराजा एव  
समानानां भवन्त्यतिरात्रावभितौ भवतः परिगृहीत्यै॥ (१०)

पृष्ठानि चतुस्त्रिंशच्च॥२॥ [४]

प्रजापतिः सुवर्गं लोकमैतत् देवा अन्वायन्तानादित्याश्च  
 पशवश्चान्वायन्ते देवा अब्रुवन् यान्पशूनुपार्जीविष्म त इमे-  
 ऽन्वाग्मन्निति तेभ्य एतं चतुर्दशरात्रं प्रत्यौहन्त आदित्याः पृष्ठैः  
 सुवर्गं लोकमारोहन्त्यहाभ्यामस्मिँल्लोके पशून्प्रत्यौहन्पृष्ठैरादित्या  
 अमुष्मिँल्लोक आर्ध्ववन्त्यहाभ्यामस्मिन् (११)

लोके पशवो य एवं विद्वांसश्चतुर्दशरात्रमासन्त उभयोरेव  
 लोकयोर्ऋध्रुवन्त्यस्मिँश्चामुष्मिँश्च पृष्ठैरेवामुष्मिँल्लोक ऋध्रुवन्ति  
 त्र्यहाभ्यामस्मिँल्लोके ज्योतिर्गौरायुरिति त्र्यहो भवतीयं वाव  
 ज्योतिरन्तरिक्षं गौरसावायुरिमानेव लोकानभ्यारोहन्ति  
 यदन्यतः पृष्ठानि स्युर्विविधः स्यान्मध्ये पृष्ठानि भवन्ति  
 सविवधत्वाय (१२)

ओजो वै वीर्यं पृष्ठान्योज एव वीर्यं मध्यतो दधते  
 बृहद्रथन्तराभ्यां यन्तीयं वाव रथन्तरमसौ बृहदाभ्यामेव यन्त्यथो  
 अनयोरेव प्रति तिष्ठन्त्येते वै यज्ञस्याञ्जसायनी स्मृती ताभ्यामेव  
 सुवर्गं लोकं यन्ति पराञ्चो वा एते सुवर्गं लोकमभ्यारोहन्ति  
 ये पराचीनानि पृष्ठान्युपयन्ति प्रत्यङ्महो भवति प्रत्यवरूढ्या  
 अथो प्रतिष्ठित्या उभयोर्लोकयोर्ऋद्धोत्तिष्ठन्ति चतुर्दशैतास्तासां  
 या दश दशाक्षरा विराडन्न विराड्विराजैवान्नाद्यमव रुन्धते  
 याश्चतस्रश्चतस्रो दिशो दिक्ष्वेव प्रति तिष्ठन्त्यतिरात्रावभितो भवतः

परिगृहीत्यै॥ (१३)

आर्ध्ववज्रहान्यामस्मिन्सर्वविवधत्वाय प्रतिष्ठित्या एकत्रिंशच्च॥३॥ [५]

इन्द्रो वै सदृङ्क्ष्वताभिरासीत्स न व्यावृतमगच्छत्स प्रजा-  
पतिमुपाधावत्तस्मा एतं पञ्चदशरात्रं प्रायच्छत्तमाहरत् तेनायजत  
ततो वै सौऽन्याभिर्देवताभिर्यावृतमगच्छद्य एवं विद्वांसः  
पञ्चदशरात्रमासते व्यावृतमेव पाप्मना भ्रातृव्येण गच्छन्ति  
ज्योतिर्गौरायुरिति त्र्यहो भवतीयं वाव ज्योतिरन्तरिक्षम् (१४)

गौरसावायुरेष्वेव लोकेषु प्रति तिष्ठन्त्यसत्रं वा एतद्यदच्छन्दोमं  
यच्छन्दोमा भवन्ति तेन सत्रं देवता एव पृष्ठैरव रुन्धते  
पशूच्छन्दोमैरोजो वा वीर्यं पृष्ठानि पशवश्छन्दोमा ओजस्येव  
वीर्यं पशुषु प्रति तिष्ठन्ति पञ्चदशरात्रो भवति पञ्चदशो वज्रो  
वज्रमेव भ्रातृव्येभ्यः प्र हरन्त्यतिरात्रावभितो भवत इन्द्रियस्य  
परिगृहीत्यै॥ (१५)

अन्तरिक्षमिन्द्रियस्यैकञ्च॥२॥ [६]

इन्द्रो वै शिथिल इवाप्रतिष्ठित आसीत्सोऽसुरेभ्यो-  
ऽबिभेत्स प्रजापतिमुपाधावत्तस्मा एतं पञ्चदशरात्रं वज्रं प्रायच्छत्  
तेनासुरान्पराभाव्य विजित्य श्रियमगच्छदग्निष्टुता पाप्मानं  
निरदहत पञ्चदशरात्रेणौजो बलमिन्द्रियं वीर्यमात्मन्नधत्त य एवं  
विद्वांसः पञ्चदशरात्रमासते भ्रातृव्यानेव पराभाव्य विजित्य श्रियं

गच्छन्त्यग्निष्टुतां पाप्मानं निः (१६)

दहन्ते पञ्चदशरात्रेणौजो बलमिन्द्रियं वीर्यमात्मन्दधत एता  
एव पञ्चव्याः पञ्चदश वा अर्धमासस्य रात्रयोऽर्धमासशः संवत्सर  
आप्यते संवत्सरं पशवोऽनु प्र जायन्ते तस्मात्पञ्चव्या एता एव  
सुवर्ग्याः पञ्चदश वा अर्धमासस्य रात्रयोऽर्धमासशः संवत्सर  
आप्यते संवत्सरः सुवर्गो लोकस्तस्मात्सुवर्ग्या ज्योतिर्गौरायुरिति  
त्र्यहो भवतीयं वाव ज्योतिरन्तरिक्षम् (१७)

गौरसावायुरिमानेव लोकानभ्यारोहन्ति यदन्यतः पृष्ठानि  
स्युर्विविधः स्यान्मध्ये पृष्ठानि भवन्ति सविवधत्वायौजो वै वीर्यं  
पृष्ठान्योज एव वीर्यं मध्यतो दधते बृहद्रथन्तराभ्यां यन्तीयं वाव  
रथन्तरमसौ बृहदाभ्यामेव यन्त्यथो अनयोरेव प्रति तिष्ठन्त्येते वै  
यज्ञस्याञ्जसायनी स्रुती ताभ्यामेव सुवर्गं लोकम् (१८)

यन्ति पराञ्चो वा एते सुवर्गं लोकमभ्यारोहन्ति ये पराचीनानि  
पृष्ठान्युपयन्ति प्रत्यङ्महो भवति प्रत्यवरूढ्या अथो प्रतिष्ठित्या  
उभयोर्लोकयोर्ऋद्धोत्तिष्ठन्ति पञ्चदशैतास्तासां या दश दशाक्षरा  
विराडन्न विराड्विराजैवान्नाद्यमव रुन्धते याः पञ्च पञ्च दिशो दिक्ष्वेव  
प्रति तिष्ठन्त्यतिरात्रावभितो भवत इन्द्रियस्य वीर्यस्य प्रजायै पशूनां  
परिगृहीत्यै॥ (१९)

गच्छन्त्यग्निष्टुतां पाप्मानन्निरन्तरिक्षं लोकं प्रजायै द्वे च॥४॥ [७]

प्रजापतिरकामयतान्नादः स्यामिति स एत९ सप्तदशरात्रमपश्यत्  
ततो वै सौ॑ऽन्नादो॑ऽभवद्य ए॒वं वि॒द्वा९सः॑ सप्तदशरात्रमासतेऽन्नादा  
ए॒व भ॑वन्ति पश्चा॒हो भ॑वति पञ्च॒ वा ऋ॒तवः॑ सं॒वत्स॒र ऋ॒तुष्वे॒व  
सं॒वत्स॒रे प्र॒ति तिष्ठ॑न्त्यथो पश्चा॑क्षरा प॒ङ्क्तिः पाङ्क्तौ॑ य॒ज्ञो य॒ज्ञमे॒वाव  
रु॒न्धते॑ऽसत्रं॒ वा ए॒तत् (२०)

यद॑च्छन्दो॒मं यच्छ॑न्दो॒मा भ॑वन्ति तेन॑ स॒त्रं दे॒वता॑ ए॒व पृ॒ष्ठैर॑व  
रु॒न्धते॑ प॒शूञ्छ॑न्दो॒मैरोजो॑ वै वी॒र्यं॑ पृ॒ष्ठानि॑ प॒शव॑श्छन्दो॒मा ओज॑स्ये॒व  
वी॒र्यं॑ प॒शुषु॑ प्र॒ति तिष्ठ॑न्ति सप्तदशरा॒त्रो भ॑वति सप्तद॒शः प्र॒जाप॑तिः  
प्र॒जाप॑ते॒रास्या॑ अतिरा॒त्राव॑भितो॑ भवतो॒ऽन्नाद्य॑स्य परिगृहीत्यै॥ (२१)

एतत्सप्तत्रिंशच्च॥२॥ [८]

सा वि॒राड्वि॒क्रम्या॑तिष्ठद्ब्रह्म॑णा दे॒वेष्व॒न्नेना॑सुरे॒षु ते दे॒वा  
अ॑कामयन्तो॒भय॑९ सं वृ॑ञ्जीमहि ब्रह्म॒ चान्नं॑ चेति॒ त ए॒ता  
वि॑९शति९ रात्री॑रपश्यन्ततो॒ वै त उ॒भय॑९ सम॑वृ॒जत॑ ब्रह्म॒ चान्नं॑  
च ब्रह्म॑वर्च॒सिनो॑ऽन्नादा॒ अ॒भवन्॑ य ए॒वं वि॒द्वा९स ए॒ता आ॑सत  
उ॒भय॑मे॒व सं वृ॑जते ब्रह्म॒ चान्नं॑ च (२२)

ब्रह्म॑वर्च॒सिनो॑ऽन्नादा॒ भ॑वन्ति द्वे॒ वा ए॒ते वि॒राजौ॑ तयो॒रे॒व ना॒ना  
प्र॒ति तिष्ठ॑न्ति वि॑९शो वै पुरु॑षो दश॒ हस्त्या॑ अ॒ङ्गुल॑यो दश॒ पद्मा॑  
यावा॑ने॒व पुरु॑षस्तमा॒त्वोत्तिष्ठ॑न्ति ज्योति॒र्गौरा॑युरिति॒ त्र्य॒हा भ॑वन्ती॒यं



वाव ज्योतिरन्तरिक्षं गौरसावायुरिमानेव लोकानभ्यारोहन्त्यभिपूर्वं  
त्र्यहा भवन्त्यभिपूर्वमेव सुवर्गम् (२३)

लोकमभ्यारोहन्ति यदन्यतः पृष्ठानि स्युर्विविधः स्यान्मध्ये  
पृष्ठानि भवन्ति सविवधत्वायोजो वै वीर्यं पृष्ठान्योज एव वीर्यं  
मध्यतो दधते बृहद्रथन्तराभ्यां यन्तीयं वाव रथन्तरमसौ  
बृहदाभ्यामेव यन्त्यथो अनयोरेव प्रति तिष्ठन्त्येते वै  
यज्ञस्याञ्जसायनी सुती ताभ्यामेव सुवर्गं लोकं यन्ति पराञ्चो  
वा एते सुवर्गं लोकमभ्यारोहन्ति ये पराचीनानि पृष्ठान्युपयन्ति  
प्रत्यङ्महो भवति प्रत्यवरूढ्या अथो प्रतिष्ठित्या उभयोर्लोकयोर्  
ऋद्धोत्तिष्ठन्त्यतिरात्रावभितो भवतो ब्रह्मवर्चसस्यान्नाद्यस्य  
परिगृहीत्यै॥ (२४)

वृज्जते ब्रह्म चान्नञ्च सुवर्गमेते सुवर्गत्रयोविंशतिश्च॥३॥ [९]

असावादित्योऽस्मिँल्लोक आसीत्तं देवाः पृष्ठैः परिगृह्य  
सुवर्गं लोकमंगमयन्परैरवस्तात्पर्यगृह्णन्दिवाकीर्त्येन सुवर्गे  
लोके प्रत्यस्थापयन्परैः परस्तात्पर्यगृह्णन्पृष्ठैरुपावारोहन्त्यस वा  
असावादित्योऽमुष्मिँल्लोके परैरुभयतः परिगृहीतो यत्पृष्ठानि  
भवन्ति सुवर्गमेव तैर्लोकं यजमाना यन्ति परैरवस्तात्परि गृह्णन्ति  
दिवाकीर्त्येन (२५)

सुवर्गे लोके प्रति तिष्ठन्ति परैः परस्तात्परि गृह्णन्ति

पृष्ठैरुपावरोहन्ति यत्परे परस्तान्न स्युः पराश्च सुवर्गाल्लोकात्रिष्वधेरन्  
 यदवस्तान्न स्युः प्रजा निर्दहेयुरभितो दिवाकीर्त्य परःसामानो  
 भवन्ति सुवर्ग एवैनां लोक उभयतः परिं गृह्णन्ति यजमाना  
 वै दिवाकीर्त्यं संवत्सरः परःसामानोऽभितो दिवाकीर्त्यं परः  
 सामानो भवन्ति संवत्सर एवोभयतः (२६)

प्रति तिष्ठन्ति पृष्ठं वै दिवाकीर्त्यं पार्श्वे परःसामानोऽभितो  
 दिवाकीर्त्यं परःसामानो भवन्ति तस्मादभितः पृष्ठं पार्श्वे भूयिष्ठा  
 ग्रहा गृह्यन्ते भूयिष्ठं शस्यते यज्ञस्यैव तन्मध्यतो ग्रन्थं  
 ग्रन्थन्त्यविस्रंसाय सप्त गृह्यन्ते सप्त वै शीर्षण्याः प्राणाः  
 प्राणानेव यजमानेषु दधति यत्पराचीनानि पृष्ठानि भवन्त्यमुमेव  
 तैर्लोकमभ्यारोहन्ति यदिमं लोकं न (२७)

प्रत्यवरोहेयुरुद्धा माद्यैर्युयजमानाः प्र वा मीयेरन्  
 यत्प्रतीचीनानि पृष्ठानि भवन्तीममेव तैर्लोकं प्रत्यवरोहन्त्यथो  
 अस्मिन्नेव लोके प्रति तिष्ठन्त्यनुन्मादायेन्द्रो वा अप्रतिष्ठित  
 आसीत्स प्रजापतिमुपाधावत्तस्मा एतमेकविंशतिरात्रं  
 प्रायच्छुत्तमाहरत्तेनायजत ततो वै स प्रत्यतिष्ठद्ये बहुयाजिनो-  
 ऽप्रतिष्ठिताः (२८)

स्युस्त एकविंशतिरात्रमासीरन्द्वादश मासाः पञ्चर्तवस्त्रय  
 इमे लोका असावादित्य एकविंश एतावन्तो वै देवल्लोकास्तेष्वेव

यथापूर्वं प्रति तिष्ठन्त्यसावादित्यो न व्यरोचत स प्रजा-  
 पतिमुपाधावत्तस्मा एतमेकविंशतिरात्रं प्रायच्छुत्तमाहरत्तेनायजत  
 ततो वै सौऽरोचत य एवं विद्वांस एकविंशतिरात्रमासते  
 रोचन्त एवैकविंशतिरात्रो भवति रुग्वा एकविंशो रुचमेव  
 गच्छन्त्यथो प्रतिष्ठामेव प्रतिष्ठा ह्येकविंशोऽतिरात्रावभितो  
 भवतो ब्रह्मवर्चसस्य परिगृहीत्यै॥ (२९)

गृह्णन्ति दिवाकीर्त्यैवोभयतो नाप्रतिष्ठिता आसन्त एकविंशतिश्च॥५॥ [१०]

अर्वाङ्घ्रिः सं क्रामत्वमुष्मादधि मामभि। ऋषीणां यः  
 पुरोहितः। निर्देवं निर्वीरं कृत्वा विष्कन्धं तस्मिन् हीयतां यो-  
 ऽस्मान्द्वेष्टि। शरीरं यज्ञशमलं कुसीदं तस्मिन्त्सीदतु योऽस्मान्द्वेष्टि।  
 यज्ञं यज्ञस्य यत्तेजस्तेन सं क्राम मामभि। ब्राह्मणानृत्विजो देवान्  
 यज्ञस्य तपसा ते सवाहमा हुवे। इष्टेन पक्वमुप (३०)

ते हुवे सवाहम्। सन्तौ वृञ्जे सुकृतं सं प्रजां पशून्।  
 प्रेषान्त्सामिधेनीराधारावाज्यभागावाश्रुतं प्रत्याश्रुतमा शृणामि ते।  
 प्रयाजानूयाजान्त्स्विष्टकृतमिडामाशिष आ वृञ्जे सुवः। अग्निनेद्रेण  
 सोमैः सरस्वत्या विष्णुना देवताभिः। याज्यानुवाक्याभ्यामुप  
 ते हुवे स्वाहं यज्ञमा ददे ते वर्षद्वृतम्। स्तुतं शस्त्रं प्रतिगरं  
 ग्रहमिडामाशिषः (३१)

आ वृञ्जे सुवः। पत्नीसंयाजानुप ते हुवे सवाहं समिष्टयजुरा

देदे तव। पशून्त्सुतं पुरोडाशान्त्सर्वनान्योत यज्ञम्। देवान्त्सेन्द्रानुप  
ते हुवे सवाहमग्निमुखान्त्सोमवतो ये च विश्वे॥ (३२)

उप ग्रहमिडामाशिषो द्वात्रिंशच्च॥३॥ [११]

भूतं भव्यम्भविष्यद्वषट्स्वाहा नम ऋक्साम यजुर्वषट्स्वाहा  
नमो गायत्री त्रिष्टुब्जगती वषट्स्वाहा नमः पृथिव्यन्तरिक्षं द्यौर्वषट्-  
स्वाहा नमोऽग्निर्वायुः सूर्यो वषट्स्वाहा नमः प्राणो व्यानोऽपानो  
वषट्स्वाहा नमोऽन्नं कृषिर्वृष्टिर्वषट्स्वाहा नमः पिता पुत्रः पौत्रो  
वषट्स्वाहा नमो भूर्भुवःसुवर्वषट्स्वाहा नमः॥ (३३)

भुवंश्चत्वारि च॥१॥ [१२]

आ मे गृहा भवं त्वा प्रजा म आ मां यज्ञो विशतु वीर्यावान्।  
आपो देवीर्यज्ञिया मा विशन्तु सहस्रस्य मा भूमा मा प्र हांसीत्। आ  
मे ग्रहो भवत्वा पुरोरुखस्तुतशस्त्रे मा विशतां समीचीं। आदित्या  
रुद्रा वसवो मे सदस्याः सहस्रस्य मा भूमा मा प्र हांसीत्। आ  
माग्निष्टोमो विशतुक्थ्यश्चातिरात्रो मा विशत्वापिशर्वरः। तिरोअहिया  
मा सुहता आ विशन्तु सहस्रस्य मा भूमा मा प्र हांसीत्॥ (३४)

अग्निष्टोमो विशत्वष्टादश च॥१॥ [१३]

अग्निना तपोऽन्वभवद्वाचा ब्रह्म मणिना रूपाणीन्द्रेण देवान्  
वातेन प्राणान्सूर्येण द्याश्चन्द्रमंसा नक्षत्राणि यमेन पितृनाज्ञां  
मनुष्यान्फलेन नादेयानजगरेण सर्पान्व्याघ्रेणारण्यान्पशूञ्छेनेन

पत॒त्रिणो॒ वृष्णा॑श्चानृ॒षभेण॑ गा ब॒स्तेना॒जा वृ॒ष्णिना॑वी॒र्व्रीहि॑णान्नानि  
 यवे॒नौष॑धी॒न्यग्रो॑धेन वन॒स्पती॑नुदु॒म्बरे॑णोर्जं गाय॒त्रिया॒ छन्दा॑ंसि  
 त्रिवृ॒ता स्तोमा॑न्ब्राह्म॒णेन॒ वाच॑म्॥ (३५)

ब्राह्मणेनैकञ्च॥१॥ [१४]

स्वाहा॒धिमा॑धी॒ताय॒ स्वाहा॒ स्वाहा॑धी॒तं मन॑से स्वाहा॒ स्वाहा॒  
 मनः॑ प्र॒जाप॑तये स्वाहा॒ काय॒ स्वाहा॒ कस्मै॒ स्वाहा॑ कत॒मस्मै॒  
 स्वाहा॑दित्यै स्वाहा॑दित्यै म॒ह्यै स्वाहा॑दित्यै सुमृ॒डीका॑यै स्वाहा॒  
 सर॑स्वत्यै स्वाहा॒ सर॑स्वत्यै बृह॒त्यै स्वाहा॒ सर॑स्वत्यै पाव॒कायै॒  
 स्वाहा॑ पू॒ष्णे स्वाहा॑ पू॒ष्णे प्र॑प॒थ्याय॒ स्वाहा॑ पू॒ष्णे न॒रन्धि॑षाय॒  
 स्वाहा॑ त्वष्ट्रे स्वाहा॑ त्वष्ट्रे तुरी॒पाय॒ स्वाहा॑ त्वष्ट्रे पु॒रुरू॑पाय॒ स्वाहा॑  
 विष्ण॑वे स्वाहा॒ विष्ण॑वे नि॒खुर्य॑पाय॒ स्वाहा॑ विष्ण॑वे निभू॒यपा॑य॒  
 स्वाहा॑ सर्व॒स्मै स्वाहा॑॥ (३६)

पुरु॒रूपाय॒ स्वाहा॒ दशं॑ च॥१॥ [१५]

द॒द्भ्यः स्वाहा॒ हनू॑भ्याः॒ स्वाहो॑ष्ठा॒भ्याः॒ स्वाहा॒ मुखा॑य॒ स्वाहा॒  
 नासि॑काभ्याः॒ स्वाहा॒क्षी॑भ्याः॒ स्वाहा॒ कर्णा॑भ्याः॒ स्वाहा॑ पार॒  
 इक्ष॑वोऽवा॒र्येभ्यः॒ पक्ष॑म॒भ्यः स्वाहा॑वा॒र इक्ष॑वः पा॒र्येभ्यः॒ पक्ष॑म॒भ्यः  
 स्वाहा॑ शी॒रूष्णे॒ स्वाहा॑ भ्रू॒भ्याः॒ स्वाहा॑ ल॒लाटा॑य॒ स्वाहा॑ मूर्ध्ने॒  
 स्वाहा॑ म॒स्तिष्का॑य॒ स्वाहा॑ केशे॒भ्यः स्वाहा॑ वहा॑य॒ स्वाहा॑ ग्री॒वाभ्यः॒  
 स्वाहा॑ स्क॒न्धेभ्यः॒ स्वाहा॑ की॒कसा॑भ्यः॒ स्वाहा॑ पृ॒ष्ठीभ्यः॒ स्वाहा॑

पाजस्याय स्वाहा पार्श्वभ्याः स्वाहा (३७)

अ०साभ्याः स्वाहा दोषभ्याः स्वाहा बाहुभ्याः स्वाहा  
जङ्घाभ्याः स्वाहा श्रोणीभ्याः स्वाहोरुभ्याः स्वाहाष्टीवद्ध्याः  
स्वाहा जङ्घाभ्याः स्वाहा भसदे स्वाहा शिखण्डेभ्यः स्वाहा  
वालुधानाय स्वाहाण्डाभ्याः स्वाहा शेपाय स्वाहा रेतसे स्वाहा  
प्रजाभ्यः स्वाहा प्रजननाय स्वाहा पृथ्व्यः स्वाहा शफेभ्यः स्वाहा  
लोमभ्यः स्वाहा त्वचे स्वाहा लोहिताय स्वाहा मा०साय स्वाहा  
स्नावभ्यः स्वाहास्थभ्यः स्वाहा मृङ्गभ्यः स्वाहाङ्गैभ्यः स्वाहात्मने  
स्वाहा सर्वस्मै स्वाहा॥ (३८)

पार्श्वभ्याः स्वाहा मृङ्गभ्यः स्वाहा षड्॥२॥ \_\_\_\_\_ [१६]

अ०ज्येताय स्वाहाञ्जिसक्थाय स्वाहा शितिपदे स्वाहा  
शितिककुदे स्वाहा शितिरन्ध्राय स्वाहा शितिपृष्ठाय स्वाहा  
शित्य०साय स्वाहा पुष्पकर्णाय स्वाहा शित्योष्ठाय स्वाहा  
शितिभ्रवे स्वाहा शितिभसदे स्वाहा श्वेतानूकाशाय स्वाहाञ्जये  
स्वाहा ललामाय स्वाहासितज्ञवे स्वाहा कृष्णैताय स्वाहा  
रोहितैताय स्वाहारुणैताय स्वाहेदृशाय स्वाहा कीदृशाय स्वाहा  
तादृशाय स्वाहा सदृशाय स्वाहा विसदृशाय स्वाहा सुसदृशाय  
स्वाहा रूपाय स्वाहा सर्वस्मै स्वाहा॥ (३९)

रूपाय स्वाहा द्वे च॥१॥ \_\_\_\_\_ [१७]

कृष्णाय॒ स्वाहा॑ श्वे॒ताय॒ स्वाहा॑ पि॒शङ्गाय॒ स्वाहा॑ सा॒रङ्गाय॒  
स्वाहा॑रु॒णाय॒ स्वाहा॑ गौ॒राय॒ स्वाहा॑ ब॒भ्रवे॒ स्वाहा॑ नकु॒लाय॒ स्वाहा॑  
रोहि॑ताय॒ स्वाहा॑ शो॒णाय॒ स्वाहा॑ श्या॒वाय॒ स्वाहा॑ श्या॒माय॒ स्वाहा॑  
पा॒क॒लाय॒ स्वाहा॑ सु॒रूपाय॒ स्वाहा॑नु॒रूपाय॒ स्वाहा॑ वि॒रूपाय॒ स्वाहा॑  
स॒रूपाय॒ स्वाहा॑ प्र॒ति॒रूपाय॒ स्वाहा॑ श॒बलाय॒ स्वाहा॑ क॒म॒लाय॒  
स्वाहा॑ पृ॒श्नये॒ स्वाहा॑ पृ॒श्जिस॒क्थाय॒ स्वाहा॑ सर्व॒स्मै स्वाहा॑॥ (४०)

कृष्णाय॒ षट्त्वारि॑५शत्॥१॥ \_\_\_\_\_ [१८]

ओष॑धी॒भ्यः स्वाहा॒ मूले॑भ्यः स्वाहा॒ तूले॑भ्यः स्वाहा॒ काण्डे॑भ्यः  
स्वाहा॒ वल्शे॑भ्यः स्वाहा॒ पुष्पे॑भ्यः स्वाहा॒ फले॑भ्यः स्वाहा॒ गृही॑तेभ्यः  
स्वाहा॒गृही॑तेभ्यः स्वाहा॒व॑प॒न्नेभ्यः स्वाहा॒ शया॑नेभ्यः स्वाहा॒ सर्व॒स्मै  
स्वाहा॑॥ (४१)

ओष॑धी॒भ्यश्चतुर्वि॑५शतिः॥१॥ \_\_\_\_\_ [१९]

वन॑स्पति॒भ्यः स्वाहा॒ मूले॑भ्यः स्वाहा॒ तूले॑भ्यः स्वाहा॒  
स्कन्धो॑भ्यः स्वाहा॒ शाखा॑भ्यः स्वाहा॒ पर्णे॑भ्यः स्वाहा॒ पुष्पे॑भ्यः  
स्वाहा॒ फले॑भ्यः स्वाहा॒ गृही॑तेभ्यः स्वाहा॒गृही॑तेभ्यः स्वाहा॒व॑प॒न्नेभ्यः  
स्वाहा॒ शया॑नेभ्यः स्वाहा॒ शि॒ष्टाय॒ स्वाहा॑ति॒शि॒ष्टाय॒ स्वाहा॑  
परि॑शि॒ष्टाय॒ स्वाहा॒ स॒शि॒ष्टाय॒ स्वाहा॑च्छि॒ष्टाय॒ स्वाहा॑ रि॒क्ताय॒  
स्वाहा॑रि॒क्ताय॒ स्वाहा॒ प्र॒रि॒क्ताय॒ स्वाहा॒ स॒रि॒क्ताय॒ स्वाहा॑द्रि॒क्ताय॒  
स्वाहा॑ सर्व॒स्मै स्वाहा॑॥ (४२)

वनस्पतिभ्यः स्कन्धोभ्यः शिष्टाय रिक्ताय षट्त्वारिंशत्॥१॥ [२०]

प्रजवं ब्रह्मवादिनः किमेष वा आस आदित्या उभयोः प्रजापतिरन्वायन्निन्द्रो वै सृष्टिन्द्रो वै शिथिलः  
प्रजापतिरकामयतान्नादः सा विराडसावादित्योऽर्वाङ्मूतमा मेऽग्निना स्वाहाधिन्द्र्योऽङ्ग्रेताय कृष्णायौषधीभ्यो  
वनस्पतिभ्यो विंशतिः॥२०॥

प्रजवं प्रजापतिर्यदछन्दोमन्तं हुवे सवाहमोषधीभ्यो द्विचत्वारिंशत्॥४२॥

प्रजव ९ सर्वस्मै स्वाहा॥

हरिः ॐ॥

॥कृष्ण-यजुर्वेदीय-तैत्तिरीय-संहितायां सप्तमकाण्डे तृतीयः प्रश्नः  
समाप्तः॥ ७-३॥



## ॥चतुर्थः प्रश्नः॥

### ॥तैत्तिरीयसंहितायां सप्तमकाण्डे चतुर्थः प्रश्नः॥

बृहस्पतिरकामयत् श्रन्मे देवा दधीरन्गच्छेयं पुरोधामिति स  
एतं चतुर्विंशतिरात्रमपश्यत्तमाहरत्तेनायजत् ततो वै तस्मै श्रद्धेवा  
अदधतागच्छत्पुरोधां य एवं विद्वांसश्चतुर्विंशतिरात्रमासते  
श्रद्धेभ्यो मनुष्या दधते गच्छन्ति पुरोधां ज्योतिर्गौरायुरिति त्र्यहा  
भवन्तीयं वाव ज्योतिरन्तरिक्षं गौरसावायुः (१)

इमानेव लोकानभ्यारोहन्त्यभिपूर्वं त्र्यहा भवन्त्यभिपूर्वमेव  
सुवर्गं लोकमभ्यारोहन्त्यसत्रं वा एतद्यदच्छन्दोमं यच्छन्दोमा  
भवन्ति तेन सत्रं देवता एव पृष्ठैरव रुन्धते पशूच्छन्दोमैरोजो वै  
वीर्यं पृष्ठानि पशवश्छन्दोमा ओजस्येव वीर्यं पशुषु प्रति तिष्ठन्ति  
बृहद्रथन्तराभ्यां यन्तीयं वाव रथन्तरमसौ बृहदाभ्यामेव (२)

यन्त्यथो अनयोरेव प्रति तिष्ठन्त्येते वै यज्ञस्याञ्जसायनी  
स्रुती ताभ्यामेव सुवर्गं लोकं यन्ति चतुर्विंशतिरात्रो भवति  
चतुर्विंशतिरर्धमासाः संवत्सरः संवत्सरः सुवर्गो लोकः संवत्सर  
एव सुवर्गे लोके प्रति तिष्ठन्त्यथो चतुर्विंशत्यक्षरा गायत्री  
गायत्री ब्रह्मवर्चसङ्गायत्रियैव ब्रह्मवर्चसमव रुन्धतेऽतिरात्रावभितो  
भवतो ब्रह्मवर्चसस्य परिगृहीत्यै॥ (३)

यथा वै मनुष्या एव देवा अग्रं आसन्तेऽकामयन्तावर्तिं  
पाप्मानं मृत्युमपहत्य दैवीं सःसदं गच्छेमेति त एतं  
चतुर्विंशतिरात्रमपश्यन्तमाहरन्तेनायजन्त ततो वै तेऽवर्तिं  
पाप्मानं मृत्युमपहत्य दैवीं सःसदमगच्छन् य एवं  
विद्वांसश्चतुर्विंशतिरात्रमासतेऽवर्तिमेव पाप्मानमपहत्य  
श्रियं गच्छन्ति श्रीर्हि मनुष्यस्य (४)

दैवीं सःसज्ज्योतिरतिरात्रो भवति सुवर्गस्य लोकस्यानुख्यात्यै  
पृथ्यः षडहो भवति षड्वा ऋतवः संवत्सरस्तं मासा  
अर्धमासा ऋतवः प्रविश्य दैवीं सःसदमगच्छन् य एवं  
विद्वांसश्चतुर्विंशतिरात्रमासते संवत्सरमेव प्रविश्य वस्यंसीं  
सःसदं गच्छन्ति त्रयस्त्रयस्त्रिंशा अवस्ताद्भवन्ति त्रयस्त्रयस्त्रिंशाः  
परस्तात् त्रयस्त्रिंशैरेवोभयतोऽवर्तिं पाप्मानमपहत्य दैवीं  
सःसदं मध्यतः (५)

गच्छन्ति पृष्ठानि हि दैवीं सःसज्जामि वा एतत्कुर्वन्ति यत्  
त्रयस्त्रयस्त्रिंशा अन्वञ्चो मध्येऽनिरुक्तो भवति तेनाजाम्यूर्ध्वानि  
पृष्ठानि भवन्त्यूर्ध्वाश्छन्दोमा उभाभ्यां रूपाभ्यां सुवर्गं लोकं  
यन्त्यसत्रं वा एतद्यदछन्दोमं यच्छन्दोमा भवन्ति तेन सत्रं देवता  
एव पृष्ठैरव रुन्धते पशूञ्छन्दोमैरोजो वै वीर्यं पृष्ठानि पशवः (६)

छन्दोमा ओजस्येव वीर्यं पशुषु प्रति तिष्ठन्ति त्रयस्त्रयस्त्रिंशा

अवस्ता॑द्भवन्ति॒ त्रय॑स्त्रयस्त्रि॒ंशाः प॒रस्ता॒न्मध्ये॑ पृ॒ष्ठान्युरो॒ वै  
त्रय॑स्त्रि॒ंशा आ॒त्मा पृ॒ष्ठान्या॒त्मन॑ ए॒व तद्यज॑मानाः शर्म॑ न ह्यन्ते-  
ऽना॑त्यै बृह॒द्रथन्त॑राभ्या॑ यन्ती॒यं वाव र॑थन्त॒रम॒सौ बृह॑दाभ्यामे॒व  
य॒न्त्यथो॑ अ॒नयो॑रे॒व प्रति॑ तिष्ठन्त्ये॒ते वै य॒ज्ञस्या॑ञ्ज॒साय॑नी स्मृती  
ताभ्या॑मे॒व (७)

सु॒वर्गं लो॒कं य॑न्ति॒ परा॑श्चो॒ वा ए॒ते सु॒वर्गं लो॒कम॒भ्यारो॑हन्ति॒  
ये प॑रा॒चीना॑नि पृ॒ष्ठान्यु॑प॒यन्ति॑ प्र॒त्यङ्ग॑ङ्गो भ॑वति प्र॒त्यव॑रूढ्या॒ अथो॑  
प्रति॑ष्ठित्या॒ उ॒भयो॑र्लो॒कयोर्ऋ॒द्धोत्ति॑ष्ठन्ति॒ त्रि॒वृतो॑ऽधि॒ त्रि॒वृत॑मुप॒  
यन्ति॒ स्तोमा॑ना॒ः स॒म्प॑त्यै प्र॒भवा॑य॒ ज्योति॑रग्नि॒ष्टोमो॑ भ॑वत्य॒यं  
वाव स॑ क्षयो॒ऽस्मादे॒व तेन॑ क्षया॒न्न य॑न्ति चतुर्वि॑ंशतिरा॒त्रो भ॑वति॒  
चतुर्वि॑ंशतिर॒र्धमा॑साः स॒वत्सरः॑ स॒वत्सरः॑ सु॒वर्गो लो॒कः स॒वत्सर॑  
ए॒व सु॒वर्गे लो॒के प्रति॑ तिष्ठन्त्यथो॒ चतुर्वि॑ंशत्यक्षरा॒ गाय॑त्री  
गा॒य॒त्री ब्र॑ह्मवर्च॒सङ्गा॑यत्रियै॒व ब्र॑ह्मवर्च॒सम॑व॒ रुन्ध॑तेऽतिरा॒त्राव॑भि॒तो  
भव॑तो ब्रह्मवर्च॒सस्य॑ परि॒गृही॑त्यै॥ (८)

मु॒ण्यस्य॑ म॒ध्यतः॑ प॒शव॑स्ताभ्यामे॒व स॒वत्सर॑श्चतुर्वि॑ंशतिश्च॥ ५॥ ————— [२]

ऋ॒क्षा वा इ॒यम॑लो॒मका॑सी॒त्साका॑म॒यतौ॑ष॒धीभि॑र्व॒नस्प॑तिभिः प्र  
जा॒येये॑ति सैतास्त्रि॒ंशत॑ः रा॒त्रीर॑पश्य॒त्ततो॑ वा इ॒यमो॑ष॒धीभि॑र्व॒नस्प॑तिभिः  
प्राजा॑यत॒ ये प्र॒जाका॑माः प॒शुका॑माः स्युस्त॒ एता॑ आसी॒रन्मै॒व  
जा॑यन्ते प्र॒जया॑ प॒शुभि॑रि॒यं वा अ॑क्षुध्य॒त्सैतां॑ वि॒राज॑मपश्य॒त्तामा॑त्मन्धि॒  
व॒नस्प॑ती॒न्प्रजा॑ प॒शून्तेना॑वर्धत॒ सा जे॑मानं॒ महि॑मानं॒मगच्छ॑द्य

एवं विद्वांसं एता आसन्ते विराजमेवाऽऽत्मन्धित्वाऽन्नाद्यमव  
 रुन्धते वर्धन्ते प्रजयां पशुभिर्जमानं महिमानं गच्छन्ति  
 ज्योतिरतिरात्रो भवति सुवर्गस्य लोकस्यानुख्यात्यै पृष्ठ्यः षडहो  
 भवति षड्वा ऋतवः षट्षष्ठानि पृष्ठैरेवतूनन्वारोहन्त्युत्तुभिः संवत्सरन्ते  
 संवत्सर एव (१०)

प्रति तिष्ठन्ति त्रयस्त्रिंशत् त्रयस्त्रिंशमुप यन्ति यज्ञस्य  
 सन्तत्या अथो प्रजापतिर्वै त्रयस्त्रिंशः प्रजापतिमेवा रभन्ते  
 प्रतिष्ठित्यै त्रिणवो भवति विजित्या एकविंशो भवति प्रतिष्ठित्या  
 अथो रुचमेवाऽऽत्मन्दधते त्रिवृदग्निष्टुद्धवति पाप्मानमेव तेन  
 निर्दहन्तेऽथो तेजो वै त्रिवृत्तेज एवाऽऽत्मन्दधते पञ्चदश  
 इन्द्रस्तोमो भवतीन्द्रियमेवाव (११)

रुन्धते सप्तदशो भवत्यन्नाद्यस्यावरुद्धा अथो प्रैव तेन  
 जायन्त एकविंशो भवति प्रतिष्ठित्या अथो रुचमेवाऽऽत्मन्दधते  
 चतुर्विंशो भवति चतुर्विंशतिरर्धमासाः संवत्सरः संवत्सरः  
 सुवर्गो लोकः संवत्सर एव सुवर्गे लोके प्रति तिष्ठन्त्यथो एष  
 वै विषूवान् विषूवन्तो भवन्ति य एवं विद्वांसं एता आसन्ते  
 चतुर्विंशत्पृष्ठान्युप यन्ति संवत्सर एव प्रतिष्ठाय (१२)

देवता अभ्यारोहन्ति त्रयस्त्रिंशत् त्रयस्त्रिंशमुप यन्ति  
 त्रयस्त्रिंशद्वै देवता देवतास्वेव प्रति तिष्ठन्ति त्रिणवो भवतीमे वै  
 लोकास्त्रिणव एष्वैव लोकेषु प्रति तिष्ठन्ति द्वावैकविंशौ भवतः

प्रतिष्ठित्या अथो रुचमेवाऽऽत्मन्दधते बहवः षोडशिनो भवन्ति  
तस्माद्बहवः प्रजासु वृषाणो यदेते स्तोमा व्यतिषक्ता भवन्ति  
तस्मादियमोषधीभिर्वनस्पतिभिर्व्यतिषक्ता (१३)

व्यतिषज्यन्ते प्रजायां पशुभिर्य एवं विद्वांस एता आसन्ते-  
ऽक्लृप्ता वा एते सुवर्गं लोकं यन्त्युच्चावचान् हि स्तोमानुपयन्ति  
यदेत ऊर्ध्वाः क्लृप्ताः स्तोमा भवन्ति क्लृप्ता एव सुवर्गं लोकं  
यन्त्युभयोरभ्यो लोकयोः कल्पते त्रिंशदेतास्त्रिंशदक्षरा विराडन्नं  
विराड्विराजैवान्नाद्यमव रुन्धतेऽतिरात्रावभितो भवतोऽन्नाद्यस्य  
परिगृहीत्यै॥ (१४)

ओषधीः संवत्सर एवाव प्रतिष्ठाय व्यतिषक्तैकान्नपञ्चाशच्च॥६॥ [३]

प्रजापतिः सुवर्गं लोकमैतं देवा येनयेन छन्दसानु  
प्रायुञ्जत् तेन नाप्नुवन्त एता द्वात्रिंशत् रात्रीरपश्यन्  
द्वात्रिंशदक्षरानुष्टुगानुष्टुभः प्रजापतिः स्वेनैव छन्दसा प्रजा-  
पतिमात्स्वाभ्यारुह्य सुवर्गं लोकमायन् य एवं विद्वांस एता  
आसन्ते द्वात्रिंशदेता द्वात्रिंशदक्षरानुष्टुगानुष्टुभः प्रजापतिः  
स्वेनैव छन्दसा प्रजापतिमात्स्वा श्रियं गच्छन्ति (१५)

श्रीरहि मनुष्यस्य सुवर्गो लोको द्वात्रिंशदेता द्वात्रिंशदक्षरानुष्टु  
वाचमाप्नुवन्ति सर्वे वाचो वदितारो भवन्ति सर्वे हि  
श्रियं गच्छन्ति ज्योतिर्गौरायुरिति त्र्यहा भवन्तीयं वाव

ज्योतिरन्तरिक्षं गौरसावायुरिमानेव लोकानभ्यारोहन्त्यभिपूर्वं  
त्र्यहा भवन्त्यभिपूर्वमेव सुवर्गं लोकमभ्यारोहन्ति बृहद्रथन्तराभ्यां  
यन्ति (१६)

इयं वाव रथन्तरमसौ बृहदाभ्यामेव यन्त्यथो अनयोरेव  
प्रति तिष्ठन्त्येते वै यज्ञस्याञ्जसायनी स्मृती ताभ्यामेव सुवर्गं  
लोकं यन्ति पराञ्चो वा एते सुवर्गं लोकमभ्यारोहन्ति ये  
पराचस्यहानुपयन्ति प्रत्यङ्महो भवति प्रत्यवरूढ्या अथो  
प्रतिष्ठित्या उभयोर्लोकयोर्ऋद्धोत्तिष्ठन्ति द्वात्रिंशदेतास्तासां  
यास्त्रिंशत् त्रिंशदक्षरा विराडन्नं विराड्विराजैवान्नाद्यमव रुन्धते  
ये द्वे अहोरात्रे एव ते उभाभ्यां रूपाभ्यां सुवर्गं लोकं  
यन्त्यतिरात्रावभितौ भवतः परिगृहीत्यै॥ (१७)

गच्छन्ति यन्ति त्रिंशदक्षरा द्वाविंशतिश्च॥३॥ [४]

द्वे वाव देवसुत्रे द्वादशाहश्चैव त्रयस्त्रिंशदहश्च य एवं  
विद्वांसंस्त्रयस्त्रिंशदहमासंते साक्षादेव देवता अभ्यारोहन्ति  
यथा खलु वै श्रेयानभ्यारूढः कामयते तथा करोति  
यद्यवविध्यति पापीयान्भवति यदि नावविध्यति सदृड्य  
एवं विद्वांसंस्त्रयस्त्रिंशदहमासंते वि पाप्मना भ्रातृव्येणा  
वर्तन्तेऽहर्भाजो वा एता देवा अग्र आहरन् (१८)

अहरेकोऽभजताहरेकस्ताभिर्वै ते प्रबाहुगार्ध्वन् य एवं  
विद्वांसंस्त्रयस्त्रिंशदहमासंते सर्व एव प्रबाहुगृध्वन्ति सर्वे

ग्रामणीयं प्राप्नुवन्ति पञ्चाहा भवन्ति पञ्च वा ऋतवः संवत्सर  
 ऋतुष्वेव संवत्सरे प्रति तिष्ठन्त्यथो पञ्चाक्षरा पङ्क्तिः पाङ्क्तौ  
 यज्ञ यज्ञमेवाव रुन्धते त्रीण्यांश्चिनानि भवन्ति त्रय इमे लोका  
 एषु (१९)

एव लोकेषु प्रति तिष्ठन्त्यथो त्रीणि वै यज्ञस्यैन्द्रियाणि  
 तान्येवाव रुन्धते विश्वजिद्धवत्यन्नाद्यस्यावरुद्धौ सर्वपृष्ठो भवति  
 सर्वस्याभिजित्यै वाग्वै द्वादशाहो यत्पुरस्ताद्द्वादशाहमुपेयुरनांतां  
 वाचमुपेयुरुपदासुकैषां वाख्यादुपरिष्ठाद्द्वादशाहमुप यन्त्याप्तामेव  
 वाचमुप यन्ति तस्मादुपरिष्ठाद्वाचा वदामोऽवान्तरम् (२०)

वै दशरात्रेण प्रजापतिः प्रजा असृजत् यदशरात्रो  
 भवति प्रजा एव तद्यजमानाः सृजन्त एतां ह वा  
 उदङ्कः शौल्बायनः सत्रस्यर्द्धिमुवाच यदशरात्रो यदशरात्रो  
 भवति सत्रस्यर्द्धा अथो यदेव पूर्वेष्वहःसु विलोम क्रियते  
 तस्यैवैषा शान्तिर्द्विनीका वा एता रात्रयो यजमाना  
 विश्वजिह्वसहातिरात्रेण पूर्वाः षोडश सहातिरात्रेणोत्तराः षोडश  
 य एवं विद्वांसंस्त्रयस्त्रिंशद्दहमासन्त ऐषां द्विनीका प्रजा  
 जायतेऽतिरात्रावभितौ भवतः परिगृहीत्यै॥ (२१)

अहरत्रेष्वावन्तरं षोडश सह सप्तदश च॥४॥

[५]

आदित्या अकामयन्त सुवर्गं लोकमियामेति ते

सुवर्गं लोकं न प्राजानन्त्र सुवर्गं लोकमायन्त एतः  
 षट्त्रिंशद्रात्रमपश्यन्तमाहरन्तेनायजन्त ततो वै ते सुवर्गं  
 लोकं प्राजानन्त्रसुवर्गं लोकमायन् य एवं विद्वांसः  
 षट्त्रिंशद्रात्रमासते सुवर्गमेव लोकं प्र जानन्ति सुवर्गं  
 लोकं यन्ति ज्योतिरतिरात्रः (२२)

भवति ज्योतिरेव पुरस्ताद्वधते सुवर्गस्य लोकस्यानुख्यात्यै  
 षड्हा भवन्ति षड्हा ऋतवं ऋतुष्वेव प्रति तिष्ठन्ति चत्वारो  
 भवन्ति चतस्रो दिशो दिक्ष्वेव प्रति तिष्ठन्त्यसत्रं वा एतद्यदच्छन्दोमं  
 यच्छन्दोमा भवन्ति तेन सत्रं देवता एव पृष्ठैरवं रुन्धते  
 पशूच्छन्दोमैरोजो वै वीर्यं पृष्ठानि पशवंश्छन्दोमा ओजस्येव (२३)

वीर्यं पशुषु प्रति तिष्ठन्ति षट्त्रिंशद्रात्रो भवति षट्त्रिंशदक्षरा  
 बृहती बारहताः पशवो बृहत्यैव पशूनवं रुन्धते बृहती  
 छन्दसाः स्वाराज्यमाश्नुताश्नुवते स्वाराज्यं य एवं विद्वांसः  
 षट्त्रिंशद्रात्रमासते सुवर्गमेव लोकं यन्त्यतिरात्रावभितो भवतः  
 सुवर्गस्य लोकस्य परिगृहीत्यै॥ (२४)

अतिरात्र ओजस्येव षट्त्रिंशच्च॥३॥

[६]

वसिष्ठो हतपुत्रोऽकामयत विन्देयं प्रजामभि सौदासान्भवेयमिति  
 स एतमैकस्मान्नपञ्चाशमपश्यत्तमाहरन्तेनायजत् ततो वै सोऽविन्दत  
 प्रजामभि सौदासान्भवद्य एवं विद्वांसः एकस्मान्नपञ्चाशमासते



विन्दन्ते॑ प्र॒जाम॒भि भ्रातृ॑व्यान्भवन्ति॒ त्रयं॑स्त्रिवृतो॑ऽग्निष्टो॒मा भ॑वन्ति॒  
वज्रं॑स्यै॒व मुखं॑ सꣳ श्यन्ति॒ दशं॑ पञ्चद॒शा भ॑वन्ति॒ पञ्चद॒शो  
वज्रः॑ (२५)

वज्रमे॒व भ्रातृ॑व्येभ्यः॒ प्र ह॑रन्ति॒ षोड॑शि॒मद॑श॒ममह॑र्भवति॒  
वज्रं॑ ए॒व वी॒र्यं॑ दधति॒ द्वाद॑श सप्तद॒शा भ॑वन्त्य॒न्नाद्य॑स्याव॑रुद्धा  
अथो॒ प्रैव॑ तैर्जा॑यन्ते॒ पृष्ठ्यः॑ षड॒हो भ॑वति॒ षड्वा ऋ॒तवः॑ षट्पृ॒ष्ठानि॑  
पृ॒ष्ठैरे॒वतू॒नन्वा॒रोह॑न्त्य॒तुभिः॑ सं॒वत्स॑रन्ते॒ सं॒वत्स॑र ए॒व प्र॑तिं तिष्ठन्ति॒  
द्वाद॑शै॒कवि॑ं॒शा भ॑वन्ति॒ प्र॑तिं॒ष्ठित्या॒ अथो॒ रुच॑मे॒वाऽऽत्म॑न् (२६)

द॒धते॒ ब॒हवः॑ षोड॒शिनो॑ भवन्ति॒ विजि॑त्यै॒ षडा॑श्चि॒नानि॑ भवन्ति॒  
षड्वा ऋ॒तव॑ ऋ॒तुष्वे॒व प्र॑तिं तिष्ठन्त्य॒नूनाति॑रि॒क्ता वा ए॒ता रा॒त्रय॑  
ऊ॒नास्तद्य॑दे॒कस्यै॒ न पञ्चा॑श॒दति॑रि॒क्तास्तद्य॑द्भू॒यसी॑र॒ष्टाच॑त्वारि॒ंशत॑  
ऊ॒नाच्च॒ खलु॒ वा अ॑ति॒रिक्ता॑च्च॒ प्र॒जाप॑तिः॒ प्राजा॑यत॒ ये  
प्र॒जाका॑माः प॒शुका॑माः स्युस्त ए॒ता आ॑सी॒रन्त्रै॒व जा॑यन्ते  
प्र॒जया॑ प॒शुभिर्वै॑रा॒जो वा ए॒ष य॒ज्ञो यदे॑कस्मान्नपञ्चा॒शो य  
ए॒वं वि॒द्वाꣳस॑ एकस्मान्नपञ्चा॒शमा॑सते॒ विराज॑मे॒व गच्छ॑न्त्य॒न्नादा॑  
भ॑वन्त्यति॒रात्रा॒वभि॑तो॒ भवतो॑ऽन्नाद्य॑स्य॒ परि॑गृहीत्यै॥ (२७)

वज्रं आत्मन्प्रजया द्वाविंशतिश्च॥३॥ [७]

सं॒वत्स॑राय॒ दीक्षि॑ष्यमा॒णा ए॒काष्ट॑कायां॒ दीक्षे॑रन्नेषा॒ वै  
सं॒वत्स॑रस्य॒ पत्नी॒ यदे॑काष्ट॒कैत॑स्यां॒ वा ए॒ष ए॒ताꣳ रा॒त्रिं व॑सति॒

साक्षादेव संवत्सरमारभ्य दीक्षन्त आर्तं वा एते संवत्सरस्याभि दीक्षन्ते य एकाष्टकायां दीक्षन्तेऽन्तनामानावृतू भवतो व्यस्तं वा एते संवत्सरस्याभि दीक्षन्ते य एकाष्टकायां दीक्षन्तेऽन्तनामानावृतू भवतः फल्गुनीपूर्णमासे दीक्षेरन्मुखं वा एतत् (२८)

संवत्सरस्य यत्फल्गुनीपूर्णमासो मुखत एव संवत्सरमारभ्य दीक्षन्ते तस्यैकैव निर्या यत्सां मध्ये विष्वान्सम्पद्यते चित्रापूर्णमासे दीक्षेरन्मुखं वा एतत्संवत्सरस्य यच्चित्रापूर्णमासो मुखत एव संवत्सरमारभ्य दीक्षन्ते तस्य न का चन निर्या भवति चतुरहे पुरस्तात्पूर्णमास्यै दीक्षेरन्तेषामेकाष्टकायां क्रयः सं पद्यते तेनैकाष्टकां न छम्बद्गुर्वन्ति तेषाम् (२९)

पूर्वपक्षे सुत्या सं पद्यते पूर्वपक्षं मासां अभि सं पद्यन्ते ते पूर्वपक्ष उत्तिष्ठन्ति तानुत्तिष्ठत ओषधयो वनस्पतयोऽनूत्तिष्ठन्ति तान्कल्याणी कीर्तिरनूत्तिष्ठत्यरात्सुरिमे यजमाना इति तदनु सर्वे राधुवन्ति॥ (३०)

एतच्छम्बद्गुर्वन्ति तेषाञ्चतुस्त्रिंशच्च॥३॥ [८]

सुवर्गं वा एते लोकं यन्ति ये सत्रमुपयन्त्यभीन्धत एव दीक्षाभिरात्मानं श्रपयन्त उपसद्भिर्द्वाभ्यां लोमावं द्यन्ति द्वाभ्यान्त्वचं द्वाभ्यामसृद्वाभ्यां मांसं द्वाभ्यामस्थि द्वाभ्यां मज्जानमात्मदक्षिणं वै सत्रमात्मानमेव दक्षिणां नीत्वा सुवर्गं

लो॒कं य॑न्ति॒ शि॒खा॒म॒नु प्र व॑पन्त॒ ऋ॒द्ध्या अथो॒ रघी॑या॒सः सु॒व॒र्गं  
लो॒कम॑या॒मेति॑॥ (३१)

सु॒व॒र्गं पञ्चा॑शत्॥१॥ \_\_\_\_\_ [९]

ब्र॒ह्म॒वा॒दि॒नो वद॑न्त्यति॒रात्रः प॑र॒मो य॑ज्ञ॒क्रतू॑नां कस्मा॒त्तं  
प्र॑थ॒ममु॑प॒ यन्ती॑त्ये॒तद्वा अ॑ग्नि॒ष्टोमं प्र॑थ॒ममु॑प॒ यन्त्यथो॒क्थ्य॑मथ  
षोड॑शि॒न॒मथा॑ति॒रात्र॑म॒नुपूर्व॑मे॒वैतद्य॑ज्ञ॒क्रतू॑नुपेत्य॒ ताना॒लभ्य॑ परि॒गृह्य॑  
सोम॑मे॒वैतत्पि॑बन्त॒ आस॑ते॒ ज्योति॑ष्टोमं प्रथ॒ममु॑प॒ यन्ति॒ ज्योति॑ष्टोमो  
वै स्तो॑मा॒नां मुखं॑ मुख॒त ए॒व स्तो॑मा॒न्प्र यु॑ञ्जते॒ ते (३२)

स॒स्तु॑ता वि॒राज॑म॒भि सं प॑द्यन्ते॒ द्वे च॑र्चाव॒ति  
रि॒च्येते॒ एक॑या॒ गौर॑ति॒रिक्त॑ एक॒यायु॑रूनः सु॒व॒र्गो वै लो॒को  
ज्योति॑रू॒र्ग्विरा॑द्भु॒व॒र्गमे॒व तेन॑ लो॒कं य॑न्ति॒ रथ॑न्त॒रं दि॒वा भ॑व॒ति  
रथ॑न्त॒रं नक्त॑मि॒त्याहु॑र्ब्रह्म॒वा॒दि॒नः केन॑ तद॒जामी॑ति॒ सौभ॑रं तृ॒तीय॑-  
स॒व॒ने ब्र॑ह्मसा॒मं बृ॒हत्त॑न्म॒ध्यतो॑ द॒धति॑ वि॒धृत्यै॒ तेनाजा॑मि॥ (३३)

त ए॒कान्न॑पञ्चा॒शच्च॑॥२॥ \_\_\_\_\_ [१०]

ज्योति॑ष्टोमं प्रथ॒ममु॑प॒ यन्त्यस्मि॒न्ने॒व तेन॑ लो॒के प्र॑ति॒ तिष्ठ॑न्ति  
गो॒ष्टोमं द्वि॒तीय॑मु॑प॒ यन्त्यन्त॑रि॒क्ष ए॒व तेन॑ प्र॑ति॒ तिष्ठ॑न्त्यायु॒ष्टोमं  
तृ॒तीय॑मु॑प॒ यन्त्यमु॒ष्मिन्ने॒व तेन॑ लो॒के प्र॑ति॒ तिष्ठ॑न्तीयं॒ वाव  
ज्योति॑रन्त॒रि॒क्षं गौर॑सा॒वायु॑र्यदे॒तान्थ॑स्तो॒मानु॑प॒यन्त्ये॒ष्वे॒व तल्लो॑केषु  
स॒त्रिणः॑ प्र॒ति॒तिष्ठ॑न्तो॒ यन्ति॒ ते स॒स्तु॑ता वि॒राज॑म् (३४)

अभि सं पद्यन्ते द्वे चर्चावति रिच्येते एकया गौरतिरिक्त  
 एकयायुरूनः सुवर्गो वै लोको ज्योतिरुर्विराडूर्जमेवाव रुन्धते ते  
 न क्षुधार्तिमार्च्छन्त्यक्षौधुका भवन्ति क्षुत्सम्बाधा इव हि सत्रिणो-  
 ऽग्निष्टोमावभितः प्रधी तावुक्थ्या मध्ये नभ्यं तत्तदेतत्परियद्देवचक्रं  
 यदेतेन (३५)

षडहेन यन्ति देवचक्रमेव समारोहन्त्यरिष्ट्यै ते स्वस्ति  
 समश्नुवते षडहेन यन्ति षड्वा ऋतव ऋतुष्वेव प्रति  
 तिष्ठन्त्युभयतो ज्योतिषा यन्त्युभयत एव सुवर्गे लोके प्रतितिष्ठन्तो  
 यन्ति द्वौ षडहौ भवतस्तानि द्वादशाहानि सं पद्यन्ते द्वादशो वै  
 पुरुषो द्वे सक्थ्यौ द्वौ बाहू आत्मा च शिरश्च चत्वार्यङ्गानि स्तनौ  
 द्वादशौ (३६)

तत्पुरुषमनु पर्यावर्तन्ते त्रयः षडहा भवन्ति तान्यष्टादशाहानि  
 सं पद्यन्ते नवान्यानि नवान्यानि नव वै पुरुषे प्राणास्तत्प्राणाननु  
 पर्यावर्तन्ते चत्वारः षडहा भवन्ति तानि चतुर्विंशतिरहानि सं  
 पद्यन्ते चतुर्विंशतिरर्धमासाः संवत्सरस्तत्संवत्सरमनु पर्यावर्तन्ते-  
 ऽप्रतिष्ठितः संवत्सर इति खलु वा आहुर्वर्षीयान्प्रतिष्ठाया  
 इत्येतावद्वै संवत्सरस्य ब्राह्मणं यावन्मासो मासिमास्येव  
 प्रतितिष्ठन्तो यन्ति॥ (३७)

विराजमेतेन द्वादशावेतावद्वा अष्टौ च॥४॥ [११]

मेषस्त्वा पचतैरवतु लोहितग्रीवश्छागैः शल्मलिर्वृद्धा

प॒र्णो ब्रह्म॑णा प्ल॒क्षो मे॒धेन॑ न्यग्रो॒धश्च॑म॒सैरु॑दु॒म्बर॑ ऊ॒र्जा गा॑य॒त्री  
छ॒न्दो॑भि॒स्त्रिवृ॑थ॒स्तोमै॑रव॒न्तीः स्था॑व॒न्तीस्त्वा॑वन्तु प्रि॒यं त्वा॑ प्रि॒याणां  
व॒र्षि॑ष्ठ॒माप्या॑नां नि॒धीनां॑ त्वा॑ नि॒धि॒पति॑ः हवामहे वसो  
मम॥ (३८)

मेषः षट्त्रिंशत्॥१॥ [१२]

कू॒प्या॑भ्यः स्वाहा कू॒ल्या॑भ्यः स्वाहा वि॒क॒र्या॑भ्यः स्वाहा-  
ऽव॒ट्या॑भ्यः स्वाहा ख॒न्या॑भ्यः स्वाहा ह॒द्या॑भ्यः स्वाहा सू॒द्या॑भ्यः  
स्वाहा सर॒स्या॑भ्यः स्वाहा वैश॒न्तीभ्यः॑ स्वाहा प॒ल्व॒ल्या॑भ्यः स्वाहा  
व॒र्ष्या॑भ्यः स्वाहाऽव॒र्ष्या॑भ्यः स्वाहा ह्रा॒दुनी॑भ्यः स्वाहा पृ॒ष्वा॑भ्यः  
स्वाहा स्य॒न्द॑मानाभ्यः स्वाहा स्था॒व॒राभ्यः॑ स्वाहा ना॒दे॒यीभ्यः॑ स्वाहा  
सै॒न्ध॒वीभ्यः॑ स्वाहा स॒मु॒द्रि॒याभ्यः॑ स्वाहा सर्वा॑भ्यः स्वाहा॥ (३९)

कूप्याभ्यश्चत्वारिंशत्॥१॥ [१३]

अ॒द्भ्यः स्वाहा वह॑न्तीभ्यः स्वाहा परि॒वह॑न्तीभ्यः स्वाहा स॒म॒न्तं  
वह॑न्तीभ्यः स्वाहा शीघ्रं वह॑न्तीभ्यः स्वाहा शी॒भं वह॑न्तीभ्यः स्वाहा॒ग्रं  
वह॑न्तीभ्यः स्वाहा भी॒मं वह॑न्तीभ्यः स्वाहाऽम्भो॑भ्यः स्वाहा न॒भो॑भ्यः  
स्वाहा म॒हो॑भ्यः स्वाहा सर्व॑स्मै स्वाहा॥ (४०)

अद्भ्य एकात्रिंशत्॥१॥ [१४]

यो अ॒र्व॒न्तं जिघा॑सति॒ तम॒भ्यमी॑ति॒ वरु॑णः। प॒रो म॒र्तः प॒रः

श्वा। अ॒हं च॒ त्वं च॑ वृ॒त्रह॑न्त्सम्ब॒भूव॑ स॒निभ्य॑ आ। अ॒रा॒ती॒वा  
चि॑द॒द्रि॒वोऽनु॑ नौ शूर॒ म॑स॒तै भ॒द्रा इन्द्र॑स्य रा॒तयः॑। अ॒भि क्र॑त्वेन्द्र  
भूर॒धृ ज॑म॒न्न ते॑ वि॒व्यङ्ग॑हि॒मान॑ र॒जा र॑सि। स्वेना॒ हि वृ॒त्र श॑व॒सा  
ज॒घन्थ॑ न शत्रु॒रन्त॑ वि॒विद॑द्युधा ते॑॥ (४१)

विविद्वे च॥१॥ \_\_\_\_\_ [१५]

नमो॑ रा॒ज्ञे नमो॑ वरु॒णाय॑ नमो॑ऽश्वा॒य नमः॑ प्र॒जाप॑तये  
नमो॑ऽधि॒पत॑येऽधि॒पति॑रस्यधि॒पतिं॑ मा कुर्वधि॒पति॑र॒हं प्र॒जानां॑  
भूया॑स॒म्मां धे॑हि म॒रि॒ये धे॒ह्युपा॑कृ॒ताय॑ स्वाहाऽऽल॒ब्धाय॑ स्वाहा॑  
हु॒ताय॑ स्वाहा॑॥ (४२)

नम॑ एका॒त्रिंशत्॑॥१॥ \_\_\_\_\_ [१६]

म॒यो॒भूर्वा॑तो अ॒भि वा॑तू॒स्रा ऊ॑र्ज॒स्वती॑रोष॒धीरा॑ रि॒शन्ता॑म्।  
पी॒व॒स्वती॑र्जीवध॒न्याः पि॑बन्त्वव॒साय॑ प॒द्वते॑ रु॒द्र मृ॒डा। याः  
स॒रूपा॑ वि॒रूपा॑ ए॒करूपा॑ यासांम॒ग्निरि॑ष्ट्या॒ नामा॑नि वेद॑। या  
अ॒ङ्गिर॑स॒स्तप॑से॒ह च॒क्रु॒स्ताभ्यः॑ पर्जन्य॒ महि॑ शर्म॒ यच्छ॑। या दे॒वेषु॑  
त॒नुव॑मैर॒यन्त॑ यासां॒ सोमो॑ वि॒श्वा रू॒पाणि॑ वेद॑। ता अ॒स्मभ्य॑  
प॒यसा॑ पि॒न्वमा॑नाः प्र॒जाव॑तीरिन्द्र (४३)

गो॒ष्ठे रि॑रीहि। प्र॒जाप॑तिर्म॒ह्यमे॒ता ररा॑णो वि॒श्वैर्दे॒वैः पि॒तृभिः॑  
संवि॑दानः। शि॒वाः स॒तीरु॑पं नो गो॒ष्ठमा॑कृ॒स्तासां॑ व॒यं प्र॒जया॑ स॒  
संदे॑म। इ॒ह धृ॑तिः स्वाहे॒ह वि॑धृतिः स्वाहे॒ह रन्तिः॑ स्वाहे॒ह रम॑तिः

स्वाहा महीम् षु सुत्रामाणम्॥ (४४)

इन्द्राष्टात्रिंशच्च॥२॥ [१७]

किं स्विदासीत्पूर्वचित्तिः किं स्विदासीद्बृहद्वयः।  
 किं स्विदासीत्पिशङ्गिला किं स्विदासीत्पिलिप्पिला।  
 द्यौरासीत्पूर्वचित्तिरश्व आसीद्बृहद्वयः। रात्रिरासीत्पिशङ्गिला विरासीत्पि  
 कः स्विदेकाकी चरति क उ स्विज्जायते पुनः। किं स्विद्धिमस्य  
 भेषजं किं स्विदावपनं महत्। सूर्य एकाकी चरति (४५)

चन्द्रमा जायते पुनः। अग्निर्हिमस्य भेषजं भूमिरावपनं  
 महत्। पृच्छामि त्वा परमन्तं पृथिव्याः पृच्छामि त्वा भुवनस्य  
 नाभिम्। पृच्छामि त्वा वृष्णो अश्वस्य रेतः पृच्छामि वाचः परमं  
 व्योम। वेदिमाहुः परमन्तं पृथिव्या यज्ञमाहुर्भुवनस्य नाभिम्।  
 सोममाहुर्वृष्णो अश्वस्य रेतो ब्रह्मैव वाचः परमं व्योम॥ (४६)

सूर्य एकाकी चरति षड्वत्वारिंशच्च॥२॥ [१८]

अम्बे अम्बाल्यम्बिके न मा नयति कश्चन। ससस्त्यश्वकः।  
 सुभगे कां पीलवासिनि सुवर्गे लोके सं प्रोर्ण्वाथाम्। आहमजानि  
 गर्भधमा त्वमजासि गर्भधम्। तौ सह चतुरः पदः सम्प्र सारयावहै।  
 वृषा वा९ रेतोधा रेतो दधातूथ्सक्थ्योर्गृदं धैह्यञ्जिमुदञ्जिमन्वज। यः  
 स्त्रीणां जीवभोजनो य आसाम् (४७)

बिलधावनः। प्रियः स्त्रीणामपीच्यः। य आसां कृष्णे लक्ष्मणि

सर्दिगृदिं पुरावधीत्। अम्बे अम्बाल्यम्बिके न मां यमति कश्चन।  
 ससस्त्यंश्वकः। ऊर्ध्वामेनामुच्छ्रयताद्वेणुभारं गिराविवा। अथास्या  
 मध्यमेधताः शीते वाते पुनन्निवा। अम्बे अम्बाल्यम्बिके न मां  
 यमति कश्चन। ससस्त्यंश्वकः। यद्धरिणी यवमत्ति न (४८)

पुष्टं पशु मन्यते। शूद्रा यदर्यजारा न पोषाय धनायति।  
 अम्बे अम्बाल्यम्बिके न मां यमति कश्चन। ससस्त्यंश्वकः।  
 इयं यका शकुन्तिकाहलमिति सर्पति। आहतं गृभे पसो नि  
 जल्लुलीति धाणिका। अम्बे अम्बाल्यम्बिके न मां यमति कश्चन।  
 ससस्त्यंश्वकः। माता च ते पिता च तेऽग्रं वृक्षस्य रोहतः। (४९)

प्र सुलामीति ते पिता गृभे मुष्टिमंतसयत्। दधिक्राव्णो  
 अकारिषं जिष्णोरश्वस्य वाजिनः। सुरभि नो मुखां करत्प्र ण  
 आयूषि तारिषत्। आपो हि ष्ठा मयोभुवस्ता न ऊर्जे दधातन।  
 महे रणाय चक्षसे। यो वः शिवतमो रसस्तस्य भाजयतेह नः।  
 उशतीरिव मातरः। तस्मा अरं गमाम वो यस्य क्षयाय जिन्वथ।  
 आपो जनयथा च नः॥ (५०)

आसामत्ति न रोहतो जिन्वथ चत्वारि च॥४॥ [१९]

भूर्भुवः सुवर्वसवस्त्वाञ्जन्तु गायत्रेण छन्दसा रुद्रास्त्वाञ्जन्तु  
 त्रैष्टुभेन छन्दसादित्यास्त्वाञ्जन्तु जागतेन छन्दसा यद्वातो अपो  
 अगमदिन्द्रस्य तनुवं प्रियाम्। एतः स्तोतरेतेन पथा पुनरश्वमा



वर्तयासि नः। लाजी(३)ञ्छाची(३)न् यशौ म॒मा(४)म्। य॒व्यायै  
 ग॒व्यायां ए॒तद्दे॒वा अन्न॑मत्तै॒तदन्न॑मद्धि प्रजापते। यु॒ञ्जन्ति॑ ब्र॒ध्नम॑रु॒षं  
 चर॑न्तं परि॒ तस्थु॑षः। रोच॑न्ते रोचना दि॒वि। यु॒ञ्जन्त्य॑स्य॒ काम्या॑ हरी॒  
 विप॑क्षसा रथे॑। शोणा॑ धृष्णू नृवाह॑सा। के॒तुं कृ॑ण्वन्न॑के॒तवे॒ पेशो॑ मर्या  
 अपे॒शसे॑। समुष॑द्विरजायथाः॥ (५१)

ब्रध्नं पञ्चविंशतिश्च॥१॥ ————— [२०]

प्रा॒णाय॒ स्वाहा॑ व्या॒नाय॒ स्वाहा॑ऽपा॒नाय॒ स्वाहा॑ स्नाव॑भ्यः स्वाहा॑  
 सन्ता॒नेभ्यः॑ स्वाहा॑ परि॑सन्ता॒नेभ्यः॑ स्वाहा॑ पर्व॑भ्यः स्वाहा॑ स॒न्धाने॑भ्यः  
 स्वाहा॑ शरी॑रेभ्यः स्वाहा॑ य॒ज्ञाय॒ स्वाहा॑ दक्षि॑णाभ्यः स्वाहा॑ सुव॒र्गाय॒  
 स्वाहा॑ लो॒काय॒ स्वाहा॑ सर्व॑स्मै स्वाहा॑॥ (५२)

प्राणायाष्टाविंशतिः॥१॥ ————— [२१]

सि॒ताय॒ स्वाहा॑ऽसि॒ताय॒ स्वाहा॑ऽभिहि॑ताय॒ स्वाहा॑ऽन॑भिहि॒ताय॒  
 स्वाहा॑ यु॒क्ताय॒ स्वाहा॑ऽयु॒क्ताय॒ स्वाहा॑ सु॒युक्ताय॒ स्वाहो॑द्यु॒क्ताय॒  
 स्वाहा॑ वि॒मुक्ताय॒ स्वाहा॑ प्र॒मुक्ताय॒ स्वाहा॑ व॒ञ्चते॒ स्वाहा॑ परि॒वञ्चते॒  
 स्वाहा॑ सं॒वञ्चते॒ स्वाहा॑ऽनु॒वञ्चते॒ स्वाहो॑द्व॒ञ्चते॒ स्वाहा॑ य॒ते स्वाहा॑  
 धाव॑ते॒ स्वाहा॑ तिष्ठ॑ते॒ स्वाहा॑ सर्व॑स्मै स्वाहा॑॥ (५३)

सितायाष्टात्रिंशत्॥१॥ ————— [२२]

बृहस्पतिः श्रद्धया वा ऋक्षा वै प्रजापतिर्येनयेन द्वे वाव देवसूत्रे आदित्या अकामयन्त सुवर्गं  
 वसिष्ठः संवत्सरायं सुवर्गं ये सूत्रं ब्रह्मवादिनोऽतिरात्रो ज्योतिष्ठोमं मेघः कूप्याभ्योऽद्भ्यो यो नमो मयोभूः

किं स्विदम्बे भूः प्राणायं सिताय द्वाविंशतिः॥२२॥

बृहस्पतिः प्रतितिष्ठन्ति वै दशरात्रेण सुवर्गं यो अर्वन्तं भूस्त्रिपञ्चाशत्॥५३॥

बृहस्पतिः सर्वस्मै स्वाहा॥

हरिः ॐ॥

॥कृष्ण-यजुर्वेदीय-तैत्तिरीय-संहितायां सप्तमकाण्डे चतुर्थः प्रश्नः  
समाप्तः॥ ७-४॥

## ॥पञ्चमः प्रश्नः॥

॥तैत्तिरीयसंहितायां सप्तमकाण्डे पञ्चमः प्रश्नः॥

गावो वा एतत्सुत्रमासताशृङ्गाः सुतीः शृङ्गाणि नो जायन्ता इति कामेन तासां दश मासा निषण्णा आसन्नथ शृङ्गाण्यजायन्त ता उदतिष्ठन्नराथस्मेत्यथ यासां नाजायन्त ताः संवत्सरमाप्त्वोदतिष्ठन्नराथस्मेति यासां चाजायन्त यासां च न ता उभयीरुदतिष्ठन्नराथस्मेति गोसुत्रं वै (१)

संवत्सरो य एवं विद्वांसः संवत्सरमुपयन्त्यध्रुवन्त्येव तस्मात्तूपरा वार्षिकौ मासौ पत्वा चरति सुत्राभिजितुः ह्यस्यै तस्मात्संवत्सरसदो यत्किं च गृहे क्रियते तदाप्तमवरुद्धमभिजितं क्रियते समुद्रं वा एते प्र प्लवन्ते ये संवत्सरमुपयन्ति यो वै समुद्रस्य पारं न पश्यन्ति न वै स तत् उदति संवत्सरः (२)

वै समुद्रस्तस्यैतत्पारं यदतिरात्रौ य एवं विद्वांसः संवत्सरमुपयन्त्यनार्ता एवोदचं गच्छन्तीयं वै पूर्वोऽतिरात्रोऽसावुत्तरो मनः पूर्वो वागुत्तरः प्राणः पूर्वोऽपान उत्तरः प्ररोधनं पूर्व उदयनमुत्तरो ज्योतिष्टोमो वैश्वानरोऽतिरात्रो भवति ज्योतिरेव पुरस्ताद्बधते सुवर्गस्य लोकस्यानुख्यात्यै चतुर्विंशः प्रायणीयो भवति चतुर्विंशतिरर्धमासाः (३)

संवत्सरः प्रयन्त एव संवत्सरे प्रति तिष्ठन्ति तस्य त्रीणि

च शतानि षष्टिश्च स्तोत्रीयास्तावतीः संवत्सरस्य रात्रय उभे  
 एव संवत्सरस्य रूपे आप्नुवन्ति ते सङ्स्थित्या अरिष्ट्या  
 उत्तरैरहोभिश्चरन्ति षड्हा भवन्ति षड्वा ऋतवः संवत्सर ऋतुष्वेव  
 संवत्सरे प्रति तिष्ठन्ति गौश्रायुश्च मध्यतः स्तोमौ भवतः  
 संवत्सरस्यैव तन्मिथुनं मध्यतः (४)

दधति प्रजननाय ज्योतिरभितो भवति विमोचनमेव  
 तच्छन्दांस्येव तद्विमोकं यन्त्यथो उभयतो ज्योतिषैव षड्हेन  
 सुवर्गं लोकं यन्ति ब्रह्मवादिनो वदन्त्यासते केन यन्तीति  
 देवयानेन पथेति ब्रूयाच्छन्दांसि वै देवयानः पन्था गायत्री  
 त्रिष्टुब्जगती ज्योतिर्वै गायत्री गौस्त्रिष्टुगायुर्जगती यदेते स्तोमा  
 भवन्ति देवयानेनैव (५)

तत्पथा यन्ति समानः सामं भवति देवलोको वै सामं  
 देवलोकादेव न यन्त्यन्या अन्या ऋचो भवन्ति मनुष्यलोको वा  
 ऋचो मनुष्यलोकादेवान्यमन्यं देवलोकमभ्यारोहन्तो यन्त्यभिवर्तो  
 ब्रह्मसामं भवति सुवर्गस्य लोकस्याभिवृत्त्या अभिजिद्भवति  
 सुवर्गस्य लोकस्याभिजित्यै विश्वजिद्भवति विश्वस्य जित्यै  
 मासिमांसि पृष्ठान्युप यन्ति मासिमांस्यतिग्राह्या गृह्यन्ते  
 मासिमांस्येव वीर्यं दधति मासां प्रतिष्ठित्या उपरिष्ठान्मासां  
 पृष्ठान्युप यन्ति तस्मादुपरिष्ठादोषधयः फलं गृह्णन्ति॥ (६)

गावो वा एतत्सन्त्रमांसताशृङ्गाः सतीः शृङ्गाणि सिषांसन्तीस्तासां  
दश मासा निषण्णा आसन्नथ शृङ्गाण्यजायन्त ता अब्रुवन्नरास्मोत्तिष्ठा  
तं काममरुथ्महि येन कामेन न्यषदामेति तासामु त्वा  
अब्रुवन्नर्था वा यावतीर्वासामहा एवेमौ द्वादशौ मासौ संवत्सरः  
सम्पाद्योत्तिष्ठामेति तासाम् (७)

द्वादशे मासि शृङ्गाणि प्रावर्तन्त श्रद्धया वाऽश्रद्धया वा ता  
इमा यास्तूपरा उभय्यो वाव ता आर्ध्वान् याश्च शृङ्गाण्यसन्वन्  
याश्चोर्जमवारुन्धतर्धोति दशसु मासूत्तिष्ठन्नृधोति द्वादशसु य एवं  
वेद पदेन खलु वा एते यन्ति विन्दति खलु वै पदेन यन्तद्वा  
एतदृद्धमयनं तस्मादेतद्गोसनि॥ (८)

तिष्ठामेति तासां तस्माद्दे च॥२॥ [२]

प्रथमे मासि पृष्ठान्युप यन्ति मध्यम उप यन्त्युत्तम उप  
यन्ति तदाहुर्या वै त्रिरेकस्याहं उपसीदन्ति दहं वै सापराभ्यां  
दोहाभ्यां दुहेऽथ कुतः सा धौक्ष्यते यां द्वादश कृत्वं उपसीदन्तीति  
संवत्सरः सम्पाद्योत्तमे मासि सकृत्पृष्ठान्युपैयुस्तद्यजमाना यज्ञं  
पशूनव रुन्धते समुद्रं वै (९)

एतेऽनवारमपारं प्र प्लवन्ते ये संवत्सरमुपयन्ति यद्वहद्रथन्तरे  
अन्वर्जैर्युथ मध्ये समुद्रस्य प्लवमन्वर्जैर्युस्तादृक्तदनुत्सर्गं  
बृहद्रथन्तराभ्यामित्वा प्रतिष्ठां गच्छन्ति सर्वेभ्यो वै कामेभ्यः

सन्धिर्दुहे तद्यजमानाः सर्वान्कामानव रुन्धते॥ (१०)

समुद्रं वै चतुस्त्रिंशच्च॥२॥ [३]

सामान्यं ऋचौ भवन्ति मनुष्यलोको वा ऋचौ मनुष्यलोकादेव न यन्त्यन्यदन्यत्सामं भवति देवलोको वै सामं देवलोकादेवान्यमन्यं मनुष्यलोकं प्रत्यवरोहन्तो यन्ति जगतीमग्र उप यन्ति जगतीं वै छन्दांसि प्रत्यवरोहन्त्याग्रयणं ग्रहा बृहत्पृष्ठानि त्रयस्त्रिंशश्च स्तोमास्तस्माज्ज्यायांसं कनीयान्प्रत्यवरोहति वैश्वकर्मणो गृह्यते विश्वान्येव तेन कर्माणि यजमाना अव रुन्धत आदित्यः (११)

गृह्यत इयं वा अदितिर्स्यामेव प्रति तिष्ठन्त्यन्योन्यो गृह्यते मिथुनत्वाय प्रजात्या अवान्तरं वै दशरात्रेण प्रजापतिः प्रजा असृजत यद्दशरात्रो भवति प्रजा एव तद्यजमानाः सृजन्त एताश्च ह वा उदङ्कः शौल्बायनः सत्रस्यर्द्धिमुवाच यद्दशरात्रो यद्दशरात्रो भवति सत्रस्यर्द्धा अथो यदेव पूर्वेष्वहःसु विलोम क्रियते तस्यैवैषा शान्तिः॥ (१२)

आदित्यस्तस्यैव द्वे च॥२॥ [४]

यदि सोमो सश्च सुतो स्यातां महति रात्रियै प्रातरनुवाकमुपाकुर्यात् वाचं पूर्वं देवताः पूर्वश्छन्दांसि वृङ्क्ते वृषण्वतीं प्रतिपदं कुर्यात्प्रातःसवनादेवैषामिन्द्रं वृङ्क्तेऽथो खल्वाहुः सवनमुखेसवनमुखे कार्येति सवनमुखात्सवनमुखादेवैषामिन्द्रं वृङ्क्ते संवेशायोपवेशाय

गायत्रियास्त्रिष्टुभो जगत्या अनुष्टुभः पङ्क्त्या अभिभूत्यै स्वाहा  
छन्दांसि वै संवेश उपवेशश्छन्दोभिरेवेषाम् (१३)

छन्दांसि वृद्धे सजनीयः शस्यं विहव्यः शस्यमगस्त्यस्य  
कयाशुभीयः शस्यमेतावद्वा अस्ति यावदेतद्यावदेवास्ति तदेषां  
वृद्धे यदि प्रातःसवने कलशो दीर्येत वैष्णवीषु शिपिविष्टवतीषु  
स्तुवीरन् यद्वै यज्ञस्यातिरिच्यते विष्णुं तच्छिपिविष्टमभ्यति  
रिच्यते तद्विष्णुः शिविपिष्टोऽतिरिक्त एवातिरिक्तं दधात्यथो  
अतिरिक्तेनैवातिरिक्तमाप्त्वाव रुन्धते यदि मध्यन्दिने दीर्येत  
वषट्कारनिधनः सामं कुर्युर्वषट्कारो वै यज्ञस्य प्रतिष्ठा  
प्रतिष्ठामेवैनद्रमयन्ति यदि तृतीयसवन एतदेव॥ (१४)

छन्दोभिरेवेषामवैकान्नविंशतिश्च॥ २॥ [५]

षडहैर्मासान्थ्सम्पाद्याहुरुत्सृजन्ति षडहैर्हि मासान्थ्सम्पश्यन्त्य  
मासान्थ्सम्पश्यन्त्यमावास्यया मासान्थ्सम्पाद्याहुरुत्सृजन्त्यमावास्यया  
हि मासान्थ्सम्पश्यन्ति पौर्णमास्या मासान्थ्सम्पाद्याहुरुत्सृजन्ति  
पौर्णमास्या हि मासान्थ्सम्पश्यन्ति यो वै पूर्ण आसिञ्चति परा स  
सिञ्चति यः पूर्णादुदचति (१५)

प्राणमस्मिन्थ्स दधाति यत्पौर्णमास्या मासान्थ्सम्पाद्याहुरुत्सृजन्ति  
संवत्सरायैव तत्प्राणं दधति तदनु सत्रिणः प्राणन्ति  
यदहर्नोत्सृजेयुर्यथा दतिरुपनद्धो विपतत्येवः संवत्सरो वि

पते॑दार्ति॑मा॒र्च्छेयु॑र्यत्पौ॑र्णमा॒स्या मा॒सा॑न्थ्स॒म्पाद्या॑ह॒रुथ्सृ॑जन्ति  
संव॑थ्स॒रायै॑व तदु॑दानं द॑धति॒ तदनु॑ स॒त्रिण॒ उत् (१६)

अ॒न॒न्ति॒ नाऽऽर्ति॑मा॒र्च्छन्ति॒ पूर्ण॑मा॒से वै दे॒वानां॑ सु॒तो  
यत्पौ॑र्णमा॒स्या मा॒सा॑न्थ्स॒म्पाद्या॑ह॒रुथ्सृ॑जन्ति॒ दे॒वाना॑मे॒व तद्य॑ज्ञेन॑  
य॒ज्ञं प्र॒त्यव॑रोहन्ति॒ वि वा ए॒तद्य॑ज्ञं छि॒न्दन्ति॒ यत्प॑ण्ड॒हस॑न्ततः  
स॒न्तम॑थाह॒रुथ्सृ॑जन्ति॒ प्राजा॑प॒त्यं प॒शुमा॑ल॒भन्ते प्र॒जाप॑तिः  
स॒र्वा दे॒वता॑ दे॒वता॑भिरे॒व य॒ज्ञं सं त॑न्वन्ति॒ यन्ति॒ वा ए॒ते  
स॒र्वना॑द्येऽहः (१७)

उ॒थ्सृ॑जन्ति॒ तुरी॑यं खलु॒ वा ए॒तथ्स॑र्वनं॒ यथ्सौ॑न्नाय्यं॒ यथ्सौ॑न्नाय्यं  
भ॒वन्ति॒ तेनै॑व स॒र्वना॒न्न य॑न्ति॒ समु॑प॒हूय॑ भक्ष॒यन्त्ये॒तथ्सौ॑मपी॒था  
ह्यै॒तर॑हि॒ यथा॑य॒तनं॒ वा ए॒तेषां॑ स॒र्वन॑भाजो॒ दे॒वता॑ गच्छन्ति॒  
येऽह॑रुथ्सृ॒जन्त्य॑नु॒स॒र्वनं॒ पु॒रोडा॑शान्निर्व॒पन्ति॒ यथा॑य॒तना॑दे॒व  
स॒र्वन॑भाजो॒ दे॒वता॑ अ॒व रु॒न्धते॑ऽष्टा॒कपा॑लान्प्रा॒तःस॒र्वन॑ एका॒-  
द॒शक॑पा॒ला॒न्मा॒ध्य॑न्दि॒ने स॒र्वने॒ द्वाद॑शकपा॒लांस्त्तृ॑तीयस॒र्वने  
छ॒न्दां॑स्ये॒वात्वा॑व रु॒न्धते॑ वै॒श्वदे॑वं च॒रुं तृ॑तीयस॒र्वने नि॑र्व॒पन्ति॒  
वै॒श्वदे॑वं वै तृ॒तीयस॒र्वन॑न्तेनै॒व तृ॑तीयस॒र्वना॒न्न य॑न्ति॥ (१८)

उद॒च॒त्यु॒द्येऽह॑रा॒त्वा प॑ञ्चद॒श च॥४॥ [६]

उ॒थ्सृ॑ज्या(३)न्नो॒थ्सृ॑ज्या(३)मि॒ति मी॒मां॑सन्ते ब्र॒ह्मवा॑दि॒नस्त॑द्वा॒हु  
च पौ॑र्णमा॒स्यां चो॒थ्सृ॑ज्य॒मित्या॑हुरे॒ते हि य॒ज्ञं व॑ह॒त इति॑ ते त्वाव



नोऽसृज्ये इत्याहुर्ये अ॒वान्तरं॑ य॒ज्ञं भे॒जाते॑ इति॒ या प्र॑थ॒मा व्य॑ष्टका॒  
तस्या॑मु॒ऽसृज्य॑मित्याहु॒रेष वै मा॒सो वि॑शर इति॒ नादि॑ष्टम् (१९)

उ॒ऽसृजे॑युर्यदादि॑ष्टमु॒ऽसृजे॑युर्यादृ॒शे पुनः॑ पर्या॒प्लावे॑ म॒ध्ये  
षड॒हस्य॑ सम्पद्ये॑त षड॒हैर्मासा॑न्त्सम्पाद्य॒ यत्सप्त॑ममह॒-  
स्तस्मि॒न्नु॒ऽसृज्ये॑युस्तद॒ग्नये॑ वसु॑मते पुरो॒डाश॑म॒ष्टाक॑पालं  
निर्व॑पेयुरेन्द्रं दधीन्द्रा॑य म॒रुत्व॑ते पुरो॒डाश॑मेका॒दश॑कपालं  
वैश्वदे॒वं द्वाद॑शकपालम॒ग्रेवै वसु॑मतः प्रातःस॒वनं यद॑ग्नये॒ वसु॑मते  
पुरो॒डाश॑म॒ष्टाक॑पालं निर्व॑पन्ति दे॒वता॑मे॒व तद्वा॒ग्निनी॑ कुर्वन्ति (२०)

स॒वन॑मष्टा॒भिरु॑पं यन्ति॒ यदै॒न्द्रं दधि॑ भव॒तीन्द्र॑मे॒व तद्वा॒ग्नि॒धेया॒न्न  
च्या॒वय॑न्तीन्द्र॒स्य वै म॒रुत्व॑तो मा॒ध्यन्दि॑न॒ः स॒वनं॑ यदिन्द्रा॑य  
म॒रुत्व॑ते पुरो॒डाश॑मेका॒दश॑कपालं निर्व॑पन्ति दे॒वता॑मे॒व तद्वा॒ग्निनी॑  
कुर्वन्ति॒ स॒वन॑मेका॒दश॑भिरु॑पं यन्ति॒ विश्वे॑षां वै दे॒वाना॑मृ॒भुमता॑  
तृती॒यस॒वनं यद्वै॑श्वदे॒वं द्वाद॑शकपालं निर्व॑पन्ति दे॒वता॑ ए॒व  
तद्वा॒ग्निनी॑ कुर्वन्ति॒ स॒वनं॑ द्वाद॒शभिः॑ (२१)

उ॒पं यन्ति॒ प्राजा॑प॒त्यं प॒शुमा॑ ल॒भन्ते॑ य॒ज्ञो वै प्र॒जा-  
प॑तिर्य॒ज्ञस्यान॑नुसर्गायाभि॒वर्त॑ इतः षण्मा॒सो ब्र॑ह्मसा॒मं भ॑वति  
ब्रह्म॒ वा अ॑भि॒वर्तो॑ ब्रह्म॒णैव॑ तथ्सु॒वर्गं॑ लो॒कम॑भि॒वर्तय॑न्तो यन्ति  
प्रति॑कूलमि॒व ही॑तः सु॒वर्गो॑ लो॒क इन्द्र॑ ऋतुं न आ भ॑र  
पि॒ता पु॒त्रेभ्यो॑ यथा॑। शि॒क्षां नो अ॒स्मिन्पु॑रुहूत॒ याम॑नि जी॒वा

ज्योतिरशीमहीत्यमुत आयताः षण्मासो ब्रह्मसामं भवत्ययं वै  
लोको ज्योतिः प्रजा ज्योतिरिममेव तल्लोकं पश्यन्तोऽभिवदन्त  
आ यन्ति॥ (२२)

नार्दिष्टकुर्वन्ति द्वादशभिरिति विशतिश्च॥४॥ [७]

देवानां वा अन्तं जग्मुषामिन्द्रियं वीर्यमपाक्रामत्तत्क्रोशेनावा  
रुन्धत तत्क्रोशस्य क्रोशत्वं यत्क्रोशेन चात्वालस्यान्ते स्तुवन्ति  
यज्ञस्यैवान्तं गृत्वेन्द्रियं वीर्यमव रुन्धते सत्रस्यर्द्धाहवनीयस्यान्ते  
स्तुवन्त्यग्निमेवोपद्रष्टारं कृत्वर्द्धिमुप यन्ति प्रजापतेरहृदयेन  
हविर्धानेऽन्तः स्तुवन्ति प्रेमाणमेवास्य गच्छन्ति श्लोकेन  
पुरस्तात्सदसः (२३)

स्तुवन्त्यनुश्लोकेन पश्चाद्यज्ञस्यैवान्तं गृत्वा श्लोकभाजो  
भवन्ति नवभिरध्वर्युरुद्रायति नव वै पुरुषे प्राणाः प्राणानेव  
यजमानेषु दधाति सर्वा ऐन्द्रियो भवन्ति प्राणेष्वेवेन्द्रियं  
दधत्यप्रतिहृताभिरुद्रायति तस्मात्पुरुषः सर्वाण्यन्यानि शीर्ष्णो-  
ऽङ्गानि प्रत्यचति शिर एव न पञ्चदशः रथन्तरं भवतीन्द्रियमेवाव  
रुन्धते सप्तदशम् (२४)

बृहदन्नाद्यस्यावरुद्धा अथो प्रैव तेन जायन्त एकविंशं भद्रं  
द्विपदासु प्रतिष्ठित्यै पत्न्य उप गायन्ति मिथुनत्वाय प्रजात्यै प्रजा-  
पतिः प्रजा असृजत सोऽकामयतासामहः राज्यं परीयामिति

तासां॑ राज॒नेनै॒व रा॒ज्यं पर्यै॑त्तद्रा॒ज॒नस्य॑ राज॒नत्वं यद्रा॑ज॒नं भव॑ति  
प्र॒जाना॑मे॒व तद्यज॑माना रा॒ज्यं परि॑ यन्ति पञ्चविं॒शं भव॑ति प्र॒जा-  
प॑तेः (२५)

आ॒प्त्यै प॒ञ्चभि॒स्तिष्ठ॑न्तः स्तु॒वन्ति दे॒वलो॒कमे॒वाभि॑ जं॒यन्ति  
प॒ञ्चभि॒रासी॑ना मनु॒ष्यलो॒कमे॒वाभि॑ जं॒यन्ति द॒श सं प॑द्यन्ते द॒शाक्ष॑रा  
वि॒राडन्नं॑ वि॒राजै॑वान्नाद्य॒मव॑ रुन्धते पञ्च॒धा वि॑निषद्यं स्तु॒वन्ति पञ्च॑  
दि॒शो दि॒क्ष्वैव॑ प्रति॑ तिष्ठन्त्येकै॒कया॑स्तु॒तया॑ सु॒माय॑न्ति दि॒ग्भ्य  
ए॒वान्नाद्य॑ सं॒म्भ॑रन्ति ताभि॑रु॒द्गातो॒द्गाय॑ति दि॒ग्भ्य ए॒वान्नाद्य॑म् (२६)

स॒म्भृत्य॑ तेजं आ॒त्म॒न्दध॑ते तस्मा॒देकः॑ प्रा॒णः सर्वा॑ण्यङ्गान्यव॒त्यथो॑  
यथा॑ सु॒पर्ण उ॑त्पतिष्य॒ञ्छिरं॑ उत्त॒मं कुरु॑त ए॒वमे॒व तद्यज॑मानाः  
प्र॒जाना॑मुत्त॒मा भ॑वन्त्यास॒न्दीमु॒द्गाता॑ रो॒हति॑ सा॒म्राज्य॑मे॒व गच्छ॑न्ति  
प्ले॒ङ्गं होता॑ नाक॑स्यै॒व पृष्ठं॑ रो॒हन्ति॑ कूर्चा॒वध्व॑र्यु॒र्ब्रध्न॑स्यै॒व वि॒ष्टपं॑  
गच्छ॑न्त्ये॒ताव॑न्तो॒ वै दे॒वलो॒कास्तेष्वे॒व यथा॑पूर्वं प्रति॑ तिष्ठन्त्यथो॑  
आ॒क्रम॑णमे॒व तत्सेतुं॑ यज॑मानाः कुर्व॑ते सु॒वर्ग॑स्य॒ लोक॑स्य॒  
सम॑ष्ट्यै॥ (२७)

सदसः सप्तदशं प्रजापतेर्गायति दिग्भ्य एवान्नाद्यं प्रत्येकादश च॥५॥ [८]

अ॒र्क्येण॑ वै स॒हस्र॑शः प्र॒जाप॑तिः प्र॒जा अ॑सृजत् ताभ्य॒  
इला॑न्दे॒नेरा॑ लू॒ताम॒वारु॑न्ध॒ यद॒र्क्य॑म्भवति प्र॒जा ए॒व तद्यज॑मानाः  
सृज॑न्त॒ इला॑न्दं भवति प्र॒जाभ्य॑ ए॒व सृ॒ष्टाभ्य॑ इरा॑ लू॒ताम॒व

रुन्धते तस्माद्या९ समा९ स॒त्र९ समृद्धं क्षोधु॑कास्ता९ समा॑ प्र॒जा  
इष॑ः ह्या॑सामूर्जमाददते या९ समा॑ व्यृद्धमक्षोधु॑कास्ता९ समा॑  
प्र॒जाः (२८)

न ह्या॑सामिषमूर्जमाददत उत्क्रोदं कुर्वते यथा बन्धान्मुमुचा॑ना  
उत्क्रोदं कुर्वत ए॒वमे॒व तद्यज॑माना देवबन्धान्मुमुचा॑ना  
उत्क्रोदं कुर्वत इषमूर्जमात्मन्दधा॑ना वा॒णः श॒तत॑न्तुर्भवति  
श॒तायुः पुरु॑षः श॒तेन्द्रि॑य आयुष्येवेन्द्रि॑ये प्रति॑ तिष्ठन्त्याजि॑  
धाव॑न्त्यनभिजितस्याभिजित्यै दुन्दुभीन्समाघ्नन्ति पर॒मा वा ए॒षा  
वा॒ग्या दु॑न्दुभौ पर॒मामे॒व (२९)

वाचम॑व रुन्धते भूमिदुन्दुभिमा घ्नन्ति यैवेमां वाक्प्रविष्टा॑  
तामे॒वाव रुन्ध॑तेऽथो॑ इ॒मामे॒व ज॑यन्ति सर्वा॑ वाचो॑ वदन्ति सर्वा॑सां  
वा॒चाम॑वरुद्धा आर्द्रे चर्म॑न्व्यायच्छेते इन्द्रि॑यस्यावरुद्धा॑ आ॒न्यः  
क्रोश॑ति प्रा॒न्यः श॑सति॒ य आ॒क्रोश॑ति पु॒नात्ये॒वैना॒न्त्स स यः  
प्र॒श॑सति॒ पू॒तेष्वे॒वान्नाद्य॑ दधात्यृषि॑कृतं च (३०)

वा ए॒ते दे॒वकृ॑तं च पूर्वे॑र्मासैर॑व रुन्धते यद्भू॑तेच्छदा९  
सामा॑नि भव॑न्त्युभयस्यावरुद्धौ यन्ति॒ वा ए॒ते मि॑थुनाद्ये  
संव॑त्सरमु॑पयन्त्यन्तर्वे॑दि मि॑थुनौ सम्भव॑तस्तेनै॒व मि॑थुनान्न  
यन्ति॥ (३१)

चर्माव॑ भिन्दन्ति पा॒प्मान॑मे॒वैषाम॑व॑ भिन्दन्ति॒ माप॑ रा॒थ्सी॒र्माति॑  
 व्या॒थ्सी॒रित्या॑ह॒ सम्प्र॒त्ये॒वैषा॑ पा॒प्मान॑म॒व॑ भिन्दन्त्युदकुम्भान॑धिनि॒धाय॑  
 दा॒स्यो॑ मा॒र्जा॒लीयं॑ परि॑ नृत्यन्ति प॒दो नि॑घ्नतीरि॒दं म॑धुं गायन्त्यो  
 मधु॑ वै दे॒वाना॑ पर॒मम॑न्नाद्यं पर॒ममे॒वान्नाद्य॑म॒व॑ रुन्धते प॒दो नि  
 घ्नन्ति॑ महीयामे॒वैषु॑ दधति॥ (३२)

चर्मैकान्नपञ्चाशत्॥१॥ [१०]

पृथि॒व्यै स्वा॒हान्तरि॑क्षाय॒ स्वाहा॑ दि॒वे स्वाहा॑ सम्प्लोष्य॑ते स्वाहा॑  
 स॒म्प्लव॑मानाय॒ स्वाहा॑ सम्प्लु॑ताय॒ स्वाहा॑ मे॒घायिष्य॑ते स्वाहा॑ मे॒घाय॑ते  
 स्वाहा॑ मे॒घिताय॑ स्वाहा॑ मे॒घाय॑ स्वाहा॑ नी॒हाराय॑ स्वाहा॑ नि॒हाका॑यै  
 स्वाहा॑ प्रा॒स॒चाय॑ स्वाहा॑ प्र॒च॒लाका॑यै स्वाहा॑ वि॒द्योति॑ष्यते स्वाहा॑  
 वि॒द्योत॑मानाय॒ स्वाहा॑ संवि॒द्योत॑मानाय॒ स्वाहा॑ स्तन॑यिष्यते स्वाहा॑  
 स्त॒नय॑ते स्वाहो॒ग्रः स्त॒नय॑ते स्वाहा॑ व॒र्षिष्य॑ते स्वाहा॑ व॒र्षते॑  
 स्वाहा॑भि॒व॒र्षते॑ स्वाहा॑ परि॒व॒र्षते॑ स्वाहा॑ सं॒व॒र्षते॑ (३३)

स्वाहा॑नु॒व॒र्षते॑ स्वाहा॑ शी॒कायिष्य॑ते स्वाहा॑ शी॒काय॑ते  
 स्वाहा॑ शी॒कि॒ताय॑ स्वाहा॑ प्रो॒षिष्य॑ते स्वाहा॑ प्रु॒ष्णते॑ स्वाहा॑  
 परि॒प्रु॒ष्णते॑ स्वाहो॑द्ग॒हीष्य॑ते स्वाहो॑द्ग॒ह्णते॑ स्वाहो॑द्ग॒हीताय॑ स्वाहा॑  
 वि॒प्लोष्य॑ते स्वाहा॑ वि॒प्लव॑मानाय॒ स्वाहा॑ वि॒प्लु॑ताय॒ स्वाहा॑त॒प्स्य॑ते  
 स्वाहा॑त॒प॑ते स्वाहो॒ग्रमा॑त॒प॑ते स्वाहो॒र्ग्यः स्वाहा॑ य॒जुर्भ्यः॑ स्वाहा॑  
 सा॒म॒भ्यः स्वाहा॑ङ्गि॒रोभ्यः॑ स्वाहा॑ वे॒दैभ्यः॑ स्वाहा॑ गा॒था॒भ्यः स्वाहा॑

नाराश॑सी॒भ्यः स्वाहा॑ रैर्भी॑भ्यः स्वाहा॑ सर्व॒स्मै स्वाहा॑॥ (३४)

सं वर॑पते रैर्भी॑भ्यः स्वाहा॑ द्वे च॥२॥ \_\_\_\_\_ [११]

द॒त्वते स्वाहा॑ऽद॒न्तका॑य स्वाहा॑ प्रा॒णिने स्वाहा॑ऽप्रा॒णाय  
स्वाहा॑ मुख॑वते स्वाहा॑ऽमु॒खाय स्वाहा॑ ना॒सिक॑वते स्वाहा॑-  
ऽना॒सिका॑य स्वाहा॑ऽक्ष॑ण्वते स्वाहा॑ऽन॒क्षिका॑य स्वाहा॑ क॒र्णिने  
स्वाहा॑ऽक॒र्णका॑य स्वाहा॑ शी॒र्षण्व॑ते स्वाहा॑ऽशी॒र्षका॑य स्वाहा॑  
प॒द्वते स्वाहा॑ऽपा॒दका॑य स्वाहा॑ प्रा॒णते स्वाहा॑ऽप्रा॒णते स्वाहा॑  
व॒दते स्वाहा॑ऽव॒दते स्वाहा॑ प॒श्यते स्वाहा॑ऽप॒श्यते स्वाहा॑ शृ॒ण्वते  
स्वाहा॑ऽशृ॒ण्वते स्वाहा॑ म॒नस्वि॑ने स्वाहा॑ (३५)

अ॒म॒न॒से स्वाहा॑ रे॒तस्वि॑ने स्वाहा॑ऽरे॒तस्का॑य स्वाहा॑ प्र॒जाभ्यः  
स्वाहा॑ प्र॒जने॑नाय स्वाहा॑ लो॒म॒वते स्वाहा॑ऽलो॒मका॑य स्वाहा॑ त्व॒चे  
स्वाहा॑ऽत्व॒क्का॑य स्वाहा॑ च॒र्म॒ण्वते स्वाहा॑ऽच॒र्मका॑य स्वाहा॑ लो॒हि॒तव॑ते  
स्वाहा॑ऽलो॒हि॒ताय स्वाहा॑ मा॒स॒न्वते स्वाहा॑ऽमा॒स॒काय स्वाहा॑  
स्ना॒व॒भ्यः स्वाहा॑ऽस्ना॒वका॑य स्वाहा॑ऽस्थ॒न्वते स्वाहा॑ऽन॒स्थिका॑य  
स्वाहा॑ म॒ज्ज॒न्वते स्वाहा॑ऽम॒ज्जका॑य स्वाहा॑ऽङ्गि॑ने स्वाहा॑ऽन॒ङ्गाय  
स्वाहा॑ऽऽत्म॑ने स्वाहा॑ऽना॑त्मने स्वाहा॑ सर्व॒स्मै स्वाहा॑॥ (३६)

म॒नस्वि॑ने स्वाहा॑ऽना॑त्मने स्वाहा॑ द्वे च॥२॥ \_\_\_\_\_ [१२]

क॒स्त्वा यु॑नक्ति॒ स त्वा॑ यु॒नक्तु॑ विष्णु॑स्त्वा यु॒नक्तु॑स्य य॒ज्ञस्य॑र्द्धौ  
म॒ह्य॑ स॒न्न॒त्या अ॒मुष्मै॑ का॒माया॑युषे त्वा प्रा॒णाय॑ त्वाऽपा॒नाय॑ त्वा

व्या॒नाय॑ त्वा व्यु॑ष्ठ्यै त्वा र॒य्यै त्वा राध॑से त्वा घोषा॑य त्वा पोषा॑य  
त्वा॒राद् घोषा॑य त्वा प्रच्यु॑त्यै त्वा॥ (३७)

कस्त्वाऽष्टात्रिंशत्॥१॥ ————— [१३]

अ॒ग्नये॑ गा॒यत्राय॑ त्रि॒वृते॒ राथ॑न्तराय वास॒न्ताया॒ष्टाक॑पाल  
इन्द्रा॑य त्रैष्टु॑भाय प॒ञ्चद॑शाय बा॒र्हता॑य ग्रैष्मा॒यैका॑दशकपालो  
विश्वे॑भ्यो दे॒वेभ्यो॒ जाग॑तेभ्यः सप्तद॑शेभ्यो वैरू॒पेभ्यो॒ वार्षि॑केभ्यो  
द्वाद॑शकपालो मि॒त्रावरु॑णाभ्या॒मानु॑ष्टुभाभ्यामेकविं॒शाभ्या॑  
वैरा॒जाभ्यां॑ शार॒दाभ्यां॑ पय॒स्यां बृ॒हस्प॑तये पाङ्गा॑य त्रिण॒वाय॑  
शाक्क॑राय हैम॑न्तिकाय च॒रुः स॒वित्र॑ आ॒तिच्छ॑न्दसाय त्रयस्त्रिं॒शाय॑  
रैव॑ताय शैशि॑राय द्वाद॑शकपालोऽदि॒त्यै विष्णु॑पत्यै च॒रुर॑ग्नये  
वैश्वान॑राय द्वाद॑शकपालोऽनु॑मत्यै च॒रुः का॒य एक॑कपालः॥ (३८)

अ॒ग्नयेऽदि॒त्या अनु॑मत्यै स॒प्तच॑त्वारिंशत्॥१॥ ————— [१४]

यो वा अ॒ग्राव॑ग्निः प्र॒हिय॑ते यश्च सोमो॒ राजा॑ तयो॑रेष आ॒तिथ्यं॑  
यद॑ग्नीषो॒मीयो॑ऽथैष रु॒द्रो यश्ची॑यते यथ्सञ्चिते॒ऽग्रावे॑तानि ह॒वींषि॑ न  
निर्व॑पेदेष ए॒व रु॒द्रोऽशान्त॑ उपो॒त्थाय॑ प्र॒जां प॒शून् यज॑मानस्याभि  
म॒न्येत॑ यथ्सञ्चिते॒ऽग्रावे॑तानि ह॒वींषि॑ निर्व॑पति भा॒गधे॑येनै॒वैनं॑  
शम॑यति नास्य रु॒द्रोऽशान्तः॑ (३९)

उपो॒त्थाय॑ प्र॒जां प॒शून्भि॑ म॒न्यते॒ दशं॑ ह॒वींषि॑ भवन्ति न॒व  
वै पुरु॑षे प्रा॒णा नाभि॑र्दशमी प्रा॒णाने॒व यज॑माने दधा॒त्यथो॒ दशाक्ष॑रा  
वि॒राडन्नं॑ वि॒राज्ये॒वान्नाद्ये॑ प्रति॑ तिष्ठत्यृ॒तुभि॒र्वा ए॒ष छन्दो॑भिः स्तोमैः

पृष्ठैश्चेतव्यं इत्याहुयदेतानि हवींषि निर्वपत्यतुभिरेवैनं छन्दोभिः  
स्तोमैः पृष्ठैश्चिनुते दिशः सुषुवाणेन (४०)

अभिजित्या इत्याहुयदेतानि हवींषि निर्वपति दिशामभिजित्या  
एतया वा इन्द्रं देवा अयाजयन्तस्मादिन्द्रसव एतया मनुं  
मनुष्यास्तस्मान्मनुसवो यथेन्द्रो देवानां यथा मनुर्मनुष्याणामेवं  
भवति य एवं विद्वानेतयेष्ट्या यजते दिग्वतीः पुरोनुवाक्या भवन्ति  
सर्वासां दिशामभिजित्यै॥ (४१)

अशान्तः सुषुवाणेनैकचत्वारिंशच्च॥३॥ \_\_\_\_\_ [१५]

यः प्राणतो निमिषतो महित्वैक इद्राजा जगतो बभूव। य ईशे  
अस्य द्विपदश्चतुष्पदः कस्मै देवाय हविषा विधेम। उपयामगृहीतो-  
ऽसि प्रजापतये त्वा जुष्टं गृह्णामि तस्य ते द्यौर्महिमा नक्षत्राणि  
रूपमादित्यस्ते तेजस्तस्मै त्वा महिम्ने प्रजापतये स्वाहा॥ (४२)

यः प्राणतो द्यौरादित्यौऽष्टात्रिंशत्॥१॥ \_\_\_\_\_ [१६]

य आत्मदा बलदा यस्य विश्वं उपासते प्रशिषं यस्य  
देवाः। यस्य छायामृतं यस्य मृत्युः कस्मै देवाय हविषा विधेम।  
उपयामगृहीतोऽसि प्रजापतये त्वा जुष्टं गृह्णामि तस्य ते पृथिवी  
महिमौषधयो वनस्पतयो रूपमग्निस्ते तेजस्तस्मै त्वा महिम्ने  
प्रजापतये स्वाहा॥ (४३)

य आत्मदाः पृथिव्याग्निरेकान्नचत्वारिंशत्॥१॥ \_\_\_\_\_ [१७]



आ ब्रह्मन्ब्राह्मणो ब्रह्मवर्चसी जायतामाऽस्मिन्नाष्ट्रे राजन्यं  
 इषव्यः शूरो महारथो जायतान्दोग्ध्रीं धेनुर्वोढाऽनुङ्वानाशुः सप्तिः  
 पुरन्धिर्योषां जिष्णू रथेष्टाः सभेयो युवाऽस्य यजमानस्य वीरो  
 जायतान्निकामेनिकामे नः पर्जन्यो वर्षतु फलिन्यो न ओषधयः  
 पच्यन्तां योगक्षेमो नः कल्पताम्॥ (४४)

आ ब्रह्मन्नेकचत्वारिंशत्॥१॥ ————— [१८]

आक्रान् वाजी पृथिवीमग्निं युजमकृत वाज्यर्वाक्रान्  
 वाज्यन्तरिक्षं वायुं युजमकृत वाज्यर्वा द्यां वाज्याऽक्र॑स्त सूर्यं  
 युजमकृत वाज्यर्वाग्निस्ते वाजिन् युङ्ङुः त्वा रभे स्वस्ति मा सं  
 पारय वायुस्ते वाजिन् युङ्ङुः त्वा रभे स्वस्ति मा सम् (४५)

पारयादित्यस्ते वाजिन् युङ्ङुः त्वा रभे स्वस्ति मा सं  
 पारय प्राणधृगंसि प्राणं मे द॑ह व्यानधृगंसि व्यानं मे  
 द॑हापानधृगस्यपानं मे द॑ह चक्षुरसि चक्षुर्मयि धेहि श्रोत्रमसि  
 श्रोत्रं मयि धेह्यायुरस्यायुर्मयि धेहि॥ (४६)

वायुस्ते वाजिन् युङ्ङुः त्वा रभे स्वस्ति मा सन्निचत्वारिंशच्च॥२॥ ————— [१९]

जज्ञि बीजं वर्षा पर्जन्यः पक्ता सस्य॑ सुपिप्पला  
 ओषधयः स्वधिचरणेय॑ सूपसदनोऽग्निः स्वध्यक्षमन्तरिक्ष॑  
 सुपावः पवमानः सूपस्थाना द्यौः शिवमसौ तपन् यथापूर्वमहोरात्रे  
 पञ्चदशिनोऽर्धमासास्त्रिंशिनो मासाः क्लृप्ता ऋतवः शान्तः  
 संवत्सरः॥ (४७)

जज्ञि वीजमेकत्रिंशत्॥१॥ [२०]

आग्नेयोऽष्टाकपालः सौम्यश्चरुः सावित्रोऽष्टाकपालः  
पौष्णश्चरु रौद्रश्चरुरग्नये वैश्वानराय द्वादशकपालो मृगाखरे  
यदि नागच्छेदग्नयेऽहोमुचेऽष्टाकपालः सौर्यं पयो वायव्यं  
आज्यभागः॥ (४८)

आग्नेयश्चतुर्विंशतिः॥१॥ [२१]

अग्नयेऽहोमुचेऽष्टाकपाल इन्द्रायाऽहोमुच एकादश-  
कपालो मित्रावरुणाभ्यामागोमुग्न्यां पयस्यां वायोसावित्र  
आगोमुग्न्यां चरुरश्विभ्यामागोमुग्न्यां धाना मरुद्भ्य एनोमुग्न्यः  
सप्तकपालो विश्वेभ्यो देवेभ्य एनोमुग्न्यो द्वादशकपालोऽनुमत्यै  
चरुरग्नये वैश्वानराय द्वादशकपालो द्यावापृथिवीभ्यामहोमुग्न्यां  
द्विकपालः॥ (४९)

अग्नयेऽहोमुचे त्रिंशत्॥१॥ [२२]

अग्नये समनमत्पृथिव्यै समनमद्यथाग्निः पृथिव्या समनमदेवं  
मह्यं भद्राः सन्नतयः सं नमन्तु वायवे समनमदन्तरिक्षाय  
समनमद्यथा वायुरन्तरिक्षेण सूर्याय समनमद्विवे समनमद्यथा  
सूर्यो दिवा चन्द्रमसे समनमन्नक्षत्रेभ्यः समनमद्यथा चन्द्रमा  
नक्षत्रैर्वरुणाय समनमदद्भ्यः समनमद्यथा (५०)

वरुणोऽद्भिः साम्ने समनमदृचे समनमद्यथा सामर्चा ब्रह्मणे

समनमत्क्षत्राय समनमद्यथा ब्रह्म क्षत्रेण राज्ञे समनमद्विशे  
 समनमद्यथा राजा विशा रथाय समनमदश्वेभ्यः समनमद्यथा  
 रथोऽश्वैः प्रजापतये समनमद्भूतेभ्यः समनमद्यथा प्रजापतिर्भूतैः  
 समनमदेवं मह्यं भद्राः सन्नतयः सं नमन्तु॥ (५१)

अद्यः समनमद्यथा मह्यं चत्वारि च॥२॥ [२३]

ये ते पन्थानः सवितः पूर्यासोऽरेणवो वितता अन्तरिक्षे।  
 तेभिर्नो अद्य पृथिभिः सुगेभी रक्षा च नो अधि च देव ब्रूहि। नमो-  
 ऽग्नये पृथिविक्षिते लोकस्पृते लोकमस्मै यजमानाय देहि नमो  
 वायवेऽन्तरिक्षक्षिते लोकस्पृते लोकमस्मै यजमानाय देहि नमः  
 सूर्याय दिविक्षिते लोकस्पृते लोकमस्मै यजमानाय देहि॥ (५२)

ये ते चतुश्चत्वारिंशत्॥१॥ [२४]

यो वा अश्वस्य मेध्यस्य शिरो वेद शीर्षण्वान्मेध्यो भवत्युषा  
 वा अश्वस्य मेध्यस्य शिरः सूर्यश्चक्षुर्वातः प्राणश्चन्द्रमाः श्रोत्रन्दिशः  
 पादा अवान्तरदिशाः पर्शवोऽहोरात्रे निमेषोऽर्धमासाः पर्वाणि  
 मासाः सन्धानान्यृतवोऽङ्गानि संवत्सर आत्मा रश्मयः केशा  
 नक्षत्राणि रूपन्तारका अस्थानि नभो मांसान्योषधयो लोमानि  
 वनस्पतयो वाला अग्निर्मुखं वैश्वानरो व्यात्तम् (५३)

समुद्र उदरमन्तरिक्षं पायुर्द्यावापृथिवी आण्डौ ग्रावा शेपुः  
 सोमो रेतो यज्जञ्जभ्यते तद्वि द्योतते यद्विधूनुते तथ्स्तनयति

यन्मेहंति तद्वर्षति वागेवास्य वागहर्वा अश्वस्य जायमानस्य  
 महिमा पुरस्ताज्जायते रात्रिरेनं महिमा पश्चादनु जायत एतौ  
 वै महिमानावश्वमभितः सम्बभूवतुरुहयो देवानवहर्दवांसुरान्  
 वाजी गन्धर्वानश्वो मनुष्यान्थ्समुद्रो वा अश्वस्य योनिः समुद्रो  
 बभूवुः॥ (५४)

व्यात्तमवहर्द्वादश च॥२॥ [२५]

गावो गावः सिषांसन्तीः प्रथमे मासि संमान्यो यदि सोमौ षडहैरुथ्सृज्या(३)ं देवानामर्क्येण चर्माव  
 पृथिव्यै दत्तवते कस्त्वाग्नये यो वै यः प्राणतो य आत्मदा आ ब्रह्मन्नाक्राञ्जि बीजमाग्रेयोऽष्टाकपालोऽग्नये-  
 ऽरहोमुचेऽष्टाकपालोऽग्नये समनमृद्ये ते पन्थानो यो वा अश्वस्य मेध्यस्य शिरः पञ्चविंशतिः॥२५॥

गावः समान्यः सर्वनमष्टाभिर्वा एते देवकृतश्चाभितिष्या इत्याहुर्वरुणोऽद्विः साम्ने चतुःपञ्चाशत्॥५४॥

गावो योनिः समुद्रो बभूवुः॥

हरिः ॐ॥

॥कृष्ण-यजुर्वेदीय-तैत्तिरीय-संहितायां सप्तमकाण्डे पञ्चमः प्रश्नः  
 समाप्तः॥ ७-५॥

॥कृष्ण-यजुर्वेदीय-तैत्तिरीय-संहितायां सप्तमकाण्डः समाप्तः॥ ७॥



 generated on May 9, 2026